

**NATIONAL ASSEMBLY OF
SEYCHELLES**

Tuesday 03rd February, 2026

The Assembly met at 0902am

National Anthem

Moment of Reflection

Madam Speaker in the Chair

MADAM SPEAKER

Bon mon a dir bonzour tou Manm, tou dimoun ki pe ekout nou osi e ki pe swiv nou lo bann rezo medya sosyal.

Ozordi nou sesyon i pou nou resevwar larepons lo Ladres Prezidan Leta Lanasyon - *from Leader Lopozişyon* e apre i pou swiv par *Leader Zafer Gouvernman* e lezot Manm. Me avan sa nou annan *2 First Reading*, mon ava demann Clerk pou fer le nesaser.

MADAM CLERK

Mersi Madanm Speaker. Bonzour Madanm Speaker, bonzour tou bann Manm, tou dimoun a lekout. Nou 2 *Bill* ki pe ganny prezante *ce matin* i: -

The Unemployment Relief Scheme Bill avek *The Appropriation Bill, 2026*.

This Act may be cited as the Unemployment Relief Scheme Act 2025 and shall

come into operation on such date as the Minister may by notice published in the Gazette.

This Act may be cited as the Appropriation Act, 2026.
Mersi Madanm Speaker.

MADAM SPEAKER

Mersi. Nou ava aprezan pran larepons sorti kot *Leader Lopozişyon* Onorab Bernard Georges.

HON BERNARD GEORGES

Bonzour Madanm Speaker. Bonzour tou mon bann koleg Onorab, bonzour tou dimoun ki pe swiv nou dan lakour.

Madanm Speaker, mon pran laparol bomaten pour 20enm fwa pou reponn en mesaz Prezidan lo Leta nou nasyon. Mon'n reponn mesaz Prezidan Rene, Prezidan Michel, Prezidan Faure, Prezidan Ramkalawan e la Prezidan Herminie.

Sa 20 Repons in donn mwan loportinite fer en parkour politik atraver listwar nou pei dan Lopozişyon kot nou ti 3 Manm selman, ler mon ti antre dan koabitasyon koman *Leader Zafer Gouvernman* avek en mazorite absolli e la konman *Leader Lopozişyon* dan Lasanble.

Sa enn repons i diferan avek lezot, i diferan aköz i pe ganny fer dan lannen Zibile Lor nou Lendependans, e i pe ganny fer apre ki nou parti

LDS in pas 5an o pouvwar. Sa i donn mwan loportinite pou reponn mesaz Prezidan Herminie dan konteks sa 2 lanniverser, enn nasyonal, enn personnel.

Ler Seselwa ti desann lo Stad Popiler le 28 Zen 1976 aswar pour seremoni Lendependans nou pei, nou pep ti diviz an de morso egal politikman. Lanmwatye ti siport Parti Demokratik, lot lanmwatye ti siport *SPUP*, granper Parti *US*.

Me, nou dirizan ti demann nou met nou diferans de kote e ini konman en sel pep anba en sel paviyon ver en sel desten. Nou ti fer li ziska ki 11mwan pli tar granper ti deside ki se li ki devret pran pouvwar. Linite ti nepli enportan. Lafors e dominasyon ki ti pran son plas.

La, 50an pli tar, nou pep i ankor divize, lanmwatye i siport Parti *US*, lot lanmwatye i siport *LDS*. E, ankor enn fwa, Prezidan in fer en lapel pou linite. 50an in pase sityasyon politik dan pei i ankor parey, menm refren pe ganny sante. Eski lavenir nou pei e nou pep pou diferan safwasi, ouswa eski nou pou antre ankor dan en peryod dominasyon en parti politik dan tou sekter nou lavi parey ti arive an 1977?

Eski Sesel in aprann okenn keksoz dan sa dernyen 50an ouswa eski menm politik pe ganny aplike lo menm *play book*? Eski nou politik in evolye dan sa 50an ouswa eski parti o pouvwar i oule domin nou lavi dan tou kous lasosyete parey nou'n konmans war deza?

Andot mo, eski soley pe lev parey i ti fer le 29 Zen 1976 avek lespwar en pep an antye, ouswa eski i pe lev parey i ti fer le 5 Zen 1977 avek vizyon dominasyon en sel pwendvi politik, en sel azanda, en sel loptik pour nou pei?

Mon fer sa refleksyon boner Madanm Speaker, aköz se sa mon preokipasyon e preokipasyon bokou dimoun ankor, pa zis dan Lopozisyon, me osi parmi bokou ki'n siport *US* dan dernyen eleksyon e ki'n obzerve sa ki'n arive dan sa detrwa dernyen semenn.

Aprè sa premye 100 zour Ladministrasyon *US* mon regard otour mwan e mon pa war en pep avek lespwar pou en meyer lavi. O kontrè, mon war en pep dan lafreder, dan dout, dan konfizyon.

Dan son Diskour Inogirasyon, Prezidan Herminie ti fer en lapel pour linite, en lapel ki in repete plizyer fwa depi sa.

Me par son aksyon pandan sa bann semenn ki'n pase nou pa'n war okenn

demonstrasyon linite sorti kot Prezidan. O kontrè, nou'n war li pe atak son predeseser, *leader* lanmwaye nou pei toulezour, retir tou vestiz sa ki Ladministrasyon LDS in fer, met dout dan lespri Seselwa lo byenfe sa dernyen 5an.

Sa se par aksyon en dirizan ki anvi inifye son pep dan lannen selebrasyon 50an Lendependans. Se aksyon en dirizan ki anvi *rule border* li tousel e diviz nou pei e nou pep.

Prezidan Herminie pe koz linite anmezir ki i senm divan divizyon e in swazi pou fer sa dan lannen kot Lepep Seselwa in donn li loportinite pou prezid lo lannen zibile lor Lendependans nou pei e servi sa lokazyon pou Koste Seselwa e fer ki ansanm nou kapab.

La ki nou demokrasi in matir e kot in annan de tranzisyon e pasasyon pouvwar dan lape ant sa de lafors politik dan nou pei-ansanm nou kapab met lepase deryer nou e regard lorizon avek kouraz, determinasyon, lafyerte, ini konman en sel nasyon, anba en sel paviyon e anba proteksyon nou papa ki dan lesyel.

I tris alor pou konstata, Madanm Speaker, ki Prezidan Herminie in swazir pou pa mars dan semen linite, me pou refize rekonnet valer dimoun ki pa siport son parti me ki

annan kantmenm en kontribisyon pou fer. Pou ranplas dimoun konpetan par son siporter, pou met lwayote par devan kapasite partou dan Gouvernman.

Pou fer kler ki si ou son siporter ou pou byen pase, me si ou pa, ou kapasite travay pa enportan, ou pou ganny met akote. I enposib pou konstri ouswa mentenir en nasyon kot sakenn pe bos son kote, kot en kote i zis atake kot lot kote i defann son lekòr.

Ler sa i arive Madanm Speaker, Leta nou nasyon pa bon. E Madanm Speaker, i fer mon dir ki anba sa Gouvernman Leta nou nasyon i kritik. *The process cannot be trusted.*

Leta nou nasyon Madanm Speaker, se ki nou annan en Gouvernman ki anvi efas parey mon'n dir tou sa ki Ladministrasyon LDS in fer. Nou war sa toulezour dan tou desizyon ki Gouvernman i pran e sa ki ptipti koman sa ki gran. Lotel lo Assomption, me osi desen lo de moniman lo *roundabout* Anvil.

Ouver *State House* pou piblik, trezyenm mwan baze lo performans, laz pansyon Sekirite Sosyal, polisi lo seve etidyan dan lekòl. Se konmsi Gouvernman US in anvi efas latras sa dernyen 5an e fer krwar ki sa pa'n zanmen arive.

Zot a seye, Madanm Speaker, me lagrenn ki *LDS* in semen, lagrenn responsabilite endividyel, travay dir, sorti lo *welfare*, pou zermen e i pou grandi. Napa pwazon, napa *round up* ki pou touy sa ki pe pouse. Parey Prezidan Ramkalawan in dir, zot a sanz detrwa keksoz me zot pa pou efas listwar e larealite.

Ero *Terminal* Baie Saint Anne pou reste, Lopital St Mary's La Digue pa pou retourn dan plas kot Lopital Logan ti ete, Libreri Nasyonal, Batiman Carnegie, Stad Linite e *Warehouse STC* pou la pou lepep regarde toulezour e dir ek zot lekor, 'men, be sa Ramkalawan pa in travay pou sa pei li?'

Sey efase si zot anvi, ler zot lagonm in fini bit ek dibwa kreyon, nou pou la, Ramkalawan pou la e sa bann striktir pou la, akoz nou Madanm Speaker nou pa zanmen les tonbe.

Pou en nasyon grandi e reste stab, tou dimoun i bezwen dakor lo trwa keksoz, kontinite, stabilite, linite. Gouvernman pou sanze e Lepep Seselwa in montre nou ki zot in fini konpran sa. Tou le 5an zot annan en sans tir sa ki la e ranplas li, zot in fer sa de fwa konsekitiv deza.

E parey nou sanson i dir, 'sa ki anler i kapab desann, sa ki anba i kapab monte.' Me

lepep i egziz en keksoz, ki sa sanzman pa vin en lekskiz pou kraz tou sa ki sa enn avan in fer e rekonmans lo zero. Non, sa ki lepep i oule se ki sa enn ki vini i kontinyen travay ki sa enn ki ti la in fer e batir lo fondasyon ki egziste.

Gouvernman pa en zwe *Snakes and Ladders* li, retourn an aryer i pa en opsyon, bouz devan, fer pli byen ki sa enn ki ti la avan e fer ou pep viv dan plis prosperite ki konte. Kontinite e non pa kase refer, evolisyon e non pa revolisyon, se sa lakle. Stabilite i enperatif, se selman avek kontinyasyon ki nou pou annan stabilite.

En siporter *LDS* i bezwen kapab fyer ler i pas devan *National Library*, ouswa ler i antre dan Lopital St Mary's e dir ek son lekor, sa se travay nou Gouvernman. E en siporter *US* i bezwen li osi kapab dir ler i war sa de striktir pe ganny amelyore par son Gouvernman, wi, mon Gouvernman in amelyor sa ki ti la avan.

Dan sa ki in fer ziska prezan malerezman, Prezidan Herminie pa'n pran an kont sa trwa enperatif, ou plito, in rezet sa trwa nesesite. I pous travayer ki siport *LDS* dan plizyer lorganizasyon e ranplas zot avek son siporter fidel.

Olye rod rekonsilyasyon avek son predeseser i pe rod tou lipou pou met lo Wavel Ramkalawan, aras son sekirite zot zarm, pran son loto avek li, fer lanket dan tou gran desizyon ki in pran konman Prezidan.

Rezilta tousala i senp Madanm Speaker, Prezidan Herminie pe senm divizyon. I pe repous siporter *LDS* e ler i pou pran levanter, se zis son dimoun ki pou otour li, larestan pou pe asize kot zot, pe *follow the process*.

Anba sa Gouvernman Madanm Speaker, Leta nou nasyon i kritik, *the process cannot be trusted*.

(APPLAUSE)

HON BERNARD GEORGES

Leta nou nasyon Madanm Speaker, se ki nou annan en Gouvernman ki pa konsilte avan i fer en keksoz ki pou afekte en seksyon popilasyon.

Dan son Diskour Linogirasyon, Prezidan Herminie ti promet pou konsilte avek lepep avan i pran en desizyon. Nou realize prezan ki sa ti en parol bon marse san okenn lentansyon pou met li an aplikasyon.

Dan sa premye 100 zour sa ladministrasyon, Prezidan Herminie in fer sorti en lord ki dezormen gard trafik pa pou al lo *scene* aksidan ki pa serye.

Sa ti pa ni en promes eleksyon, ni en desizyon pran apre konsiltasyon avek piblik ouswa menm avek bann lakonpannyen lasirans.

Mon ti dir kler ler sa desizyon ti ganny anonse ki i pa ti pou reste lontan. Mon parol sete, '*good idea but it won't work*'. En semenn pli tar desizyon ti ganny ranverse.

Aprè sa, nou ti war lapwentman nouvo Sef Servis Lentelizans Sesel par Prezidan san konsilte avek Komite Defans Lasanble Nasyonal parey Lalwa i demande. Sa enn desizyon osi, Prezidan in bezwen kennsel e refer ankor anba Lalwa.

La Minister Ledikasyon in pran de desizyon, ki osi pa ti dan promes 100 zour, ki Gouvernman pou aret sa laranzman kot etidyan Praslin e La Digue ti pou kapab fer zot *A Levels* dan lekol *Vijay International* Baie Ste Anne, e ki sa manda seve ki ti'n ganny etabli par Ladministrasyon *LDS* swivan en Mosyon ki Lasanble Lazenés ti anmennen e pase pe kennsel.

Toulezour nou tann sa Gouvernman pe koz lo lazenes, program par isi, program par laba pou lazenes. Be ler en desizyon ki konsern lazenes, e ki paran e etidyan ti war konman en bon keksoz pou ganny sanze, zot pa konsilte sa lazenes. Se sa

zot vizyon pou lazenes mon bann zanmi? Si wi, dir nou e aret kasyet deryer baravan konsiltasyon ki pa zanmen arive.

Tousala i montre nou en ladministrasyon Madanm Speaker, ki napa okenn lentansyon konsilte. Parti US in toultan en parti dominè, en parti ki krwar ki zis li ki konnen, ki koz zoli parol epi fer tou le kontrè.

Anba sa Gouvernman Leta nou nasyon i kritik, Madanm Speaker, *the process cannot be trusted*. Leta nou nasyon, Madanm Speaker, se ki nou annan en Gouvernman ki enterfer avek travay lezot brans Gouvernman e ki pa respektè lespas ki konstitisyon in mete ant sa trwa brans.

Mon fek dir ki Prezidan pa'n konsilte Komite Defans Lasanble avan i ti apwènt en nouvo dirizan pou Servis Lentelizans pei. Sa ti enn. Me i pa aret la.

Le 31 Desann in fer li ankor. In fer sorti en *S.I* kot in apwènt en *Board of Enquiry* ki pe al fer lanket dan en kes ki pe ganny Zize devan Lakour avek lentansyon ed bann akize avek zot defans.

In menm servi langaz mersener pou dekrir serten dimoun ki'n al fouy lakaz sa lakize. Sa ti en lenterferans direk avek en *case* ki pe ganny zize par Sef Ziz e in annan

rezilta ki *case* in bezwen sispann pou les sa lanket fer son travay, e ki Sef Ziz in bezwen met gardfou pou fer ki rezilta sa lenvestigasyon pa enterfer avek sa *case* ki li i pe Zize.

Pa fini la, Prezidan Herminie li menm, i mont lo televizyon pou dir ki in pardonn de prizonnyen akòz li Prezidan, ki pa ni en Avoka, ni en Ziz, in trouve ki en lenzistis grav in ganny komet kont sa de lakize.

Les akote ki lapolis in war levidans kont sa de dimoun, ki *Attorney Zeneral* in satisfè ki ti annan en *case* pou pourswiv, ki Ziz in kondann sa de dimoun lo levidans ki'n sorti Ankour, e ki Lakourdapel pa'n war okenn merit dan zot rapel. Met tousala de kote. Dokter Patrick Herminie li in konstate ki en lenzistis in ganny komet alor sa de dimoun ti merit ganny en pardon.

Be dan sa ka Madanm Speaker, annou frenm Lafors Lapolis, annou frenm Biro *Attorney Zeneral*, annou frenm Lakour. Les *State House* deside lekel ki koupab e lekel ki inosan, dan sa fason pei ava sov en kantite larzan pou nou kapab fer lakaz, lekòl, klinik ouswa fer desann laz pansyon pou ariv 50an.

Me pa fini la Madanm Speaker, Prezidan Herminie ti

promet en lenvestigasyon lo lotel Assumption byen, in apwent en Komisyon Lanket dan sa zafer byen. In oule al vizit sa zil pou war sa ki pe arive laba pou li menm. Devan Lakour Konstitisyonnèl *Friends of Aldabra* in met Gouvernman Ankour pou fer aret sa proze.

Savedir ki *Friends of Aldabra* ti pe met presyon lo sa proze. Me ki nou war ler Prezidan Herminie fer ler i mont lo zil? I amenn sa menm *Friends of Aldabra* avek li e an plis ki sa i abiy dan enn zot triko. Savedir, i pe anvoy en mesaz avek Lakour Konstitisyonnèl e Komisyoner Twomey-Woods ki li i pe pran kote *Friends of Aldabra*.

La yer nou'n aprann ki *taskforce* lo Assumption in pran serten desizyon ki enpakte direktman lo sa ki travay ki sa Komisyon Lanket pe fer. Sa i non selman *undermind* travay sa Komisyon me i en lenterferans direk kont Lakour e kont Komisyon Lanket.

Me pa fini la, Madanm Speaker. Prezidan Herminie li menm in anonse dan son diskour isi dan sa Lasanble semenn pase ki son Gouvernman pe anvizaje annan reform dan sistenm lazistis kriminel dan nou pei. I kler ki sa ki i anvi. I demann Seselwa pou *trust the process*,

me li menm li i pa *trust the process* e les lapolis, Biro *Attorney Zeneral* e Lakour deside lekel ki'n kas Lalwa.

I le ki li i annan kontrol lo sa *process*, son bann aksyon dan sa direksyon dan sa premye 100 zour i montre nou klerman ki lapant ki i anvi pran. Leta nou nasyon anba sa Gouvernman i kritik Madanm Speaker, *the process cannot be trusted*.

Leta nou nasyon Madanm Speaker, se ki nou annan en Gouvernman ki sakrifye lekselans pou lavites, ki sakrifye konpetans pou lwayote.

Sa ki nou'n war depi eleksyon se en Gouvernman ki pe tay dan tou direksyon. Lo en kote Prezidan Herminie in pran en bann letan pou li met en Gouvernman an plas.

Se konmsi zot pa ti pe ekspekte ki zot ti pour ranport sa eleksyon epi zot in tay partou pou rod dimoun pou vin Minis, enkli Madanm Bernstein – (Bernstein eskiz mwan) - ki li son telefonn in sonnen ler i ti lo vakans apre ki son lezot bann koleg ti'n fini ganny zot non soumet avek sa Lasanble.

Me lo lot kote, nou'n war en ladministrasyon *in a hurry*. An-vites pou akonpli zot promes 100 zour, me osi an vites mon fer krwar ki zot pe travay. E dan sa travay vit, zot

fer fot. Mon'n mansyonn sa fame direktiv pou gard trafik pa al lo *scene* en aksidan, ki ti senpleman en manev pou esey demontre avek lepep ki sa Gouvernman pe travay me ki in *fail*.

Vis-Prezidan li in vin devan Lasanble Nasyonal avek en seri Lalwa pou retourn trezyenm mwan, pou sanz Lalwa *Hate Speech* e Deklarasyon Byen e retourn zot kot nou ti ete oparavan.

Sa i normal diferan Gouvernman i annan diferan Polisi. Me, dan zot lavites, zot in mank loportinite pou fer ki sa Lalwa ti pou kapab pli bon ankò, si zis zot ti'n pran en pti letan pou perfeksyonn li.

Par egzanp, zot ti'n kapab trouv en mekanizm pou asire ki dan zafer trezyenm mwan napa disatisfaksyon ant travayer ki prodwi ek sa ki trenn lipye. Zot pa'n trouv en solisyon a sa problem reel avek lefe ki bokou dimoun ki zot ti krwar ki zot ti pe al fer kontan i pa kontan akòz zot zefor ekstra pa pe ganny valorize.

Dan ka Deklarasyon Byen par bann Minis, Ziz e politisyen, zot in bliye, parey mon ti'n fer zot rapel an Avril 2025, pou fer ki tou *partner* ler en zofisye pa'n marye i osi deklar zot byen akòz sansan sa Lalwa i diskriminatwar kont bann dimoun ki marye.

Epi zot ti annan en sans pou fer ki Deklarasyon Byen pa fer dan lanvlop me ki i vin piblik.

Dan zot lavites, ouswa dan zot fer krwar zot pe travay ler tou sa ki zot pe fer se *cut and paste*, zot pa'n fer. Se pou sa rezon ki mon ti dir, e mon repete, ki dan sanmenm sa term Lasanble mon pou amenn en Proze Lalwa pou koriz sa mankman e pou fer ki tou politisyen, depi Prezidan an desandan, i bezwen deklar nou byen, e sa ki pou nou *spouse* ouswa *partner*.

Me plis ki sa, ki sa deklarasyon i vin piblik pou ki tou dimoun a konnen sa ki zot dirizan i annan e sa ki zot napa.

(APPLAUSE)

HON BERNARD GEORGES

Lo nou kote lata nou pa per nou Madanm Speaker. Nou fer nou deklarasyon nou. Se zot lot kote ki annan labitid pa fer sa ki pou zot.

(APPLAUSE)

HON BERNARD GEORGES

Fer keksoz vit nou'n war le konsekans, revwar sa deklarasyon gard trafik lo aksidan, revwar lapwentman Direkter Servis Lentelizans, fer ki Sef Ziz i bezwen pran lo li menm pou met en limit avek sa Bord Lanket dan Lenportasyon Zarm. Zot ti apel

nou en Gouvernman kanmaron, ozordi mon bann zanmi lekel ki pe fer aryer toulezour?

Anba sa Gouvernman Madanm Speaker, Leta nou nasyon i kritik, *the process cannot be trusted*. Leta nou nasyon, Madanm Speaker, se ki nou annan en Gouvernman ki pe retourn nou pei dan en *welfare state*. Nou'n war sa depi zot promes eleksyon kot en seri larzan ti ganny donnen.

Trezyenm mwan san kondisyon, kart *STC*, *URS*, *long service*, retourn laz pansyon sekirite 63an, fer monte pansyon retret pou ariv R10mil, *triple lock*. Tousala sete bann *handouts*. Okenn reform striktirel pa'n ganny planifye zis nou a donn zot.

Nou ti dir ki sa bann promes pou kout pei tro bokou e nou ti annan rezon Madanm Speaker. La ki Bidze 2026 fek sorti nou war ki Bidze an gro in redwir, me ki alokasyon pour Lazans Proteksyon Sosyal in ogmante par 50 poursan, mon dir wi 50 poursan pou sorti par lao R1 bilyon pou ariv R1.65 bilyon.

An plis ki sa, la zot pe al fer desann pri bis e konmsi sa pa ti ase, konpansasyon *TRNUC* osi pe al ganny met lo ledò *taxpayers*- R20 milyon an 2026, sepa konbyen ankor sa bann lannen ki pe vini. Mon

fer en parantez la pou dir ki sa enn zot pou pey zot menm.

Pa kont lo nou pou fer pase sa bout Bidze, ni lo okenn Seselwa pou pey pou zot atosite. Zot ava servi larzan Maison Du Peuple e sa ta milyon ki zot in gannye dan lavant later pou pey pour zot fot. Pa kont lo Seselwa pou vin ed zot dan sa zafer.

Konmsi sa pa ti ase, larzan pou bezwen al rode pou pey saler sa 14 Minis ek zot ekstravagans vwayaz, la Madanm Speaker, 7 Minis dan 14 pe al vwayaze avek Prezidan sa semenn. Se zis Vis-Prezidan avek en lanmwatye tim ki reste lo laplenn.

Loto nef, menm *make-up* nou tande ki Minis i ganny fer *State House* konmela. Larzan pou bezwen al rode pou sibvansyon *SPTC* akòz sa rediksyon dan pri bis ki'n anonse, e larzan pou bezwen al trouve pou pey konpansasyon viktim *TRNUC*. Tousala pou mor lo ledò travayer Seselwa.

An mezir ki sa bann depans pe akimile, Prezidan Herminie pa'n donn en sou detay lo ki mannyer son Gouvernman in antisipe grandi lekonomi pou pey sa bann lekstravagans.

En mo pa'n ganny dir lo okenn Proze Kapital par envestiser etranze. En mo pa'n

ganny dir lo si pou annan okenn logmantasyon lo taks, si pou annan plis touris, si negosyasyon lo Lakor Lapes avek Linyon Eropeen pou amenn plis larzan dan kof leta.

En mo pa'n ganny dir lo kote *saving* pou ganny fer, kote Bidze pou ganny koupe pou asir tou sa depans ki zot in promet. Sa dernyen eleksyon in montre nou diferans ant vizyon lonterm pou en pep e benefis kour term pou detrwa.

Pou sa ki annan 63an, pou sa ki'n kondannen pou drog, pou sa ki pe esper ganny zize. *For the few* Madanm Speaker *not the many*.

(APPLAUSE)

HON BERNARD GEORGES

US in zwe lo febles dimoun, dimoun in reponn avek zot vot. E la prezan, se sa bann menm dimoun ki'n vot pou US, e tou sa ki pa'n vot pou zot, sakenn parmi zot lo zot kote latab, e sakenn parmi nou lo sa kote, atraver nou larzan taks – ki pe al peye pou sa bann benefis ki US in promote – (eskiz mwan) pour peye pour sa bann ki US in promote e sa pake Sekreter D'Eta ki zot in al apwente.

La kot LDS ti ofer nou popilasyon lendepandans personnel e responsabilite endividyel, US pe retourn nou

dan en sistenm depandans lo Leta, lo sa parti ki o pouvwat. Regard sa zafer seve bann etidyan. Olye les sak paran ek sak zafan pran son responsabilite pour son *grooming*, la nou Gouvernman pe dikte sa ki zafan i devret fer e pa fer.

La nou pe retourn Madanm Speaker, dan sistenm parti inik, fer sa ki mon dir ou fer pa kestyonn mwan. Pa fini la, Madanm Speaker. La Prezidan in anonse ki pres R60 milyon pe al ganny *write off* lo *loan* ki dimoun in pran avek Labank Devlopman. En soulazman pou sa ki'n vremen bite e nepli kapab peye i byen.

Me 60 milyon? E lekel sa bann dimoun ki pe al benefisye? Ki mannyer ki zot pou eksplik avek sa pti dimoun ki li in transpire, in ser sang, in travay pou li pey son *loan* avek bokou difikilte in arive fer li, ki la i pou aprann ki son vwazen ki li pa'n annan sa sans responsabilite pou pey sa ki pou li, pou li pe al ganny *write off*, i pe al ganny en *free pass*. Ki mannyer zot pou al eksplik sa avek sa bann dimoun?

Sa se menm fenomenn ki sa zafer trezyenn mwan pou tou dimoun, sa ki travay e sa ki trenn lipye. E lekel, si nou bann *taxpayers*, lo sa kote latab, me osi zot lo zot kote

latab ki pe al peye pour sa lepokase ?

Safety net i nesaser e i devret en lasistans tou dilon en vwayaz ant nesans e lanmor en endividi ler i tombe. I pa devret vin en destinasyon, parey *US* in fer. Akoz sa pa ankouraz devlopman en imen e devlopman en pep. I dekouraz linovasyon, i dekouraz travay dir, i dekouraz responsablite endividyel.

Problenm, malerezman Madanm Speaker i al pli lwen. Non selman nou pa'n ganny okenn detay lo *foreign direct investment*, akoz i kler pou napa, me Prezidan in anonse ki finansman in fini gannyen pou en lopital, en vilaz reabilitasyon e en lekol vokasyonnel.

I pa'n dir lekel ki pe al finans sa trwa proze me nou kapab konpran ki Lenn, Lasin e kekfw Larisi pou parmi bann pei ki pou donn larzan pou sa bann proze. Kestyon se, ki nou'n promet sa bann pei an retour pou zot larzan ? Sa Prezidan Herminie i reste trankil lo la.

Sa Madanm Speaker, se *play book SPUP/SPPF*. Donn dimoun larzan, fer zot kontan epi fer zot krwar ki zot in ganny met osant devlopman. Epi pran larzan avek pei zanmi pou bann gro, gro proze. Sa i en politik ki marse. I gard zot

o pouvwar. Me antretan lekonomi i frazilize, valer Roup i desann, pei i vin pli pov e pli depandan lo lezot pei.

Nou rezilyans konman en nasyon lib e endepandan i ganny frazilize. Nou'n war sa film deza e son dezyenm parti ki'n konmanse an Oktob 2025 pa pou diferan. Zot in fer tou pou zot ariv o pouvwar, epi zot pou fer tou pou zot reste o pouvwar. *Welfare* ek depandans nou konnen sa se zot baton mazik.

Anba sa Gouvernman Madanm Speaker, Leta sa nasyon i kritik, *the process cannot be trusted*.

(APPLAUSE)

HON BERNARD GEORGES

Leta nou nasyon, Madanm Speaker, se ki ozordi i tris pou viv dan nou pei. Ler en Gouvernman i ariv o pouvwar epi i fer en *rally* laviktwar e ranpli zis en kar laplenn *Gordon Square*, ou konnen ki i dan problenm. Ou konnen ki dimoun in konmans regret zot vot byen boner.

I tris pou dir, me se la kot nou pei i trouv li ozordi. E en gran parti i annan pou fer akoz nou annan en Prezidan ki koz parol linite me ki annan en leker vanzans. Toulezour nou tann zis lanket dan sa ki'n pase.

La dan Diskour SONA Prezidan in anons ankor 5, pou azout avek sa 2 ki'n konmanse e sa enn pou CCCL ki li in *stall*. Pou annan lanket dan swadizan *unit* Ibou, dan rayot prizon, malgre ki Konmisyon Drwa Imen i deza pe fer en lanket dan sa zafer, dan *Travizory*, e en lodit dan *Warehouse STC*.

Tousala i annan en sel bi, rod en fason pou denigre Prezidan Ramkalawan e redwir sikse remarkab e eksepsyonnel ki Ladministrasyon LDS in fer.

Prezidan Herminie i konnen ki son ladministrasyon pa pou kapab akonpli en kar sa ki LDS in akonplir. Alor, olye donn son kouraz pou fer sa ki i kapab, i prefere esey redwir e detri sa ki son predeseler in fer e met sa an dout. Napa okenn lot rezon pou fer tousala.

Par kont, lenvestigasyon ki devret ganny fer pa'n ganny anonse. Seselwa ti pou byen kontan konnen ki sa *agreement* ki Minis Barry Faure ti sinyen avek Gouvernman Lenn pour en Baz Militer Assumption.

E dan lakonpannyen 2020 ki ti'n sipoze fini an 2020, Ile Soleil me ki 6an pli tar pa ankor ni ariv lanmwatye e ki pli gro parti zil in fini ganny donneren avek konsiltan sa proze kot i pe fer en lotel.

Seselwa ti pou byen kontan annan en lanket dan aköz Prezidan Herminie i krwar ki en lenzistis in ganny komet dan sa *case* bonm lo Stasyon SEYPEC Grand Anse Mahe. Epi lo gaz kot Palais des Justice, kot destriksyon stati Katedral Imakile, dan dife anler Mission Lodge, dan bis SPTC, dan lasenn ton.

Seselwa ti a konnen, ti a kontan annan en lanket lo *syndicate*. Lala Madanm Speaker, detrwa lanket ki ti pou enteres Seselwa. O kontrè, olye lanket, sa ki responsab in vin Minis ouswa i ganny large dan prizon.

Leta nou nasyon anba sa Gouvernman Madanm Speaker i kritik, *the process cannot be trusted*.

(APPLAUSE)

HON BERNARD GEORGES

Politik, Madanm Speaker, i pa en *zero-sum game*. En Gouvernman pa zanmen la pou touzour. E nou pei i reste en ki diviz an-de morso plizoumwen egal. Alor, sakenn sa de lafors politik i bezwen konsyan ki sipor i bouze e ki laviktwar i efemer.

Ozordi i mwan, demen i ou, ozordi ou ki la, demen mwan ki pou pran ou plas. Ni mazorite absolü, pa absolü parey Eleksyon 2015 ek 2025 in demontre. Annou dir en

keksoz kler, an term sipor, Gouvernman *US* pe asiz lo en razwar e zot pe anpandan avek en difil.

Pa zanmen bliye ki kantmenm zot in ariv o pouvwar, zot in ariv la avek siporter lezot parti ki zot ti bezwen demann prete. Dan sa Lasanble zot annan en mazorite nimerik, me zot pa'n kapab ganny ni 50poursan vot. Savedir i annan plis dimoun ki'n vot pou lezot kandida ki sa ki ti vot pou zot mon bann zanmi lo kote latab.

Sa si pa ti kandida endepandan Au Cap e Mont Buxton, sa Lasanble ti pou reflekte nou pei aköz i ti pou divize 17/17. Prezidan Herminie li in ganny elekte dan dezyenm *round* avek mwens vot ki Wavel Ramkalawan ti gannyen dan premye *round* an 2020. Sa se la realite nou pei Madanm Speaker.

Larealite se ki kantmenm *US* i annan plis vot ki *LDS*, *LDS* i touzour annan plis siporter ki *US*. Sa bann vot –

(laughter)

HON BERNARD GEORGES

Sa bann vot ki zot in gannyen pa tou ki pou zot. Wi, zot annan zot *core support*. Me zot in ariv o pouvwar avek lasistans dimoun ki pa zot siporter, ki ti pa kontan Wavel,

ki ti pe rod faver, ki ti pe rod zot gannyen. Par kont, sak vot ki *LDS* in gannyen li se en vot senser, en vot avek leker, en vot ki konte.

Mon dir tousala – mon dir tousala Madanm Speaker, pa pou denigre zot. Zot in ranport eleksyon. Sa i kler. Zot ki o pouvwar. Nou dan lopozisyon nou konnen sa. Non, mon dir sa pou fer nou tou rapel ki politik i dinamik. Sa ki anler i kapab desann, sa ki anba i kapab monte.

Mon dir sa bann parol pou mwan retourn lo tenm linite ki devret karakteriz nou nasyon dan san lannen zibile. Nou pei i beni Madanm Speaker. Nou annan en kantite keksoz pou nou fyer konman en nasyon.

E enn sa bann keksoz se lakonplisman Ladministrasyon *LDS* dan sa dernyen 5an. Lalis i long e letan pa permet mwan pas atraver tou sa ki'n ganny fer, depi *COVID*, reouvertir *Airport*, grandi nou lekonomi, ogmant rezerv dan Labank Santral, repar lenfrastruktir, konstri semen, por e fasilite lapas pou peser en pe partou, batir lozman.

La kot Prezidan Herminie pe rod etabli Komisyon Lanket, Prezidan Ramkalawan ti pe konstri e amenn lenvestisman etranze konman lokal dan pei. Zis lotel ki'n

ouver, repare ou rekonstri nou war *Canopy, Laila, Cheval Blanc, Ile Platte, Assomption, Melia, Reef, Fisherman's Cove, La Reserve*. Menm Les Mamelles nou'n ganny *Day Care* ki pe al ouver byento, trotwar, *bus shelter*, e la lakaz e *mid-range condo*.

Annefe, ler nou regard sa bann proze ki *US* pe koz lo la ozordi avek labous plen; enkli konblaz ki zot fek sinyen, tousala se bann proze *LDS* ki prezan zot pe reklanmen e pe esper pou koup riban.

(APPLAUSE)

HON BERNARD GEORGES

Me, an plis ki sa, *LDS* in montre Seselwa ki tou dimoun i annan en valer e en plas. I annan ki dir, ki se lide, 'Sesel Pou Tou Son Zanafan', ki rezon ki *LDS* in perdi eleksyon, ki nou ti'n devret met nou dimoun an premye parey zot *US* zot pe fer ozordi.

Kekfwa sa i vre, me en pei pa en yoyo ki balans en kote pou 5an e ki i balans en lot kote pou 5an. En pei i bezwen kontinite, stabilite e linite.

Dan sa sirkonstans, Wavel Ramkalawan in en *Leader* eksepsyonnel e 'Sesel Pou Tou Son Zanafan', ti en nesesite ki son ler pou retourn ankor. Akoz tou dimoun i bezwen konnen ki zot annan

zot valer e zot plas pou travay dan sa pei.

Wavel Ramkalawan Madanm Speaker, ti en *once in a generation leader*. Par lafors son personnalite ek vizyon ki i ti annan pou en Sesel normal, *rules-based*, avek respe pou tou sitwayen i ti amenn en lalit ki ti pran son parti avek 1500 vot dan premye eleksyon an 1993.

E atraver en seri lalit pou retourn demokrasi miltiparti Sesel, sanz paviyon e Lim Nasyonal, sanz non semen, retir 5 Zen e Zonm Lib, lager Ankour, sakrifye 5an politik lo lasenn nasyonal pou fer reform elektoral ki ti nesaser, atraver kas latet par gard bate, atraver kaso pou son siporter, atraver ganny son non tire lo lalis voter pou li pa kapab *stand* an 2020.

Atraver tousala, Wavel Ramkalawan in arive ranport en viktwar remarkab avek en mazorite absolli an 2020.

Personn pa parfe, e fot in ganny fer, me repons en senp kestyon i evidan. Eski *LDS* in kit Sesel dan en pli bon leta ki in zwenn li an 2020? Demann sa kestyon e reponn li zot menm.

Zis regard lafeksyon ki son siporter i annan pou li-regard laplenn Gordon Square avan eleksyon e konpar li avek lezot rali laviktwar apre eleksyon. Regard dernyen vizit

piblik *State House*, regard lafoul ki'n rasanble pou dir li orevwar ler i ti kit *State House*.

La mon oule adres en parol direk avek Prezidan Herminie dan mon kapasite konman *Leader* Lopozisyon dan Lasanble.

'Prezidan Herminie, *you won*, ou'n gannyen eleksyon, *savour the moment*, get devan, aret rod Wavel Ramkalawan. In senkyenm Prezidan Sesel li, in fini antre dan liv zistwar, son portre i lo miray *State House* e i pou o bor sa ki pou ou *forever, get used to it*. Ou annan en lanmen, olye servi sa lanmen pou donn lord partou kote pou denigre e kraz Prezidan Ramkalawan, ofer li ou lanmen konman en Prezidan anver en lot, donn li respe ki son Lofis Ansyen Prezidan i merite.

Elev li e sa ava elev ou osi dan lizye ou pep. Dan sa lannen zibile lor nou Lendepandans, montre ki ou osi ou kapab pran ou plas konman en dirizan pou tou Seselwa, spesyalman bann ki pa'n siport ou, ou ki ou pa kontan. Ler ou arive fer sa, la nou ava kapab deside si nou, nou pou *trust the process*'.

An atandan Madanm Speaker, parey Prezidan Herminie in fer, permet mwan konklir mon repons par retourn lo tenm 50an nou Lendepandans konman en

nasyon. Eleksyon in fini, lavi in retourn annord, plis ki zanmen, Sesel i bezwen tou son zanfana.

Politik partizan pou kontinyen diviz nou pei an de parey in leka depi 1964. Nou bezwen viv avek sa larealite. Yer, nou ki ti ansarz, ozordi zot ki pe *rule border*.

Demen nou pa konnen lekel ki pou la. Me, Sesel pou reste Sesel e nou pou *still* Seselwa avan ki nou *US*ouswa *LDS*. Nou pei i bezwen en sosyete pli realistik ki marse, en lespas piblik ki lib e ouver, en lekonomi ki amenn prosperite pou tou ; dan en fason kot larises i ganny partaze plizoumwen egalman.

En demokrasi ki protez sa ki pli feb e garanti respe pou drwa sitwayen, e en ladministrasyon ki get lwen e ki prepar pou lavenir.

Sa lannen zibile ki nou ladan i donn nou en loportinite rar e eksepsyonnel pou zwenn ansanm e selebre nou 'Linite dan Diversite' parey nou moto Lasanble i demann nou, e pou koste Seselwa parey nou Lim Nasyonal i egzize.

Parey mon'n demann Prezidan Herminie fer anver Prezidan Ramkalawan. Les mwan demann nou dan Lasanble etann nou lanmen *across the aisle* e demann sak Seselwa pou met politik de kote e donn lanmen kanmarad

pou ki ansanm, konman en sel nasyon, nou a kapab fer Sesel pli for e pli zoli. Mersi Madanm Speaker.

MADAM SPEAKER

Onorab Lemiel.

MADAM SPEAKER

Onorab Lemiel.

HON SYLVANNE LEMIEL

Mersi Madanm Speaker. Koleg Manm Onorab. Tou dimoun a lekout espesyalman zabitan Anse Royale, bonzour.

Madanm Speaker, pour premye fwa dan 5an Lepep Seselwa in finalman ekout son Prezidan delivre en vre Diskour lo Leta nou nasyon.

(APPLAUSE)

HON SYLVANNE LEMIEL

Apré 5an. Apré 5an ki nou'n ekout bann lektir e sèman pour 2erdtan isi dan sa Lasanble, Mardi le 27 Zanvye 2026, Prezidan Patrick Herminie, in delivre en vre Diskour Leta nou nasyon dan mwen ki 45 minit.

En SONA, ki bokou Seselwa in dekrir koman enn sa pli bon diskour lo Leta nou nasyon ki'n deza ganny delivre.

Nou Prezidan, in delivre ek Lepep Seselwa en SONA ki ranpli ek lespwar, konviksyon

pour ou sa zenn oubyen sa dimoun aze. En SONA ki annan, e osi demontre direktiv pozitiv kot nou pep i bezwen arive.

Avan mon tous lo bann pwen for Diskour Prezidan Herminie, e ki sa i vèdir pour nasyon Seselwa. Mon oule zis dir ki lentervansyon Onorab Georges, bomaten pa devret sirprann personn.

Leader Lopozisyon, dan Lasanble Nasyonal in montre en sel keksoz e sa i tre kler, i pli enterese ek leta Mr Wavel Ramkalawan.

(APPLAUSE)

HON SYLVANNE LEMIEL

Ki leta nasyon Seselwa. Bomaten nou'n ekout diskour lo leta *bodyguard*, leta loto, leta 5enm lofis tou i ti kapab vin ladan, lo leta ras zarm *bodyguard and so on*.

Madanm Speaker, in osi koz lo efas listwar. Nou, nou pe sey efas listwar ki par egzanp Prezidan Ramkalawan, zis dan sa pti 5an in fer.

Me mon ti a kontan dir Madanm Speaker, atraver ou. Nou pa pe efas listwar nou Madanm Speaker, listwar pa propriyete *LDS*, listwar se Seselwa ki deside, e Seselwa in dir klerman dan dernyen eleksyon ki sa semen ki zot ti pe anmenn Sesel, pa ti pe

anmenn Sesel, pa ti pou dan zentere Lepep Seselwa.

E Lepep Seselwa in deside pou ekri son prop listwar e zot, zot bezwen viv ek sa. Madanm Speaker, ozordi bomaten atraver mon diskour, mon le eksplik Lepep Seselwa diferans ant Gouvernman Prezidan Patrick Herminie, e sa Gouvernman ki ti egziste anba Mr Ramkalawan.

Mon le montre diferans ant Polisi *US*, e Polisi *LDS*. E mon le montre Lepep Seselwa ki anba gidans Prezidan Herminie, kote ki *US* i le anmenn nou pei.

Onorab Georges, in koz en pe mon kapab dir in sanble lo lekonmi, aköz tou sa bann pwen ki'n nonmen petet i pe mazin kote pou annan larzan pour nou fer tousala.

E Madanm Speaker, si nou kapab fer en analiz lo leta nou lekonmi, i vre ki nou lekonmi i stab, i vre ki rezerv i stab, i vre ki Lendistri Tourizm in byen performen, i vre ki lo papye tou i zoli.

Me premyerman eski Onorab Georges, i bliye ki lekonmi Sesel ti stab an 2020? Ki ler Prezidan Faure, ti kit lofis ki kof ti plen malgre bann fo deklarasyon Mr Ramkalawan?

Ki kof vid e kales kase, ki zot ti'n erite enn bann lekonmi pli performan dan larezyon. Se ki sa i rezon

prensipal Madanm Speaker, aköz ki ansyen ladministrasyon in nobou absorb lenpak lekonmi kriz *COVID*?

Ki Sesel an 2020 ti lo larout pour pli gran krwasans ekonomik dan nou listwar avan *COVID*? Realite Madanm Speaker, i ki Prezidan Faure, avek en Gouvernman *US* ti kit Sesel avek en lekonmi solid an 2020, e se sa ki *LDS* ti erite.

Dezyenmman Onorab Georges, petet i kapab mazin lo kote rezerv, si nou annan sa larzan dan rezerv. Me sa larzan ki dan rezerv i prodwi zefor Lepep Seselwa, i rezilta travay dir pep Seselwa.

I rezilta sakrifis ki bann lakour in fer, fardo ki lepep in anmenn pour ki ansanm nou'n sirmont lenpak *COVID*, e sa i anmenn mwan lo mon trwazyenm pwen.

Sa lekonmi ek rezerv ki Onorab Georges, petet i koz lo la i stab li. Me parey Prezidan Herminie, in dir, "i demontre dan son diskour sa lekonmi i stab i lo papye." Nou vwar zoli sif gro, gro sif.

Me Madanm Speaker, Seselwa pa reste dan rezerv Labank Santral, Seselwa pa manz papye, Seselwa pa pey *bill* avek rapor finansyel, Realite ki anba *LDS* Seselwa pa'n benefisye. O Kontrer, Seselwa in vin pli mizer.

(APPLAUSE)

HON SYVLVANNE LEMIEL

E Onorab Georges, e *LDS* pa ankor konpran sa oubyen zot pa anvi konpran gro difikilte ki'n egziste dan sa pei pour sa dernyen 5an. Akoz *LDS* pa enterese avek byennet mazorite Seselwa ki viv en lavi ordiner, e ki pe *struggle* anba zot bann polisi kapitalis e liberal.

Madanm Speaker, pandan sa dernyen 5an Seselwa in war pour zot menm ki kalite polisi ekonomik ki *LDS* ti vin avek, olye met larzan dan pos Seselwa parey zot ti promet *LDS* ti pe trangle Lepep Seselwa.

Zot filozofi ekonomik ki Seselwa in rezete apre zis 5an i baze lo en model devlopman ki'n *fail*, si Seselwa pa konpran kisisa en model ekonomik liberal, e kapitalis annou zis get sa dernyen 5an anba *LDS*.

Larises in ganny kree. Wi, lekonomi in grandi, wi i vre. E rezerv in ogmante. Me parey nou'n war e parey nou war dan tou bann pei ki enplimant sa kalite polisi ekonomik, larises pa *trickle down* parey zot fer nou krwar.

Non, Madanm Speaker! Larises pa desann kot bann ki anba, kot gran mazorite dimoun ki dan bezwen i pe viv.

O kontrer, larises i reste anler e bann ki anler "*the few, not the many*" i vin pli ris Onorab Georges.

Eski ki dimoun la deor i konnen, ki 10poursan popilasyon lemonn bann ki anler i posed 75poursan larises global?

Annou pran en senp legzanp pou met sa an konteks Madanm Speaker. Si lekonomi ti vin - si lemonn ti servi Roup sa i vedir lo sak R100 ki dan sirkilasyon, R75 i dan lanmen sa pti group, larestan dimoun 90poursan popilasyon global i viv zis lo R25.

Se sa kalite sistenm ekonomik ki *LDS* in pratike pour 5an Sesel, e son rezilta i evidan dan soufrans mazorite sa pep ki trimouse zis pou manze.

Madanm Speaker, anba sa menm sistenm 50poursan popilasyon lemonn lanmwatye dimoun i posed 2poursan larises global.

Ankor annou servi Roup koman legzanp, sa i vedir ki lo sak R100 lanmwatye popilasyon i viv lo zis R2. Pour bann ki pa konpran ki *US* pe koz lo la ler nou dir "*for the many, not the few.*"

Sa i sa realite ki egziste dan lemonn ozordi Madanm Speaker. En sistenm ekonomik ki eksplwat travayer, ki olye partaz larises

zot sere, e zis en bann ki kontinyen benefisye.

Tandis ki mazorite dimoun i bezwen travay plis, sakrifye plis, e andet zot plis pou manze. Me olye dir 'non, sa pa normal', *LDS* in adopte sa filozofi ekonomik koman en palto fann deryer, e enpoz li lo nou pep.

Ozordi dan lemonn, e dan Sesel i annan en realite ki bokou dimoun i inyore, i annan ase larzan pou elimin lapovrete.

Larises in ganny kree, i la e pe kontinyelman ganny kree, se sa ki Gouvernman o pouvwar pe fer e pou fer. Le kontrèr avek sa Gouvernman avan ki ti refize partaze, sa i apel vorasite.

Mon pa pe koz lo lasarite Madanm Speaker, mon pe koz lo distribisyon larises dan en fason ki ekitab, e ki zis. Ozordi dan serten bann pei pli ris o monn nou war pli gran dekalaz ekonomik ki'n deza egziste ant sa ki annan bann bilyonner, e mazorite ki vin pli pov.

Madanm Speaker, lo papye larzan i la li me leta ekonomik nasyon Seselwa sa dernyen 5an, anba sistenm liberal, kapitalis *LDS*, pa reflekte sa realite.

E ki nou war? Plis inegalite, e plis lenzistis sosyal kot mazorite dimoun in forse viv dizour a lannmen. E ozordi

Onorab Georges, i le fer nou krwar ki zot ti pe byen zer nou lekonomi.

Kestyon Madanm Speaker, i pour ki? Pour ki, ki zot ti pe zer sa lekonomi? *For the many, or the few?* Larepons i senp. *For the few.* Akoz *the many*, mazorite Lepep Seselwa in met zot deor.

Madanm Speaker, bann kalite kestyon parey lo kote larzan nou pe al donn plis *allowance whatever*, sa bann kalite kestyon i pa drol sa sorti kot *LDS*, aköz pour zot larzan ki vin premye, e Seselwa i vin dezyenm.

Me Prezidan, in koz lo lantrepriz e loportinite lokal, nouvo fason fer e nouvo *mindset*. Ozordi i 2026, e non pa 1980 mon koleg Onorab Georges.

Si ou le fer larzan, si ou le agrandi ou lekonomi, ou bezwen envestir dan ledikasyon dan *STEM Education*. Parey Prezidan, in dir lasyans, teknolozi, domenn enzenyer, e matematik, se sa fason ki ou kree en lafors travayer ki pli prodiktiv e pli inovativ.

Larzan Madanm Speaker, pou ganny kree ler nou sipòrt lantrepriz, donn Seselwa akse avek later, e finansman, loportinite, e sipor.

Larzan Madanm Speaker, pou ganny kree

atraver inovasyon e kreativite nou bann zenn. Wi, nou pou “*trust the process*”.

(APPLAUSE)

HON SYLVANNE LEMIEL

Me nou osi “*trust* nou lazenes.” E se dan sa, e se dan zot ki sa Gouvernman pe investir, mon konstate apre ki mon’n ekout Prezidan Herminie, ki sa Gouvernman pe zwe sa vre rol fasiliter, e donn lespas e mwayen sektè prive pou vin moter nou lekonmi.

Anba LDS Gouvernman ti pe zwe rol banker, zot ti pe diriz Sesel parey en biznes, zot ti pe regard profi e zis bann sif.

Me Sesel pa en biznes. En rol, e rol Gouvernman pa vin fer profi e ogmant rezerv lo ledò malere. Se sa diferans ant Prezidan Herminie, e ansyen Prezidan.

Madanm Speaker, Prezidan, in osi koz lo rol *digitalisation* dan nou lekonmi. Enn bann pilye nou manifesto, mon kontan pou vwar ki Gouvernman US pe servi teknolozi pou fer lavi Seselwa pli senp, pli efikas, e pli abòdab.

Mon siport Prezidan, akòz nou bezwen sezi bann lopòrtinite ki teknolozi ek lentelizans artifisyel oubyen AI pe anmenn ozòrdi.

Dan *United Seychelles* nou serye, nou responsab, e

nou rekonnet benefis ki teknolozi i kapab anmennen dan nou lekonmi.

Dan plas servi *AI online* zis pou fer simagri, denigre zot prosen nou dan US nou krwar dan servi teknolozi pou ed sektè prive e pti biznes *operate* dan en lanvironnman ekonomik ki azour, e ki pa konplike.

Nou bi se pa permet zot pli byen servi zot letan, nou bi se pou permet zot pli byen servi zot letan, grandi, kree lanplwa, e donn bann konsonmater en pli bon servis e prodwi.

Kan sa i arive Madanm Speaker, se lekonmi antye ki grandi. E alor *digitalisation* i enn bann pwen for Diskour Prezidan, ki pou permet nou lekonmi vin pli solid ankòr.

Mon felisit Prezidan Herminie, pou met lanfaz lo sa size, akòz bann lenvestisman teknolozi ozòrdi i sitan rapid ki nou pa kapab *afford* pou ganny kit deryer.

Mon kontan war bann lenvestisman dan ledikasyon pou kree konnesans, e kapasite dan nou bann zenn pour ki zot kapab pran labar sa lekonmi modern ki pe ganny kree.

Madanm Speaker, nou pa kapab tret en lekonmi an izolasyon zis nou rezerv, *GDP*. Me nou bezwen annan en plan serye kote nou anvi ale, nou

bezwen vwar bann diferan mayon nou lekonomi, e ranforsi bann koneksyon pour ki nou lekonomi i adapte avek bann nouvo defi an menm tan ki reste konpetitif.

Prezidan, in koz lo koripsyon dan sa dernyen 5an. E ler Onorab Georges, i demande kote petet nou pou ganny larzan, mon oule zis dir li ki si koman en nasyon nou reisi elimin koripsyon dan sa pei, nou pou anmas plis larzan *tax* ki pou ed nou soutenir bann program ki benefisye lepep.

Madanm Speaker, ler Onorab Georges, i koz labous plen i bliye ki se nou parti ki'n diriz sa pei ver lendepondans, e ki'n met fondasyon pour sa lekonomi modern e ki zot, zot ti erite an 2020.

Se nou parti depi lendepondans ki'n diriz nou lekonomi atraver botan, e movetan. E toultan, toultan mon repete nou'n met lentere e dinyite Lepep Seselwa an premye.

Mwan napa okenn dout dan vizyon Prezidan Herminie, e dan konpetans nou bann profesyonnel pou delivre, mon asire ki ansanm nou pou travay pour Lendistri Touris vin pli prodiktiv, e ofer plis kalite pour ki plis reveni i reste dan nou lekonomi.

Mon konfidan ki nou kapab agrandi nou Lekonomi

Ble atraver plis diversifikasyon, ki bann reform dan Sekter Lagrikiltir pou siport bann fermye, e prodikter lokal pour ki nou prodwi - pour ki nou redwi nou depandans lo lenportasyon.

Alor Madanm Speaker, ler mon pe tann Onorab Georges, pe mazine kote nou pou ganny larzan pour tou sa bann mezir ki Prezidan Herminie, in anonse e akonplir dan son premye 100 zour, mon le dir li ki Gouvernman *United Seychelles* i annan en plan ekonomik tre solid; ki annan pou bi pa zis gard nou lekonomi stab, me permet li grandi. Zot annan zot zis pou *"trust the process."*

(APPLAUSE)

HON SYLVANNE LEMIEL

Par kont, mon oule osi adres en keksoz ki relye avek nou lekonomi ki mon'n tande bann aktivis *online* zot pe koze. I paret mwan ozordi dan Sesel ki *LDS* i fer lapriyer pour nou lekonomi *fail*.

Olye rode ki mannyer nou kapab fer en keksoz, zot rod leskiz e rezon aköz nou pa kapab. Olye annan konfyans dan abilite nou lafors travayer,

e nou bann profesyonnel nou denigre nou prop frer e ser Seselwa.

Me sa kalite latitid malgre ki i regretab i ed Seselwa ankor konpran diferans dan ideoloji ekonomik Prezidan Herminie, e 5enm Prezidan Sesel.

I osi ed Seselwa konpran akoz ki zanmen Parti LDS ek son ideoloji i devret rebran sa pei ankor. Prezidan Herminie, ti baz son kanpanny lo en manifesto kler, "*for the many, not the few!*"

Lepep Seselwa ti elekte li pou enplimant sa bann polisi e program son manifesto, e zis dan son premye 100 zour nou'n vwar en seri mezir istorik ki Prezidan, in akonpli.

E Prezidan, e son tim pe kontinyen travay toulezour pou redres dega ki LDS ti fer dan fabrik sosyete nou nasyon.

Pour bann ki'n koz lo ouver tiyo oubyen nou fer Sesel vin en *welfare state* parey mon koleg Onorab Georges, in dir.

Apré ki pour 5an Seselwa in martirize, tiyo ti'n fermé lo Seselwa. Apré ki Lepep ti pe mor avek laswaf, si ler nou donn delo pou bwar zot apel sa ouver tiyo oubyen nou pe fer Sesel vin en *welfare state*, be LDS pa konpran bezwen sa pep.

Madanm Speaker, pandan sa dernyen 5an nou'n annan en Gouvernman

beavers ki ti pe diriz sa pei. Les mwan ekspliké.

Dan lanatir i annan bann pti zannimo, bann *beavers* ki reste dan larivyer. Sa bann kreatir i konstri zot labita par kree bann danm dan larivyer.

Me zot, zot fer sa ban blok delo dan larivyer, zot fer bann baraz oubyen avek bann brans dibwa, zerb, e labou pour ki delo i reste anler, sa i vedir ki napa sirkilasyon.

Madanm Speaker, se sa ki LDS ti'n fer Sesel. Zot ti'n zis koup delo, zot ti'n fermé tiyo lo Seselwa parey bann *beavers*. Ler zot, zot ti pe plonze, benyen, pran *sun tan* anler Seselwa anba ti pe viv dan en dezer e ti pe mor avek laswaf.

Se sa polisi ekonomik LDS, trangle sa bann ki anba tandis ki bann ki anler i viv dan lopilans. Madanm Speaker, Gouvernman dizour Prezidan Herminie, pa ti pou bezwen al re rod tou sa bann fason pour zot delarg lanmen Seselwa, e tir Seselwa dan sa mizer. Parey zot, zot in dekrir ouver tiyo.

Si pandan sa 5an zot ti diriz sa lekonmi avek en leker pour tou Seselwa, mon demann ankor. Eski LDS i realize konpran soufrans ki sa pep ti pe viv ladan?

Ler zot pe koz lo ekonomi stab e rezerv labank, eski zot konnen ki bann manman ti pe

swazir si pou pey *bill* elektrisite oubyen aste manze?

Akfer ou annan lekonmi stab e rezerv si ou popilasyon pe viv dan lapovrete? E la Madanm Speaker, mon krwar Lepep Seselwa i bezwen ganny sa tre kler.

I pa ki lekonmi ti pe mal fer, ou ki ti napa larzan. O kontrè Onorab Georges, i konnen e in dir nou lekonmi li men in ganny byen *manage* li anba zot bann LDS. Realite i ki Mr Ramkalawan, ler i ti Prezidan e ede par zot menm zot en bon pe zot ki ti la dan 7enm Lasanble avek zot mazorite absolli dan Lasanble Nasyonal, zot ti fer en swa tre kler.

Zot ti swazir deliberaman pou koup bann benefis e lasistans sosyal ki popilasyon ti bezwen, zot ti fer en swa pou ferm tiyo delo, zot pa'n fer nanryen pou fer pri lavi desann.

Deliberaman Madanm Speaker, e sa ki LDS ti swazir pou fer. Tou zot lavi zot in koz lo - tou zot lavi zot in koz lapovrete, en letan zot ti fer politik 40poursan lapovrete.

Me dan zot premye 100 zour ki zot ti fer? Zot ti ferm sa lazans *Poverty Alleviation*, zot ti koup *welfare*, zot ti ferm URS, e APDAR, zot ti met kondisyon lo trezyenm mwan saler, zot ti koup *long-service allowance* travayer.

Mon a les Seselwa zize pour zot menm, kote sa Gouvernman LDS ti pe anmenn zot e lo lot kote nou'n vwar kote larzan ti ale.

E sa Madanm Speaker, i diferans tre kler ant Prezidan Patrick Herminie, e Prezidan Ramkalawan, en diferans tre kler ant LDS, ek US.

Nou pa kapab dir Leta nou nasyon i stab tan ki Seselwa pe soufer. Prezidan, i fer tre kler ki bann mezir lamazorite ki'n ganny anonse, e ki'n deza an plas in target bann dimoun ki vreman bezwen sa kalite lasistans.

Lentrodiksyon kart STC, plis komodite lo lalis esansyel, rediksyon dan pri bis, sipor avek *childcare*, e logmantasyon dan sekirite sosyal, sa i bann mezir spesifik pou soutenir nou bann frer e ser pli vilnerab dan nou sosyete.

Sa pa ouver tiyo Madanm Speaker, sa se donn ou pep dinyite. Se retir dimoun lo zot zenou, e donn- e dir zot debout, e rapel zot ki zot osi zot annan en plas dan sa pei.

I enportan alor ki Seselwa i konn diferans ant LDS, e US. Akoz nou, nou swazir pou debout a kote, e avek lepep.

En lot mezir ki mon akeyir Madanm Speaker, i konsern to lentere ki labank pe sarze ozordi lo *loan*. Nou

tou nou konnen ozordi ki ler ou pran en *loan* avek bann labank, ki ler ou fini pey sa *loan* ou'n pey de fwa sa ki ou'n peye.

Mon swete ki bann negosyasyon i prodwi rezilta ki pou benefis nou popilasyon, ki pou benefisye nou popilasyon. E mon kontan war ki Gouvernman pou *write-off* wi, *write-off* serten *loan* spesifik la valer R59milyon. Ki mwan asire pou donn gran soulazman, e bokou fanmir Seselwa.

Sirtou en ler ou war bann ki'n al pran, ki'n al garanti lezot dimoun avek zot *loan*, e petet zot osi zot a form parti dan sa bann rediksyon ki zot ava gannyen.

Se sa diferans ant en Gouvernman *US*, e *LDS* kan Gouvernman i annan par dan en labank ou en lantrepriz bi se pa fer profi lo ledò malere. Me servi sa profi pour ed ou pep.

Tou sa bann mezir Madanm Speaker, i montre en Prezidan, ki annan son pep a ker, en Prezidan, ki pe rod solisyon malgre defi ki pe travay pou amelyor lavi son pep, en Prezidan, e son Gouvernman ki'n prezant bann mezir pou soulaz bann ki pe pli soufer. Me ki'n osi anmenn bann mezir prevansyon ki anpes dimoun tonm dan lapovrete.

I fer mwan fyer pou war en Prezidan, ki asire ki Seselwa i viv avek dinyite, kot i annan lazistis sosyal, kot larises i ganny distribye dan en fason ekitab e ki personn pa ganny kit deryer.

Mon kontan ki Prezidan Herminie, in osi rekonnet zefor travayer Seselwa, ki'n dir klerman ki tou dimoun i bezwen travay e kontribye, e ki nou pa kapab vin depandan lo *welfare*.

Seselwa dan son mazorite i travay dir, e ler ou valoriz son zefor, ler ou rekonpans li Seselwa i delivre. Mon felisit Prezidan, pou re donn nou bann travayer son trezyenm mwan saler, pou re donn zot, zot *long-service allowance*, pou re donn bann ki lo kontra servis piblik zot *performance allowance* ek zot gratwite anyel, e pou gard son promes pou fer desann laz pou ganny sekirite sosyal.

Me par kont pour bann ki - Madanm Speaker, letan nou pe koz lo laz Sekirite Sosyal i desann 63an nou vwar ki annan dimoun ki anvi kontinyen travay.

E nou, nou krwar ki nou dir par kont ki bann ki anvi petet kontinyen, e ki kapab kontinyen travay mon krwar ki nou Gouvernman in met an plas e ki annan bann mekanizm pou fasilite sa, e ankouraz zot kekfw; oubyen

menm entrodwi en nouvo kad pour sa bann dimoun ki'n ariv 63an e ki anvi kontinyen travay.

Mon felisit Prezidan pou ekout son pep lo sa size, olye ekout zis bann eksper enternasyonal. Seselwa i devret kapab fer son prop desizyon lo ki mannyer i viv, nou Gouvernman i ekout son pep nou krwar dan rod solisyon olye enpoze.

Nou krwar ki olye zis adopte sa ki larestan lemonn pe fer, ki nou osi nou annan talan e abilite la ater Sesel pou regard lavenir avek konfyans, e deside lo kwa ki pli bon pour nou.

E Madanm Speaker, kot LDS bann vye - kot LDS i adopte bann vye polisi kapitalis liberal ki eksplwat travayer nou, nou krwar dan drwa travayer.

Kot LDS i krwar ki Seselwa i viv zis pou travay, nou dan US nou dir ki travay i devret en fason ki permet ou viv byen.

Alor, mon pou dir avek bann dimoun LDS "*trust the process.*" I annan solisyon pour sa bann problem ek defi ki Onorab Georges, in leve.

(APPLAUSE)

HON SYLVANNE LEMIEL

E mon konnen ki serten solisyon pa son zenerasyon,

ou menm mon zenerasyon ki pou anmennen, me Prezidan Herminie, e US i *trust* sa bann zenn ki pe leve la o bor nou avek lavenir sa pei.

E la Madanm Speaker, mon le tous lo lot pwen ki Prezidan Herminie, in koz lo la dan son diskour, sa se rol lazenes dan devlopman nou pei.

Ankor diferans ant US ek LDS i tre kler. Prezidan in fer sorti ki nou lazenes i devret ganny tou loportinite, e posibilite pou devlop zot potansyel.

Mon siport lenvestisman ki pe ganny fer dan ledikasyon, devlopman *skills*, lantreprenarya, kiltir, sport, e lekonomi elektronik.

I annan- i enportan ki nou ranforsi bann program sipor pou lazenes, agrandi akse avek formasyon, e sipor pou komans en biznes.

Mon akeyir lanons Prezidan, pour letablisman en Konsey pou epanouisman bann zenn, pou formaliz partisipasyon bann zenn, e dan proses fer desizyon o nivo nasyonal.

Sa Madanm Speaker, i montre en Prezidan, ki pare pou *empower* nou lazenes e ki annan konfyans dan zot abilite. Mon demann bann zenn pou pran loportinite, e kontribye plenman dan devlopman nou pei.

Lazenes Seselwa i lavenir nou pei, e Prezidan Herminie in fer kler, ki nou bezwen prepar ekip nou zenn pou pran sarz sa lekonomi modern, kot teknolozi i form labaz.

Nou pa kapab koz lo lazenes san koz lo ledikasyon Madanm Speaker, e mon kontan ki Prezidan in rekonnet defi ki'n egziste dan sa sekter.

Zanfan pa kapab performen si zot lavi fanmir e kondisyon sosyal pa stab, an menm tan si nivo ledikasyon pa alaoter nou riske perdi nou lazenes.

Mon espere ki bann reform ki Prezidan, in anonse i anmenn pli bon rezilta, e pli byen prepar bann etidyan pou fer fas avek lemonn travay ler zot fini lekòl.

Si nou, nou le keksoz amelyore nou bezwen vwar lazenes koman bann partener serye dan devlopman, e non pa zis bann depandan.

Bann mezir ki Prezidan, in anonse pou fer sa en realite e ankor mon demann lazenes Seselwa pou zwe zot rol, dan sa Sesel anba direksyon Prezidan Herminie, zot kontribisyon i enportan.

Madanm Speaker, ler mon'n ekout Prezidan, mon vwar en vizyon tre kler kote i pe anmenn nou Sesel. Mon pa vwar en Gouvernman ki swazir

pou vir ledò lo bann ki pli vilnerab dan sosyete, o kontrè mon vwar en Prezidan, e Gouvernman ki konsyan e ki kot defi- e ki konn defi la deor, e bezwen son pep.

En Prezidan, e Gouvernman ki realize ki nou pa kapab kontinyen ignore lenpak fleo sosyal lo nou bann fanmir, lasosyete, e lekonomi.

Nou tou nou konn lanplèr problem trafik, e labi drog dan nou sosyete ozordi, pandan sa dernyen 15an i malere nou'n vwar dega ki problem drog in koze, e pe kontinyen koze dan sa pei.

Koman en Seselwa, ozordi mon demann mon bann frè e sè Seselwa pou nou donn Prezidan Herminie, e son Gouvernman sipò pou met sa problem anba kontrol.

Madanm Speaker, nou pei e nou popilasyon i pti, i annan serten size ki nou pa kapab *afford* kontinyen fer en kalite politik destriktif, akòz ler sa bato ki apel Sesel i koule nou tou nou pou koule.

Prezidan Herminie, in fer tre kler lapros son Gouvernman anver sa size, nou pa kapab zis *focus* lo laspe sekirite ouswa lo *supply*. Me nou bezwen osi rekonnet lenportans bann entervansyon ki adres demann.

Mon kontan vwar ki apre retar ki sa vilaz reabilitasyon ki pou konpri 4 sant

reabilitasyon pe finalman al ganny konstrir. Mon apresye, e mon konnen ki bokou paran e zenn i apresye ki Prezidan, pe ranforsi lasistans pour bann ki pe viv avek adiksyon.

La ki *APDAR* in ganny relanse, e osi *URS* mon swete ki sa problemn i ganny sa latansyon ki merite, akòz si i annan en size ki pe menas nou sosyete, e lavenir nou pei, i size drog.

Mon felisit Prezidan, pou pran en lapros ki vwar sa problemn koman enn ki konsern lasante piblik, e kot prevansyon, e reabilitasyon i kle.

Nou pa kapab zis pini dimoun, e kontinyen maltret nou bann frer e ser ki'n tonbe, se nou frer e ser Seselwa ki nou pe maltrete, e sa lapros i mal.

Mon swete ki bann zefor reabilitasyon i prodwi rezilta, e ki bann zenn i kapab re ganny zot dinyite, trouv en lanplwa e fer zot kontribisyon dan devlopman pei.

Mon osi siport Prezidan, ler i koz lo lasante mantal presyon la ater Madanm Speaker, espesyalman sa dernyen 5an ti bokou, Seselwa pa ti bezwen en Gouvernman ki vin azout fardo, e plis traka lo li.

E se sa ki Prezidan Herminie, in rekonnet ki lavi i deza difisil, e ki bokou dimoun

pe fer fas avek bokou problemn sosyal e ekonomik. E rol en Gouvernman se pou soulaz son pep, donn sipor e servis ki asire ki dimoun i annan rekour.

Madanm Speaker, mon akeyir lanons Prezidan, ki Gouvernman pou rekonstrir 2,000 lakaz ver lannen 2030. Zis apre - zis apepre 250 lakaz ki'n ganny konstrir dan sa dernyen 5an.

E sa i vreman malere pour sa 3,200 Seselwa ki pe fer konstriksyon, e ankor pe esper lasistans. 430 aplikan i ankor pe esper later *landbank*, e mon siport zefor Gouvernman pou delivre 150 morso later rezidansyel sa lannen.

Deza Prezidan, pe rekomans fer konblaz pou kree 570mil met kare later. Enkli preparasyon Ile Aurore pour proze lakaz, lekol, ek devlopman lenfrastriktir.

Sa i montre en Gouvernman avek vizyon ki konn bezwen son popilasyon. Madanm Speaker, Prezidan dan son diskour in osi koz lo proteksyon nou lanvironnman koman esansyel pour nou sekirite alimanter, e nou rezilyans ekonomik.

Mon krwar- mon kontan vwar lanfaz lo bann mezir adaptasyon kot sanzman klima ki kontinyelman pe menas nou bann lakot,

lenfrastriktir, e kominote ki ekspoze avek risk lerozyon, e inondasyon.

Mon annan konfyans ki anba direksyon Prezidan Herminie, ki proteksyon nou lanvironnman pou reste en pilye ki gid nou devlopman.

Nou pa kapab eksplwat nou lanvironnman natirel dan en fason ki destriktif, e ki pa soutenab. E la mon felisit Prezidan pour son *leadership* e kouraz, pour son *leadership* kouraze, espesyalman an sa ki konsern size Assumption.

Madanm Speaker, le 29 Zen sa lannen nou pou selebre 50enm Laniverser nou Lendepandans, sa i en zour enportan dan listwar nou pei koman sa parti ki'n lite, e ki'n devan dan lendepandans nou pei.

Mon kontan war ki se en Gouvernman *United Seychelles* ki o pouvwar pou mark sa levennman tre enportan, e tre spesyal.

Me mon swe profon Madanm Speaker, i ki nou servi sa moman pour nou reflesir ki mannyer, espesyalman nou bann reprezantan lepep, nou travay pou anmenn nou popilasyon pli pre ansanm.

Parey nou Lim Nasyonal, "Koste Seselwa" i demande, annou servi sa moman pour nou edik nou lekor, pou apresye kwa ki nou

Konstitisyon i demande, e la mon fer referans avek Lartik (40) nou Konstitisyon, ki koz lo devwar sak sitwayen pou soutenir, e defann nou Konstitisyon.

Alor, koman reprezantan lepep, annou vin bann legzanp kot nou montre lepep ki i vedir defann nou Konstitisyon. Se lepep ki siprenm, e nou Konstitisyon i reflekte sa klerman, aköz pouvwar pou *hold* nou *accountable* i dan lanmen Lepep Seselwa.

An konklizyon Madanm Speaker, apre bokou lakonplisman zis dan premye 100 zour son administrasyon Prezidan Herminie, in rapel nou ki i annan ankor travay devan nou.

Mardi, dan sa Lasanble nou'n ekout en Prezidan ki matir avek leksperyans nesaser pou delivre en diskour pli enportan lo Leta nou nasyon.

Prezidan, pa'n maltret personn, in koz kler e eksplik Seselwa kote nou pei i ete ozordi, e son vizyon pour nou lavenir. Malgre sa nou'n tann *Leader* Lopozisyon, koz konmsi i pe mazin en Sesel pe al pran fon.

Parkont, sa menm dirizan pandan ki son parti ti o pouvwar dan sa dernyen 5an zot pa'n kapab, e zot ti annan en mazorite absolü dan Lasanble Nasyonal, zot pa ti

kapab *hold* zot prop Gouvernman, e zot Prezidan, *accountable*.

Kekfwa si ti'n fer sa zot ti ava ankor o pouvwat ozordi. Me zot dominer, e larogans, e zot bann polisi kapitalis liberal in sitan anmenn sa pep ki Seselwa in met zot deor.

I malere ozordi, olye war nou demokrasi grandi e vin pli matir, nou vwar bann dirizan ki kontinyen anmenn politik sabotaz, e saboule.

Ozordi, demann mazorite Seselwa e zot a dir ou ki zot lavi pe dousman, dousman amelyore. Pa parey ou pe dir Onorab Georges, ki dimoun pe viv dan lafreyer, me dimoun in delire e dimoun pe kontan ou war en *smile* lo figir dimoun isi Sesel.

(APPLAUSE)

HON SYLVANNE LEMIEL

Se sa Leta nou nasyon. Se sa Leta nou nasyon, nou pe reekrir e re batir kot Mr Ramkalawan, e *LDS* ti derasinen, koupaye, koupe. Prezidan Herminie, pe replante, e pe rearoze.

Kot *LDS* ti pe kre en sosyete kot sa ki annan i vin pli ris, e sa ki napa i vin pli pov Prezidan Herminie, i dir, "*for the many, not the few!*"

(APPLAUSE)

HON SYLVANNE LEMIEL

Kot *LDS* e bann dirizan ti denigre, maltret Seselwa, Prezidan, i dir nou, "*trust the process!*"

(APPLAUSE)

HON SYLVANNE LEMIEL

Ozordi *LDS* i le vin koz lo napa linite, Leta nou nasyon pa bon, laliberte lekspresyon. Zot bliye ki pandan sa 5an zot ti pe *run* sa pei parey bann diktater? Dan sa Lasanble nou'n war mikro ganny koupe, nou'n war bann reprezantan lepep - ki lepep in elekte ganny anpese koze.

State House nou'n temwanny zournalis ganny ensilte, en bann ganny *ban*, e ozordi sa bann dimoun i koz lo laliberte. Ozordi nou nepli war solda lo semen pe teroriz nou popilasyon, e pe ganny servi koman larme personnel Prezidan.

Ozordi Leta nou nasyon i pli prometan, Seselwa i annan li en Prezidan, ki pe diriz son pep an antye. Byensir, dan en demokrasi i devret annan lespas pour nou dezagree.

Me en demokrasi Madanm Speaker, i grandi ler nou respekte swa lepep. Malerezman nou ankor war bann dirizan dan *LDS* ki pa kapab aksepte lefe ki zot in perdi sa eleksyon.

Nou vwar bann aktivite lo rezo sosyal kot zot kontinyen denigre travayer Gouvernman anba giz *hold Government accountable*. Zot kontinyen fer sabotaz, e zot pe anbet sa pep.

Me Madanm Speaker, se Lepep Seselwa ki pou *hold* Prezidan *accountable* an 2030. Avan bann defi ki egziste dan nou sosyete, ozordi dan lemonn Seselwa i bezwen bann dirizan ki met lentere pei premye.

50an apre nou Lendependans, i malere ki nou annan en lopoizasyon ki azir parey zanfank lakres. Nou Gouvernman i *welcome* kritik konstruktif, nou rekonnet ki nou pou fer fot, i pa tou keksoz ki nou ganny delivre a ler e ki nou bann dirizan pa parfe.

Me sa ki enportan Madanm Speaker, se ki sa Parti US in touzour annan en leker pour sa pep, nou lentansyon e lentansyon nou Prezidan, se fer Sesel fyer, e fer Sesel viv pli byen, e fer Seselwa viv pli byen.

Prezidan Herminie, pa bezwen personnan dan LDS pou *hold* li *accountable*. Zot pa kapab LDS pa kapab donn *United Seychelles* okenn leson aköz zot in *fail* sa pei.

(APPLAUSE)

HON SYLVANNE LEMIEL

Se Lepep ki pou zize si in delivre, si in amelyor zot lavi. Nou bann- pour bann ki le senm divizyon, bann ki pe koz lo viktimizasyon, les mwan rapel zot sa dernyen 5an.

I enteresan war ki mannyer ozordi zot koz parey pti lisyen koup lake, tandis ki ler zot ti annan pouvwar zot ti pe *rule border* e fer dominer, ozordi zot koz lo respe.

Me 5an pase zot ti vin dan Lasanble pou vin maltret dimoun, me Seselwa la deor i war kler e Seselwa pe swiv ki pe pase dan son pei, Seselwa i enterese konnen ki son bann dirizan ki in elekte i annan pou ofer si zot gard zot parol, e zot delivre.

E mwan mon napa okenn dout dapre- apre ki mon'nekout Diskour Leta Lanasyon delivre par Prezidan Patrick Herminie, ki wi Sesel i dan bon lanmen, e ki nou lavenir anba Prezidan Herminie, i pli briyan ozordi ki ti ete anba LDS.

E pour bann ki ankor pe doute oubyen pa'n kontan sa diskour, mon demann zot zis pou "*trust the process.*" Mersi Madanm Speaker.

(APPLAUSE)

MADAM SPEAKER

Bon. Nou ava prezan pran en *break*, e nou ava retournen 11er 10 pou kontiny deba.

(BREAK)

MADAM SPEAKER

Bon, nou pou aprezan rebran deba mon annan mon de lalis ki mon'n gannyen avek bann *Leaders*, e lo lalis prezan i Onorab John Hoareau.

HON JOHN HOAREAU

Mersi Madanm Speaker. Bonzour Madanm Speaker. Bonzour tou dimoun a lekout, e mon dir zot, zot kapab ouver zot radyo aprezan bann ki ti'n ferm zot radyo.

Madanm Speaker, parey le ka, a sak fwa ki Prezidan, i fer Ladres lo Leta nou nasyon, i touzour en loportinite distenge pour nou konman Manm Lasanble Nasyonal, pou donn nou reaksyon lo bann size ki mon krwar i enportan, e sirtou bann size ki konsern byennet zabitan nou distrik.

Madanm Speaker, malerezman Onorab, ki'n koz avan mwan in selektif ek laverite ler in dir nou koumsa ki an 2020 lekonomi ti stab.

Si nou a fer rapel Onorab Lemiel, atraver ou Madanm Speaker, an 2020 ti annan zis 14milyon dan Labank Santral pou pey trwa mwan lapey travayer.

Scholarship ti'n koupe, bann lenfrastruktir semen, sportif, medikal ti'n tonm a rin. *Capital Project* ti'n koupe,

e parey nou tou nou konnen pei ti en kales kase kot nanryen pa ti pe fonksyonnen.

Madanm Speaker, mon le komans mon lentervansyon avek en refleksyon ki pou ed nou pep konpran kote nou sorti, kote nou ete, e kote nou pe ale.

Dan nou listwar kontanporen, nou pas atraver diferan sistenm gouvènan, notaman sistenm kolonyal anba Angle, swivi par sistenm demokrasi miltiparti atraver en Gouvènmman koalisyon, ankor mete par Angle ler nou ti pran nou lendependans.

Aprè entre dan en sistenm sosyalis parti inik enstale par en koudeta, kot nou ti pas atraver la diktatir, perdi nou liberte, e la demokrasi.

Annefe, i ti en peryod nwar dan nou listwar, marke par bokou krim organize par Leta kont son prop pep. Tandè ki en ti group asosye avek sistenm ti byen pase, e anrisi zot lekor.

Pli tar, nou'n retourn ver demokrasi miltiparti e nou demokrasi in pran en nouvo souf. Lepep in konmans respir la liberte, e zwa de viv. Tou dimoun in komans eksprim zot lopinyon san rezerv, gras a nou drwa konstitisyonnel donner par Lartik 22 nou Konstitisyon.

Konman en zenn pep, nou'n temwannayaz kwa ki sak sistenm gouvènanans in anmennen de bon, ou move pour nou pep, e nou pei.

Ozordi, plis ki zanmen apre 50an lendepandans, sa refleksyon i fer nou realize ki en parti nou listwar i kapab repet son lekor, si nou konman en pep nou pa retir leson dan nou listwar.

Si ozordi, nou zenn pa konn nou listwar an menm tan annan en regar lo lavenir avek en lespri ouver, i regretan pou dir ki nou pou retourn an ron dan sa serk visye.

Ozordi, bokou dimoun pe demande, "ki direksyon nou pe vremen ale? Eski Seselwa pa'n remet en sistenm *quasi* parti inik dan en swadizan demokrasi modern?"

"Eski 'ek nou, pa ek nou' pa pe retournen dousman, dousman? Eski nou lekonomi i soutenab avek tou sa bann gro depans, ki nouvo ladministrasyon pe anmennen?"

"Eski nou'n elekte en ladministrasyon ki swadizan i obsede par prensip sosyalis kominis, ki'n demode, e *fail* dan sak pei ki'n ganny pratike?"

"Eski nou pa pe war nou pe al met laliny ankor pou ganny *forex* parey ler pei ti faid dan letan Parti Lepep?" Eski bann biznes pou antre dan en

resesyon, akòz pei nepli konpetitiv?"

Madanm Speaker, sa lensertitid e lafreder i reel, ler nou get prensip ki nouvo ladministrasyon pe vin avek, kot Leta i zis ouver tiyo, e les delo koule san kontrol.

Napa nouvo linisyativ pou met an plas striktir pou permet lepanouisman biznes, devlopman soutenab, e kreasyon larises. Dan sa diskour in napa okenn moman kot Prezidan, in koz lo lafason ki pou zener plis larzan.

Me in plito koz lo fason ki pou depanse, gato ki *LDS* in kwi, zot pe partaze san konnen ki fason pou bat lafarin pou kontinyen fer gato.

Pandan sa trwa mwan depi ki nouvo ladministrasyon *US* in vin o pouvwar nou'n vwar plizyer desizyon ki'n ganny pran ki pe anmenn en regresyon lo bann standar rann kont latransparans, e bonn gouvènanans, ki ti pwenn kardinal nou demokrasi, e fer Sesel ganny konsidere konman en pei model parmi bann pei Afriken.

Nou pe konstaman vwar en lerozyon demokrasi, e mank respe pour dezyenn e trwazyenn pilye nou demokrasi. Set a dir Lezislatif, e Zidisyer.

Nou'n vwar par egzann kot nou Konstitisyon, e serten

nou bann Lalwa egzistan i ganny met akote, e bann desizyon inilateral ki'n ganny pran.

Par egzanp desizyon pou larg bann kriminel ki ti pe servi santans dan prizon pour bann aksyon traizon. Nou'n ganny dir ki sa in ganny fer an konsiltasyon avek *Parole Board*.

Me parey labitid nou pa'n zanmen ganny lenformasyon avan pou konnen si sa in annan okenn laplikasyon par sa kriminel li menm parey prosedir i demande.

Zis ou tande, entel in ganny large lo rezon lenzistis. Sa leskiz in vin en fars nasyonal, aköz ti annan lakseptans, e responsabilite par sa bann malfeter, e Ziz in fer son travay dapre Lalwa.

Madanm Speaker, i fer Lepep Seselwa demande, "si Sef Ziz pa konn fer son travay, e osi si Dokter Herminie, prezan in vin Sef Ziz?"

Sa fwet lo sistenm Zidisyer pa'n aret la. In menm dir ki i pou fer en *re-trial*, dan son diskour, e dir ki i pou fer reform konplet dan nou sistenm Zidisyer.

An menm moman ki Sef Ziz dan son *interview* in dir ki i bezwen plis lotonomi pour li kapab deliver pli byen lo bann servis ki sistenm Zidisyer i ofer. Sa i fer pep konfize lo ki

kalite reform ki Prezidan Herminie, i oule?

Madanm Speaker, Prezidan Herminie, in promet pou separ prosekisyon avek lofis *Attorney Zeneral*. Sa vedir, i anvi sa Department Prosekisyon sorti anba en lofis ki endepandan, e ki ti'n- e ki fer son prop desizyon san lenterferans personn.

Nou ankor pe demande kote i pou plas sa lofis? Eski nou pou tonm direkteman anba - eski sa lofis pou tonm direkteman anba li parey lazans swe Lasante Mantal oubyen anba enn son Minis?

Si sa i le ka, i pou vreman fasil pour li enterfer avek sa departman pou donn lenstriksyon lo lekel ki pou ganny prosekite, ou non.

Si sa pa lenterferans dan sistenm Zidisyer dir mwan kwa? Seselwa, ouver zot lizye, *process the trust* olye "*trust the process*."

Dan tousala, pep Seselwa pe kontinyen ganny kit dan fernwar san en leksplikasyon, e en lenformasyon formel atraver medya nasyonal ki pe arive dan son pei. Sa mo, 'aköz' pa zanmen vini dan labous zournalis ler zot *interview* li.

Madanm Speaker, desizyon pou fer en *inquiry* lo lenportasyon zarm depi lannen 2000, o moman ki Ziz pe delibere lo en zarm ilegal lo

en ka zarm ilegal dan lakour personnel en sitwayen in fer-ki'n ganny fer- in ganny fer avek zis en bi. Sa se pou met retar dan prose Zidisyer, enkli serten zofisye sinyor dan militer ki siport US, sa i pou fer ki zot pou kapab sorti *scot-free*.

Sa in montre ki Ladministrasyon US in pare pou fer nenport ki mendev-maney, e enterfer - e siprim lendependans, e siperyorite Zidisyer.

Madanm Speaker, malgre ki mon krwar i nesaser pou annan en lodit lo zarm Sesel, me mon osi krwar ki Prezidan, i kapab espere kan sa ka zarm fini pas devan Lakour apre i ti a fer son *inquiry* si fodre.

Letan ou met retar dan prosedir Lakour, se osi ou pe retard lazistis. *Justice delayed, justice denied*. E la i osi montre lenterferans direk lo sistenm lazistis.

Dan son prop mo se zis-se selman en *banana republic* ki fer sa, aköz napa en rezon valid pou taye, e fer en tel *inquiry* a sa moman.

Madanm Speaker, Prezidan, in osi koz lo respe *l'état de droit*. Me an realite keksoz i diferan. Ladministrasyon US i don lord larme pou met dife dan bato bann etranze ki sispekte pe

lapes ilegalman dan nou lanmer.

Nou tou nou pa kontan ou swete ki lezot nasyon i vin epiz nou lanmer. Souverennte nou teritwar i sakre pour nou, e nou merit annan kontrol a tou pri dan nou lanmer.

Me atraver konvansyon enternasyonal tel ki *UNCLOS* ki nou'n form parti, nou sipoze anmenn bann ka devan Lakour, non pa *shoot and ask question later*.

Se zis Lakour ki kapab annan sa pouvwar pou kondannen. Si nou fer parey bann *cowboy dan wild west* lezot pei pou rann nou la parey si zanmen nou peser i tonm dan zot lanmer par aksidan.

Sa fason fer i montre ki Prezidan, konman konmandan an Sef Larme Sesel pe mank respe pour Lalwa ankor dan son prop mo, se zis "*banana republic*" ki fer sa.

Se sa ki US i le ki Lepep Seselwa i "*trust the process*" kan zot pe fer keksoz an deor Lalwa, e bann Konvansyon ki nou'n sinyen.

Madanm Speaker, atraver sa bann legzanp ki mon'n donner nou war ki US nou pa ni laont, ni pider, ni konsyans pou konmans demantibil sa bann menm striktir fondamantal la demokrasi ki bann dirizan

avan nou in ekri dan nou Konstitisyon.

Notaman Lartik (19), ki koz lo, *Right to a fair and public hearing*. Bann menm striktir, e mekanizm ki anba Ladministrasyon LDS, nou'n observe, e ki'n met nou lo kart enternasyonal koman en pep avek en demokrasi modern kot *l'état de droit*, la transparans, rann kont, e bonn gouvèrnans ti'n konmans vin nou fason viv.

Bann striktir ki pep Seselwa ti lager lebra kase pou met dan nou Konstitisyon 3enm repiblik.

Bann keksoz ki permet nou mont pli o lo mars dan bann lendeks enternasyonal tel ki *Transparency International*, *Mo Ibrahim*, *Fitch Rating*, e lezot ankor. I permet Sesel ganny sa respe enternasyonal konman en pei *l'état de droit*.

I reste aprezan pou war ki lorganizasyon enternasyonal, e sa bann lendeks i dir lo nou pandan lannen 2026.

Madanm Speaker, desizyon pou aret pey lekol *Vijay International* pour bann zanfàn *A Level* Praslin ek la Digue, san okenn konsiltasyon avek bann paran in lev en leokri lo sa de zil.

Se pourtan, Dr Herminie, ti dir dan son *speech* ki ler i ti ganny elekte ki tou desizyon ki

pou pran, i pou fer an konsiltasyon avan. Oli konsiltasyon dan sa ka?

Sa desizyon i montre ki US pe premyerman zve avek lavenir, e letid nou zanfàn pour rezon politik, US pa enterese pou fer okenn konsiltasyon avek personn avan ki pran bann desizyon enportan.

Minis Ledikasyon i dir nou ki lekol Vijay, i kout pli ser ki lekol SALS par etidyan. Ki i vre, me i annan plizyer rezon aköz sa desizyon ti ganny pran.

Ou pa kapab get zis pri lenstriksyon, me i osi annan lezot faktè enportan tel ki akomodasyon, transpor, *allowance*, e lezot benefis ki al avek.

Dan sa menm konparezon, Madanm Speaker, bokou dimoun pe demande konbyen vreman Prezidan pe peye pou reste dan sa *7 Star Villa* limero 106 Eden Island?

Nouvel se ki i pe kout leta Sesel pli ki R1milyon par mwan. E sa pour zot pa ser tandis ki pou pey lekol sa bann zanfàn Seselwa ki sorti Praslin ek La Digue i ser.

Eski se koumsa ki en Gouvèrnman *for the many not for the few*, i tret son pep? Mon krwar fodre nou sanz sa slogan, e fer li "*for the few not the many*."

Mon osi krwar ki annan plis ki plis ki ler pour sa bann ki'n aste kabri dan sak, zwenn nou, e fer tande zot lavwa!

Madanm Speaker, Leta nou nasyon zis trwa mwan anba Ladministrasyon US pe deza montre rezilta depans enkontrolab. Pri lesanz Dolar ek Roupi in ogmante, e komodite pe vin pli ser.

Avek sa kantite nouvo lapwentman kot nou'n vwar bokou zanmi, fanmir in ganny rekonpanse avek bann pozisyon o, sirtou bann ki lye direkteman avek Lofis Prezidan, i pou fer nou *wage bill* kont *GDP ratio* depas sa ki *IMF* in predir, i sa sif ki demontre stabilite finansyel dan bann *Small Island Developing States (SIDS)*. E son lenpak i grav si krwasans ekonomik i reste parey ou menm aptisi.

Pli ki Gouvernman i met likidite dan sistenm atraver saler, i vedir plis Roupi lo marse ki pe tay deryer menm kantite deviz.

Sa pou definitivman fer monte to lesanz. I annan avek li plis- i anmenn avek li plis lenflasyon, e Seselwa pou war zot kapasite pou aste i redwir, e pri marsandiz ki pou tous plafon.

Dan en lot mo, nou pei pou nepli vin konpetitiv par rapor avek bann pei ki nou fer

komers avek, setadir nou lekonomi pou aptisi.

Madanm Speaker, dan son diskour Prezidan, in osi koz lo R59 milyon *taxpayers money* pour '*write-off*' bann det bann *businessman*, ki'n pran *loan* avek *DBS* ek *SBFA*. Sa ankor pa'n ganny okenn-san ankor donn okenn lenformasyon lo ki kriter ki pe ganny servi, oubyen ki dimoun ki pou kapab ganny benefis sa *write-off*.

Mon konsyan ki i annan de ka ki vreman spesyal, par egzanp en dimoun ki annan en *loan* i mor, oubyen petet i ariv en maler kot dife i pran dan sa biznes, ki detri sa biznes ki sa dimoun in pran sa *loan* pou konstri. Dan sa ka i zistifye pou *write-off* sa *loan* lo baz plito imaniter.

Me Dokter Herminie, i bezwen vin kler avek nou lo ki baz sa *written-off debt* ki'n anonse pe vini. Eski nou pou vwar zis en pti group zanmi, ou siporter ki pe ganny sa benefis parey in le ka oparavan?

Eski i pou rekonpans bann ki'n ed li dan kanpanny Eleksyon 2025? Eski *DBS* in ganny okenn rediksyon lo *loan* ki li aprezan i pran avek bann lezot baryer de fon parey *TSB*?

Nou napa sa bann lenformasyon, e nou pa kapab zis ganny zis dir "*trust the process*." Akoz ki bann

sitwayen ordiner ki annan *loan HFC*, ki pe ganny difikilte pou pey zot *loan* zot osi zot pa ganny en rediksyon?

Eski *the few* ki deza annan biznes- ki deza annan gro biznes pou benefis, tandis ki *the many*, pour ganny kit ater?

Madanm Speaker, i annan bokou nou- bokou nouvo lapwentman, e kreasyon nouvo *post* tou resaman. Sa ki enteresan avek sa bann lapwentman ki'n ganny fer se nepotism, medyokrite, lwayote, e faver pou Parti *US* ki'n vin nouvo kriter pou lanplwa.

Tandis ki meritokrasi, lonnekte, e lwayote anver pei in ganny met de kote. Eski sa i en mesaz pozitiv ki sa Ladministrasyon *US* pe anvoy avek bann zenn *graduates* ki pe *burn the midnight oil*, e bann ki pe deside pou al liniversite?

Madanm Speaker, sa ki fer li pli sagrinan, se ki travayer ki'n annan bon rikord performans e ki pe donn tou dan lentere pei pe ganny pouse senpleman akòz zot in siport *LDS*, oubyen zot pre avek en Manm sinyor *LDS*.

Fodre note ki travayer- ki atraver sa moman penib, sirtou pandan letan Nwel ek Lannen ler tou fanmir ti sipoze reinir renye dan lazwa, e

serten, in pas atraver en letan lensertitid, e dezespwar.

Bann *NGOs* parey *ARID* e osi dwa imen in reste silans, e pa'n aport zot sipor pour bann ki'n perdi zot travay.

Se pourtan Komisyon Drwa Imen i la pou mentenir Sapit (3) nou Konstitisyon ki baze lo drwa Fondamantal Imen, e Liberte; notaman Lartik (35) Drwa Travayer.

Zot in reste trankil lo sa size konmsi soudan zot in ganny *selective amnesia*. Soudan, konferans de pres in arete, program Lopinyon in arete, e person nepli koz lo labi pouvwar ankòr.

Madanm Speaker, malerezman se leta nou nasyon selman trwa mwan apre la viktwar *US* e se sa en Gouvernman *for the many, not for the few*.

Madanm Speaker, dan mon distrik in annan bokou devlopman anba mon direksyon dan bann lannen ki'n pase. Notaman proze 24/24 in akonplir 2017, lagrandisman semen e bann kontour, nouvo trotwar e, nouvo *feeder road* La Batie, Proze *Beau-va Beach Bazar*, Promenade de Beau Vallon, lamenzman lakot e *seawall*, e plizyer lezot ankòr.

Beau-Vallon pou kontinyen devlope tan ki mon la.

Faz 1 Program re-devlopman Société du Logement Pascal Vilaz pou demare byento, kot plizyer fanmir pou sorti dan sa bann vye lakaz ki delapide e rantre dan nouvo lakaz.

Mon kontan ki Prezidan, in komet son lekor pou dir ki pou fer 2000 lakaz dan son manda. Mon kontan ki mon frer ek ser i a ganny en lakaz konvenab.

Me, fot espere ki sa pa finans- sa finansman lakaz pa sorti kot Lenn an retour pour en baz militer Assomption. Si in pri dan sa zwe zeopolitik parey pwason dan kazye, i devret fer lepep kler.

Souverennte lo nou zil Assomption i pre avek nou leker. Nou pa oule okenn baz militer, lo okenn parti nou teritwar. *Assomption is not for sale to the Indians.*

(APPLAUSE)

HON JOHN HOAREAU

Madanm Speaker, an Desanm lannen pase mon'n ganny sans pou rankontre Minis Veronique Laporte, pou diskite lo kontinyasyon proze miray lo lans pou protez bann lenfrastruktir kotyer tel konman semen, *building*, e pli enportan nou lakot li menm.

Parey nou tou nou konnen lefe sanzman klima i en fenomenn ki depas tou

frontyer konman en Pti Leta Zil e sirtou lefe ki nou popilasyon i konsantre otour zone lakot.

I enportan pour annan bann plan mitigasyon pour lefe sanzman klima pour ki nou kapab adapte, e reste rezilyan dan lefitir.

Notaman Madanm Speaker, nou pe fer bokou progre e mon espekite ki sa Gouvernman parey son bann predeseser i gard son komitman ver nou lanvironnman.

Konman en Seselwa fyer, parey nou Konstitisyon i fer nou mazine dan nou premye, e dezyenm paragaf son preanbil. Mon site *“grateful to Almighty God that we inhabit one of the most beautiful countries in the world; ever mindful of the uniqueness and fragility of Seychelles.”*(fen sitasyon)

Madanm Speaker, dan menm lespri mon le ankor parey mon fer li koman en labitid a sak fwa ki mon koz lo Leta de Lanasyon, sipliye ek nou nasyon pour nou mentenir respe, e bon latitid lo size tapaz dan nou lanvironnman.

Tapaz i en form polisyon e anba Lalwa *Environmental Protection Act (EPA)* Zofisye Lanvironnman ki annan sa manda pou ranforsi sa Lalwa.

En zofisye i ganny drwa mezir lemisyon tapaz, e pran aksyon apropiye enkli serten penalti. Anba nou Kod Sivil osi tapaz enkliziv dan nou kominote i ganny konsidere konman troub vwazinaz, e lapolis i kapab entervenir pou pran aksyon notaman pou retir sa sours tapaz.

Me i tre dezapwentan pou dir, ki mon lofis i ganny bokou konplent sirtou sorti kot manm piblik ki dir ki ler zot telefonn lapolis, nanryen pa ganny fer pou anpes tapaz eksesev dan vwazinaz.

Ler sitwayen i telefonn zot pou rod lasistans, annan fwa zot rod en leskiz pou pa asiste oubyen pour pa vini, oubyen si zot vini zot pa pran okenn aksyon.

Mon distrik i en distrik touristik, e touris i vin pour nou lakey salere, pour en repo dan trankilite, e plizyer lezot rezon ankor. Se sa ki anmenn nou pli gran sours reveni dan pei.

Alor Madanm Speaker, mon le ki nou pep i konpran ki fodre nou pa aroz delo so lo nou pye diri. Annou osi annan plis solidarite, e viv pli byen an kominote koman ser ek frer.

Annou annan anmenn respe pour nou lanvironnman, e annan respe pour drwa tou dimoun. Mazin ki kot ou drwa i fini se kot drwa ou prosen i konmanse.

Setadir, zwe ou lanmizik *enjoy* ou lekor me pa fer li an ekse pou deranz lezot. Mon le osi sipliy avek bann lotorite ki sipoze mentenir lord, e lape pou ede fer Sesel pli zoli.

Mon osi konsyan ki zot travay i difisil annan de fwa dan serten ka, lapolis i mank mendev e sirtou sipor e bokou lezot - e bokou zot pe fer zot travay le mye posib par rapor avek zot lanvironnman travay, e resours ki a zot disponib.

Pou terminen, mon pou profit sa loportinite pou asir nou pep ki'n met konfyans dan nou ki nou pou touzour la pour zot, nou pou touzour la ler zot soufer, dan zot kote letan ki annan maler, dan zot kote letan ki annan lenzistis.

LDS i plis ki Wavel Ramkalawan, *LDS* i plis ki mwan, *LDS* i plis ki tou sa Manm lo sa kote latav. *LDS* i reprezant sa 54.91, dimoun ki ti vot pour sanzman an 2020.

LDS i reprezant sa lafors, e sa filozofi pou anmenn Sesel - pou anmenn en Sesel pli zis, pli demokratik, pli transparans, e plis prosperite pour sak Seselwa. *LDS* i reprezant linite, laliberte, lavenir, e lespwar pour Seselwa. "Nou pa pou zanmen les tonbe!"

(APPLAUSE)

MADAM SPEAKER

Onorab Trevor Louise.

HON TREVOR LOUISE

Bonzour Madanm Speaker. Mersi Madanm Speaker. Madanm Speaker, mon war li enteresan ki ozordi Onorab Hoareau, atraver ou pe koz lo drwa, kantite son dirizan a sa letan ki ler i ti *State House* ti dir avek nou koman Seselwa ki nou napa drwa anba Konstitisyon zot bliy vitman zot en parti konfize.

(APPLAUSE)

HON TREVOR LOUISE

Bon. Madanm Speaker, tou bann Manm koleg Onorab. Tou dimoun ki a lekout, e en bonzour spesyal pour tou zabitan Bel Air.

Madanm Speaker, avan mon komans mon lentervansyon mon ti a demann ou permisyon swa permet mwan pou eksprim mon senpati avek lafanmir Quatre, e lafanmir Mathiot, ki'n perdi enn zot pros, e osi pour lafanmir Trevor Bijoux, me koni koman "*Smash Kid*" ki'n kit nou yer.

Ok. Madanm Speaker, si nou met politik de kote mon krwar ki Seselwa ava aksepte ki pour la premye fwa dan sa dernyen 5an nou nasyon in kapab ekout en diskour leta la nasyon kot personn pa'n ganny atake, personn pa'n

ganny maltrete e Prezidan, nou pei in kapab vreman met lanmen lo pou nou nasyon e delivre en vre Diskour Leta Lanasyon.

(APPLAUSE)

HON TREVOR LOUISE

Sa Ladres fer par Prezidan Dokter Patrick Herminie, le 27 Zanvye in montre klerman ki Gouvernman *United Seychelles* pe met Seselwa o sant devlopman dan nou pei. Ozordi zour nou nasyon i kapab dir fyerman e fortman ki wi nou'n ganny ekoute, e nou pe ganny gete.

Madanm Speaker, ozordi san okenn dout nou kapab dir ki nou pei pe ganny byen dirize, e nou annan nou en direksyon ki kler.

Pandan sa bann dernyen lannen Prezidan Larepublik, koman Dirizan Parti Lopoizisyon a sa letan ti fer en komitman anver pep Seselwa avek bi pou redres sityasyon lavi dan nou pei atraver en kontra sosyal.

Sa kontra sosyal in ganny met an aplikasyon zisteman pou rekonstri relasyon ant Gouvernman avek son pep pou protez ban drwa, debaz, e fondamantal, e osi dinyite nou nasyon pou garanti lazistis sosyal, e egalite, promot rann kont, e bonn gouvernans, redwi bann

presyon ekonomik, e pli enportan promot linite nasyonal.

Madanm Speaker, ozordi pandan son 100 zour depi ki'n sermante Prezidan in desot lekspektasyon kot in non selman delivre lo son promes 100 zour, me kot i pe osi enplimant bokou plis ki sa ki i ti dir i pou fer.

Madanm Speaker, permet mwan retras sa kontra sosyal. Anvi ki *United Seychelles* i en parti progresiv, e en part travayis, e avek bi pou valoriz travay nou bann travayer Seselwa.

En lamannman lo Lalwa Trezyenm Mwan Saler ti resaman vin devan nou Lasanble. Kot nou'n aprouve pour Seselwa ganny zot trezyenm mwan saler an plen. En pa Madanm Speaker, ki'n vreman ed bokou fanmir re pran sa nouvo lannen avek en lespri pli eze konpare avek bann lannen presedan.

Nou'n osi vwar kot en lot promes 100 zour ti ganny egzekite kan Prezidan dan son *maiden speech* devan nou Lasanble ti vin annons bann mezir pou fer desann laz pansyon sorti 65an pou vin 63an, e i osi ogmant Sekirite Sosyal pour nou bann dimoun aze kapab viv dan konfor e dinyite.

Madanm Speaker, Prezidan, in osi get dan benefis

bann travayer aktyel kot mazorite travayer dan servis piblik in benefisy e avek retour zot *long service allowance* ki ti'n ganny retire lo zot saler.

Sa bann tel mezir i zis montre nou ki dan *United Seychelles* nou pa zis koze, me nou valoriz, e respe nou pep, e nou osi delivre.

Sa problemn drog i enn ki pe fer bokou fanmir soufer, e mon distrik Bel Air pa'n ganny eparnye. Alors, letan mon'n antann Prezidan Larepiblik, pronons son lekor lo en *Rehabilitation Centre* ki pou pe ganny konstri byento. Sa in vreman lev mon moral, e donn mwan lespwar pour lefitir.

En santiman ki mon konnen bokou fanmir Seselwa in partaze. E sa lanons Madanm Speaker, in vin zis detrwa semenn apre ki Lasanble in aprouv Lalwa pou reentrodwir *APDAR*.

Kestyon ki pe ganny demande se, si zistans 100 zour Prezidan pe fer sa kantite travay, kwa ki pa pou fer pandan sa prosen 5an? I annan pe dir nou zot pe *follow the process*, me mwan mon pe dir avek zot *trust the process*.

(APPLAUSE)

HON TREVOR LOUISE

Nou'n osi antann bokou lanfaz in ganny mete lo sa size *mental*

health. Avek kreasyon en nouvo lazans atraver sa *Mental Health Act*, bokou dimoun dan nou sosyete pou kapab ganny sa swen ki nesesser pour ed zot fer fas avek bann defi ki sa bann kondisyon mantal i prezante.

Mon'n deza dir sa problem lasante mantal i enn ki napa balizaz, e nou rol se asire ki nou pa diskrimin kont okenn endividi me plito ankouraz zot pou al rod led.

An dizan sa mon le lans en lapel avek bann responsab pou asire ki nou bann travayer lo *frontline*, e osi bann ki pe travay direkteman avek piblik an zeneral i resevwar ban *training* o nivo pou asire zot kapab rekonnet e konpran ki pli bon fason pou adres bann tel ka kot bann dimoun avek en kondisyon mantal i konsernen.

Fodre ki nou konpran ki sa bann kondisyon mantal i prezant zot dan diferan fason, e ziska la bokou nou bann frer e ser dan servis pa konnen ki mannyer pou apros e menm adres sa bann sityasyon.

Madanm Speaker, Gouvernman *United Seychelles* i serye letan i pe dir ki i pe met Seselwa o sant devlopman, avek bi pou relev nivo konfyans ou nasyon, e reafirm nou demokrasi.

Legzekitiv in pran en desizyon pou ferm sa tim ki

bokou ti konn koman tim "Ibou", en tim ki ti pe teroriz nou bann zenn e kous nou popilasyon aköz politik.

Fodre zanmen ki nou bliye letan sa de zenn ti mont lo televizyon, e plere aköz ki fizi ti'n ganny mete dan zot latet, e dan zot bar vant.

Sesel fodre zanmen i bliye ki ti osi annan en letan pandan sa dernyen 5an kot zenn ti pe ganny mete dan keson transpor par sa menm tim, e zot ti pe ganny anmennen parey en pake lenz sal, kot drayver ti pe dray vit, e menm si zot ti pe kriye zot pa ti pe ganny pran okenn traka.

E zabitan Bel Air fodre zanmen zot bliye ki letan sa zenn ti pe asize Stevenson Delorme, o bor semen sa tim ti monte e kalot enn sa bann zenn, e kit mark dan son figir, san menm realize ki li osi i ti en koleg larme.

Kot letan son fanmir ti sey al rod rekour zot ti ganny dir ki sa tim pa tonm anba lapolis, me plito anba *State House* e ki zot pa pou kapab fer nanryen.

Madanm Speaker, ozordi zour i fer mwan en gran plezir pou vwar ki en tel pratik pa pou zanmen ganny arive ankor dan sa pei, sa Sesel ki nou pe viv ladan napa plas pou viktimizasyon politik, labi Drwa Imen, e lezot laform labi.

Madanm Speaker, prezan permet mwan donn mon analiz senser lo sa SONA. Prezidan Larepiblik, in anonse ki Legzekitiv pou pe met a dispozisyon R20milyon pou rekonpans bann viktim ki pe prezant zot case devan TRNUC.

Mon note, ki annan zabitan ki'n aport zot konsern lo sa size, e kestyonn sa desizyon. Me par kont, koman en Gouvernman brav, e responsab mon oule felisit Gouvernman *United Seychelles* pou respe, e onor rekomandasyon ki ti'n ganny fer dan sa rapor TRNUC.

Fodre nou nasyon i konpran ki bi TRNUC sete pou rod lazistis pou bann viktim, e fer bann akize rann kont dan zot bann aksyon e osi rod solisyon.

Me non pa servi li koman en seval batay politik, e apre negliz tou sa ki ti ganny sizere par sa Komisyon. Avek en tel desizyon Sesel ava finalman met en lafen avek sa size, e ferm sa paz enn fwa pour tou.

Fodre zanmen ki nou bliye ki i annan zis enn sel Sesel, e koman en nasyon in plis ki ler pour nou inifye e travay anver lepanouisman nou pei.

Madanm Speaker, en lot size ki pe preokip lavi dimoun e ki pe ede pou met en kantite presyon ekonomik, e mantal lo

mazorite nou bann frer e ser se sa size lakaz ek later.

Dan mon distrik Bel Air i annan dimoun ki pe dormi avek zot de a trwa zanfandan en salon, aköz zot ankor devan lakour zot paran.

I annan ki pe dormi anba lavarang zot ser, i annan ki pe dormi dan garaz kot dimoun ki'n anmas zot, e i annan ki pe zis kont lakaz kot bann bon samariten pe ede pou donn zot en lozman tanporer.

Avek sa lanons par Prezidan Larepiblik, pou konstri 1000 lakaz komansman sa lannen. Mon garanti ki en bon pe zabitan ava kapab ganny en lozman, e finalman viv dan sa konfor e dinyite ki zot merite.

Mon oule fer resorti Madanm Speaker, ki pandan sa dernyen 5an in napa okenn konstriksyon lakaz dan distrik Bel Air. Sa ki sagrinan se ki i annan dimoun ki'n fer laplikasyon pour en morso later ouswa menm en lakaz, e ziska la zot ankor pe atann.

Menm avek en mazorite absoli a sa letan ansyen ladministrasyon pa'n kapab delivre ni menm en pyer fondasyon pour zabitan Bel Air.

Zot in esey konstri en Proze *Condominium*, koman en zouti eleksyon, me ziska sa zot pa'n kapab fer. Kot ziska la Minister Later i ankor pe lager

pou sey met lord dan sa dezord.

Mon oule sezi sa loportinite pou kosyonn nou bann zabitan ki san en laplikasyon later ouswa lakaz, e san menm zot kontribisyon i pou difisil pour Legzekitiv kapab donn zot en lakaz ouswa en morso later.

Alors, silvouple asire ki zot pe fer le nesaser pou kapab ganny en lozman pour zot. Madanm Speaker, Prezidan in osi dir ki annan apepre 150 morso later ki pou pe ganny vann avek piblik, nou'n akey sa lanons.

Me mon oule demann avek Legzekitiv, pou met an plas bann mezir ferm pou asire ki sa bann tranzaksyon i ganny fer dan latransparans, dan en fason ekitab, e baze lo merit.

I nepli tan pou servi later ek lakaz koman en zouti politik. Mon'n annan tro bokou zabitan ki'n vin devan, e akont mwan zot leksperyans kot zot in ganny dir ki, "akoz zot siport *US* ouswa lezot parti politik, zot pa pou ganny konsidere pour en lakaz."

Sa letan la Madanm Speaker, in fini. Later ek lakaz i pa en privez pour detrwa dimoun, i en drwa fondamantal pour tou Seselwa, pe enport ou afilyasyon politik.

Sak sitwayen i merit dinyite, sekirite avek en sans pou ganny en plas kot i kapab krwar e batir son prop lavenir, mon'n deza dir ki Sesel pa pou okenn parti politik. Sesel i pour Seselwa.

Tre byento nou Lasanble pou table Lalwa pou re entrodwir *Unemployment Relief Scheme*, me koni koman *URS*. Avek son re reentrodiksyon bokou plis zenn pou kapab resevwar bann skil ki nesaser pou antre dan en lanplwa, me pli enportan pou retenir zot lanplwa.

Fodre note Madanm Speaker, ki pandan sa bann dernyen lannen in annan bokou zenn ki'n esey fer laplikasyon pour en lanplwa. Be letan nou asize nou koz avek zot, en keksoz ki mazorite i partaze an komen, se ki zot dir ou ki bann landrwa travay pa zanmen reponn ou menm rekonnet zot laplikasyon.

Sa i en keksoz ki Legzekitiv i merit met bokou lanfaz lo la. Si sak biznes ti pran linisyativ, e sey *groom* enn ou de zenn pou pran la relev bokou nou bann zenn ti pou pli ekipe, e sa problem *unemployment rate* parmi bann zenn ti pou ganny redwir.

I enportan note ki zis apre son Ladres *Cabinet* Minis, in aprouv en seri

desizyon pou ede amelyor e relev pozisyon nou bann zenn. *Cabinet in approve en Education and Youth Development Careers and Further Education Bill*, avek bi pou kre sipor pour bann etidyan ki pe rod konsey lo zot fitir, e karyer ki zot ti a voudre fer zot parkour ladan.

E osi 2 program *Ignite Pilot Programme*, e *Step-Up for Life Programme* in ganny aprouve, enn se pou fer bann plasman dan bann landrwa travay kot san zenn ava ganny *workplace experience*, e lot se pou ankadre bann zenn atraver en louvraz pandan vakans.

Madanm Speaker, mon'n kontan pou antann Prezidan Larepiblik, anonse ki a lavenir sa sistenm *welfare* parey bokou i konn li pou pe nepli asiste dimoun ki pa pe travay, me plito pou asiste bann ki dan en lanplwa, me ki pa pe kapab fer de bout zwenn.

Sa i ava redwir lakantite laplikasyon, e retir presyon lo lekonomi nou pei. An menm tan i ava fer ki nou ava annan en nasyon ki an bonn sante, e osi enn - e osi anmenn en nivo krwasans ekonomik pli eleve, e stab.

Madanm Speaker, dorenavan nou pou nepli annan en sistenm *welfare* kot Gouvernman i responsab sa ki pa pe travay.

Me plito en *workfare system* kot sa ki pe kontribye ki pou pe benefisye. Alors, mon bann frer e ser annou komans leve, e debourye.

Mon le egalman lans en lapel avek Minister Lanplwa pou komans desantraliz zot bann servis atraver distrik, e osi komans organiz bann *job fare* o nivo bann rezyon, sa i ava fer ki bokou plis dimoun i ava ganny sans pou partisipe.

Madanm Speaker, fodre nou bann landrwa travay osi i komans annan en pe respe pour nou bann travayer. Annou komans normaliz pei dimoun lo en dat ki *fix* e akseptab, aret kre bann lanvironnman travay ki toksik, e osi fer nou bann frer ek ser travay pour en mersi.

Minister Lanplwa, in ler pou ranforsi zot bann vizit e asire ki bann landrwa travay i azour avek bann kad legal ki an plas.

Madanm Speaker, en nasyon ki an bonn sante i en nasyon ki ris. Pour plizyer lannen nou bezwen admet ki Minister Lasante, in fer fas avek bokou defi e in viktim en kantite kritik.

Mon kontan pou vwar ki Prezidan Herminie, pe met sitan lanfaz pour la relev dan sa Minister avek en revi lo kondisyon travay.

Madanm Speaker, avek ou permisyon mon le egalman

fer serten kontribisyon pour sa Minister. Mon sizere ki Minister i konsider donn bann *staff* ki lo en *duty* en repa.

Mon okouran ki annan en *meal allowance*, me mon note ki sa *allowance* pa reflekte lo depans denozour. Mon osi sizere ki zefor i ganny mete dan laranzman bann dormitwar pli *conducive* pour bann *staff* repoze kan ki zot lo *duty*.

E finalman mon propoze ki en *Scheme* i ganny organize pour bann *staff* ki servi servis bis piblik pour ki Minister i ava kapab absorb kou pou zot bis, en model zis parey sa enn ki bann zofisye lapolis pe benefisye avek. En sizesyon ki mon ti a osi fer pour bann ansenyan ki pran bis.

Madanm Speaker, mon osi oule adres nou bann travayer lasante. In plis ki ler pour zot koman bann profesyonnel met zot profesyon a premye, e met politik de kote.

Focus lo travay ki devan nou, malgre bann defi zot reste en group ki vreman enportan dan nou kominote. Nou apresye zot, nou apresye zot zefor, e determinasyon en kantite. Mersi pour zot servis.

Sa i anmenn mwan lo mon lot pwen. Sa enn SONA Prezidan, in fer bokou lanons kot i konsern Minister Ledikasyon, annefe sa

Minister in enn ki'n domin en gran parti sa diskour.

Madanm Speaker, koman en zonm ki krwar dan lasyans, e ki krwar ki ledikasyon i lakle pour en meyer lavenir Prezidan, in pran kont nesesite pou konstri en sant vokasyonnel, e osi en lekol pour bann etidyan ki lo *spectrum* e osi bann ki otreman kapab.

Malgre i annan ki vwar sa koman en mezir pou klasifye nou bann etidyan, i enportan note ki se selman avek sipor konprenezon e servis spesyalize ki nou bann etidyan ki lo *spectrum*, e otreman kapab pou ganny sa nivo ledikasyon ki zot merite.

E pour ou sa zenn ki pa pe vwar ou dan sa *academic pathway*, pa *give up*. Loportinite pour ou devlop ou abilite i la, avek sa lekol- a sa nouvo lekol vokasyonnel ki byento pou pe ganny konstri ou pou ganny loportinite pou non selman aprann, me devlop ou skil ki an retour ou ava kapab menm kalifye pou en labours enternasyonal.

I kler ki Legzekitiv pe met bokou lanfaz lo *Artificial Intelligence*, e osi *digitalisation*. Koman en zenn etidyan asire ki ou sezi tou sa loportinite pou aprann avek sa bann nouvo teknolozi, servi zot avek disiplin, e agrandi ou

konnesans pou ou kapab ariv lo sa lot nivo.

Madanm Speaker, mon'n komans fer mansyon lo nou bann ansenyan par lao lo mon- dan mon deliberasyon, mon ava kontiny mon deliberasyon lo sa group dimoun ki'n permet nou tou ki la ariv kot nou ete koman bann endividi.

Koman bann Manm Parlman nou konnen ki zot latas pa fasil, menm si parfw zot lebra i tonbe, zot toultan rod fason pou vin edik nou bann zanfan. Mon oule sezi sa lokasyon pou demann avek Minister Ledikasyon pou revwar kondisyon nou bann ansenyan, e asire ki resours nesese i ganny mete a zot dispozisyon.

Sa 2000 *laptop* ki pe ganny donnen avek tou bann edikater i en komansman, me i annan bokou plis ankor pou fer. Parfw nou zis bezwen aprann ekoute, e rod fason pou amelyor bann sityasyon.

Mon ti ava sizere ki Minister i revwar lakantite *paperwork* ki nou bann ansenyan i fer, me plito met lanfaz lo zot *delivery*, e asire ki zot *lesson plan* i reflekte zot *workload*.

Latitid dan lanvironnman lekol i osi merit en konversasyon kle, aköz menm si nou pe met tou a dispozisyon lo bann etidyan si

zot pa disiplinen zot pa pou al lwen.

Bann lekol i devret ranforsi lo sa *tripartite relationship* ant paran, zanfan, e osi ansenyan pou asire ki tou sipor posib i ganny donnen avek tou bann edikater.

Madanm Speaker, an terminan mon le koz lo en kous nou popilasyon ki tre enportan, e tre pros avek mon leker, e sa se nou bann zenn.

Mon oule felisit Gouvernman Prezidan Patrick Herminie, pou pran sa linisyativ pou kre en *platform* pour nou bann zenn kapab non selman *voice out*, me osi kontribye aktivman dan devlopman, e lepanouisman nou pei.

Parey nou toultan dir, "*nothing for the youths, without the youths.*" Mon bann frer e ser lazenes la i ou loportinite pour ou osi form parti sa *group of decision makers*.

A lafen dizour, se nou ki fitir pei, e selman zis nou osi- e selman zis ki nou osi form parti sa bann desizyon ki pou enpakte direktteman ou endirektteman lo nou lavi.

Madanm Speaker, i vre ki apart sa kreasyon sa nouvo Konsey Nasyonal, napa okenn lezot pwen ki'n monte pour lazenes. Me les mon dir zot ki travay in komanse, e ki byento zot pou vwar rezilta.

An se ki konsern sport menm si napa okenn mansyon dan Ladres Prezidan, mon okouran ki bann responsab Minister Lazenés ek Sport pe zwenn avek bann asosyasyon e federasyon sportif.

E Minis in osi komans ferserten vizit dan bann distrik, espesyalman lo nou bann Zil Pros. Alors pa perdi lespwar, *trust the process* e ou a vwar ou menm.

Pli vomye nou vwar en Gouvernman ki planifye byen son bann travay, ki enn ki a sak fwa ti vin devan ansyen Lasanble ti koz zis lo plan e stratezi ki zanmen deza materyalize.

An terminan Madanm Speaker, mon le reasir zabitan Bel Air ki zot in fer en bon swa, zot in vot pou en vre Lasanble pour Sesel, e zot in osi vot pour en Gouvernman ki pe met ou koman en zabitan o sant devlopman.

Alors, wi nou pou, *“trust the process”* akòz nou pe travay *“for the many and not just the few.”* Koman en Seselwa ou merit pe vwar ou dan sa ladres, sezi tou loportinite posib, e ansanm annou fer li pour Sesel. Mersi Madanm Speaker.

(APPLAUSE)

MADAM SPEAKER

Onorab Romain.

HON GEORGES ROMAIN

Mersi Madanm Speaker. Bonzour, e mersi pou bonn mwan mon laparol. Bonzour tou koleg Onorab, e tou dimoun a lekout, e en bonzour spesyal pour zabitan Anse Etoile.

Mwan koman MNA Elekte pour distrik Anse Etoile, mon respe e rekonnet desizyon ki pep Seselwa ti fer Oktob 2025, pou met Parti US o pouvwar pour sa sanzman ki zot ti pe rode.

E la vi ki US in fer egzakteman 101 zour depi ler ki Prezidan Herminie, in sermante mon ti a kontan demann Lepep Seselwa pou reflesir seryezman lo sa desizyon ki zot in pran an Oktob 2025.

Eski zot krwar ki zot in fer en bon desizyon? Eski nou satisfè avek lafason ki nou pei pe ganny dirize? Eski nou santi nou lib pou eksprim nou lekor san okenn lafreyer? Eski nou santi ki nou bann zournalis ozordi zot lib pou fer zot travay? Eski nou medya nasyonal pe vreman raport lo sa ki pe arive dan nou pei?

Eski nou santi nou ok ler nou vwar nou bann frer ek ser Seselwa pe ganny pouse e zot travay san bann rezon valab? Eski nou vwar li i byen pou kree sa ta pozisyon dan

Gouvernman zis pou rekonpans zot bann dalon san get zot konpetans?

Eski nou vwar li i byen ler Gouvernman pe fer sa ta depans, me selman i pa'n vwar li en priyorite pou etidyan Praslin e La Digue kontiny zot letid Pos Segonder lo Praslin?

Eski nou koman en sitwayen nou vwar li i byen pour en Prezidan, donn lord pou larg bann prizonnyen akoz i dir Lakour Zidisyer pa'n byen fer zot travay? Eski nou vwar li i normal pour en Prezidan Elekte, sey rod tou sort fason pou entimid e denigre limaz ansyen Prezidan Mr Wavel Ramkalawan?

Eski nou vwar li i byen ki Sesel ozordi i annan en Prezidan, ki reste dan en *villa* lo Eden Island, e vin dir nou ki i pey zis R10mil par mwan? Eski sa i vedir ki Gouvernman pe kontribye *part rental* pour li, oubyen i pe ganny pour nanryen, e ki *owner* sa *villa* pe ekspekte an retour? Eski nou vreman krwar ki ozordi nou pei i vreman pe diriz ek *motto*, "*for the many, not the few*"?

Madanm Speaker, non selman koman en reprezantan LDS dan Lasanble Nasyonal, me koman en Seselwa ki viv dan sa pei mon sagrinan pou vwar sa ki pe pase, e i fer mwan pli sagren ankor ler mon vwar ki mannyer nou pei pe pli divize, e ki mannyer nou

pei pe aktyelman retourn an aryer apre tou sa progre ki nou'n fer pandan sa dernyen 5an.

Annou pa bliye Madanm Speaker, kote nou ti'n arive an 2025. En keksoz enportan ki LDS ti anmennen Madanm Speaker, se laliberte lekspresyon. E tou dimoun ti santi zot lib pou eksprim zot lopinyon- zot lekor san okenn lafreier, ki zot ti a kapab perdi zot louvraz oubyen ganny viktimize.

Sistenm ek nou pa ek nou ti nepli en konsern pour Seselwa e tou dimoun ti santi zot lib pou travay san bezwen- san bezwen kasyet zot kouler politik.

Madanm Speaker, anba Gouvernman LDS Sesel in kontiny rezouir en nivo stabilite ki'n atir lenvestisman, e devlopman dan krwasans ekonomik nou pei.

Lakantite touris ki ti pe antre Sesel ti'n ogmante par 14poursan 2025 konpare avek 2024. Dapre statistik ti annan en pti pe plis ki 340mil touris ki ti antre an 2024, me an 2025 sa sif ti monte pou ariv par lao 383mil touris.

Lenpak ekonomik touris ti'n ariv \$803milyon lafen Septanm 2025, e Sesel ti'n prevwar ki par lafen 2025 sa ti pou'n ariv en \$1bilyon.

E annou pa bliye ki *IMF* in felisit Sesel a plizyer repriz pour progre ki nou'n fer dan nou lekonomi e nou pei, la tou dernyerman nou'n tande ki *OECD* in kategoriz Sesel koman en pei ki annan bokou latransparans dan son sistenm *tax*.

Madanm Speaker, tou sa bann keksoz sete gras a en Gouvernman *LDS* ki'n redres nou lekonomi, zer larzan pei dan en fason responsab, anmenn latransparans, e promouvwar bonn governans, e kre loportinite pour tou Seselwa san get ou kouler politik.

Me malerezman- me Madanm Speaker, annou get nou pei ozordi, e nou pou vwar kote ki *US* pe *fail* pou diriz nou pei. Seselwa in fini vwar zot kler ki nou annan nou en ladministrasyon ki pa konnen ki zot pe fer, ou a krwar i annan zour zot reve, e zot vin enplimant en polisi, apre demen zot vini zot tire.

La annou zis get sa zafer gard, ki ti fer lanons ek piblik ki zot pa pou vin lo *scene* aksidan konsernan bann motoris, be eski sa ti en desizyon kot zot ti'n konsilte? Non. Eski ti en desizyon ki ti fer sans? Non.

Ki nou ti vwar apre ki Seselwa ti pe tir zot fristrasyon? Zot ti vin lo televizyon, pou re eksplike e

dir ki zot pe ranvers zot desizyon e ki tou pou retourn normal.

Annou get en lot legzanp dan lapwentman Mr Sabry Khan, ki Direkter Zeneral pour Lentelizans Sesel. Lapwentman en tel pozisyon enportan i annan son prosedir ki byen eksplike dan Lalwa.

E pou fer sa lapwentman i nesesit annan konsiltasyon avek Lasanble Nasyonal atraver Komite Ladefans. Be ki nou'n vwar Madanm Speaker? Prezidan Herminie, i vin fer son lapwentman li menm. E ler *LDS* i fer resorti kominike ki sa pa ti an lakor ek Lalwa, i ti *backtrack* e retir sa lapwentman, e apre al swiv prosedir.

Be Madanm Speaker, se sanmenm sa Parti *US* ki pe *run* nou pei. Se sanmenm sa Gouvernman ki Seselwa in donn zot manda pou vin diriz nou. Eski nou kapab annan konfyans dan lafason ki zot pe diriz nou pei?

Zot pe dir nou, *trust the process*. Be sey dir nou ki *process* nou pou *trust* ler zot napa en direksyon? En lot keksoz ki mon krwar i en konsern pour tou Seselwa, se lafason ki Gouvernman *US* ozordi pe esey enterfer avek louvraz Zidisyer.

Madanm Speaker, dan Sesel nou'n toultan annan trwa lebra pou govern nou

pei, sa se Lezislatif, Egzekitiv, e Zidisyer. E sa separasyon pouvwar i ede pou anpes labi pouvwar, akòz desizyon i ganny partaze dan sa trwa lebra.

Lezislatif i fer, e aprouv Lalwa. Egzekitiv i enplimant sa bann Lalwa, e Zidisyer i la pou enterpret Lalwa, e rezourd bann *issues* e fer sir ki Lalwa i anliny avek Konstitisyon.

Madanm Speaker, depi ler ki *US* in vin o pouvwar nou'n vwar, zot bann aksyon pou enterfer ek Zidisyer tre kler. Ki'n arive ek bann ki ti'n zize Ankour ganny trouve koupab dan sa ka leksplòzif ki zot ti pou al met lo Stasyon Petrol Grand Anse Mahe? Pa zot in ganny large.

E la nou'n tandè ki Prezidan, li menm ki pe al fer en nouvo lanket dan sa ka, akòz dapre li sa bann kondannen pa'n byen ganny zize.

Madanm Speaker, sa i montre nou klerman ki swa nou annan en Prezidan, ki pa konpran ki mannyer Zidisyer i fonksyonnen oubyen i pe klerman enterfer dan loubraz Zidisyer, e sa ki nou apel labi pouvwar.

E i enportan pou note, ki sa i pa en konsern pour zis bann siporter *LDS*, me osi zot prop siporter ki pa satisfè ek lafason ki pei pe ganny dirize.

Sa kalite lenterferans i en sinyal tre danzere pour nou demokrasi, e pou diriz nou dan en move semen. Madanm Speaker, enn bann keksoz ki bles leker bokou nou dan sa pei, se ki ozordi Seselwa i nepli santi li lib pou eksprim zot lopinyon politik, sirtou si ou pe kritik sa Parti *US*.

Annou pa bliye ki laliberte lekspresyon i en pilye tre enportan dann gouvènan nou pei, e i en drwa fondamantal koman en sitwayen nou pei.

Sa lafreyer ki nou vwar i pa pe zis enpakte sitwayen normal, me malerezman sa pe afekte menm serten nou bann zournalis ki ozordi nou war zot nepli annan kouraz pou demann kestyon oubyen menm fer reportaz lo sa bann keksoz ki nou vwar pe al mal dan nou pei.

Madanm Speaker, oli zot sa bann zournalis ozordi? Akòz ki ozordi zot prefere reste trankil? Eski zot annan lafreyer pangar zot a pas parey bokou lezot ki'n ganny viktimize dan nou pei ozordi? Oli sa bann program lokal ki nou ti vwar pase souvan lo televizyon dan letan ki *LDS* ti o pouvwar?

Sa bann program parey Lopinyon ti en *platform* pour zot koz libreman lo keksoz ki pe pase dan nou pei, ti annan diferan *expert*, e zot ti santi zot

lib pou koze akòz senpleman *LDS* pa ti viktimiz personn ler zot ti kritike.

LDS i konpran ki savedir laliberte lespresyon, e annou pa bliye ki se gras a *LDS* ki zot ti kapab fer bann tel program pou met lo medya nasyonal.

Ozordi nou pe demann alor, eski *SBC* in vin en lavwa pirman pour defann Parti *US*? Eski se sa ki Seselwa ti vote an Oktob 2020? Eski sa ki ti sa kalite medya nasyonal ki pe ganny peye ek larzan piblik ki nou oule ozordi dan nou pei?

Madanm Speaker, ozordi i annan bokou spekilasyon ki Prezidan Sesel, pe reste dan en *villa* lo Eden Island. Nou'n menm vwar dan *interview* ki Prezidan Herminie, in dir ki i pa normal pour okenn dimoun tir portre kot i pe reste, e pe sey dir ki Seselwa i merit aret demann sa kalite kestyon.

Me eski Prezidan Herminie, i okouran ki ler ou en Prezidan ou bezwen rann kont ek ou pep? Eski Prezidan Herminie, i mazine ki kantite fwa dan son kanpanyi i vin koz lo sak pti mouvman ki ansyen Prezidan Wavel Ramkalawan, ti fer?

Sak fwa ki Prezidan, ti deplase a sa letan pa bliye Mr Sebastien Pillay, a sa letan ti vin ek bann *PNQ* dan Lasanble, e la ozordi ler Mr Herminie, in vin Prezidan i pe reste dan en *villa* kot Eden

Island e ganny lodas pou dir ek pep Seselwa ki pe selman pey R10mil par mwan.

Eski i ekspekte Seselwa pou zis anval sa e pa demann nanryen? Annou pa bliye li menm ki ti dir nou i sipoze annan zis R5 dan son pos.

Madanm Speaker, atraver ou mon ti a kontan si Prezidan Herminie, ti a kapab fer nou ganny sa kontak. Akòz bokou nou bann zenn koup la deor pe rod akomodasyon, akòz i vremen difisil pou ganny en dil parey pour zis R10mil par mwan.

Madanm Speaker, sa i zis montre ou ki mannyer *US* i anvi vin diriz nou pei, zot pe fer keksoz san latransparans e pe fer dominer, e krwar ki sa pei i zis pour zot.

Zot in bliy zot promes ki zot ti fer ek pep Seselwa, latransparans pour zot pa egziste dan zot ladministrasyon. Ozordi nou vwar bann *CEO* ek lezot ki'n ganny apwente san okenn *interview*. Nou'n vwar bokou nouvo pozisyon ki'n ganny kree *State House*, e dan bann lezot Minister pou kapab byen rekonpans zot bann dalon, san gete si sa bann dimoun i annan konpetans pou fer sa travay.

Nou'n vwar bann ansyen Minis ki tin mal performen dan zot prop ladministrasyon dan lepase, in ganny resikle

dan bann nouvo pozisyon ozordi.

Ki sa pe montre nou Madanm Speaker? Savedir zot napa konfyans dan zot prop kan dan sa 34mil ekek ki ti vot pour zot mon asire ki annan bokou dimoun ek konpetans, me i malere ki zot in zis ganny servi pou met *US* o pouvwar, e apre donn pozisyon zis sa pti group ki pros ek zot.

Madanm Speaker, dan sa pti moman letan nou'n vwar bokou profesyonnel in ganny pouse dan zot travay, e parey zot kontan dir sete zot Gouvernman ki ti'n devlop sa bann dimoun pou vin profesyonnel.

Me la ozordi se zot menm ki pe deside koudpye sa bann menm profesyonnel, ozordi anba zot ladministrasyon konpetans ek leksperyans i pa en kriter ki servi pou travay dan sa pei, me plito se ou kouler politik e lwayote anver Parti *US* ki konte.

Madanm Speaker, e i enteresan pou note ki sete li menm li Prezidan Herminie, ki ti'n vin dir tre fortman a plizyer repriz dan son kanpanyi ki napa person ki pou perdi son plas travay, e i ti menm dir ki ek nou pa ek nou pou ganny kriminalize.

Andotmo, i pou en lofans anba Lalwa si en dimoun i perdi son plas travay pou rezon politik, oubyen ganny

dezavantaze aköz son krwayans politik.

Me Madanm Speaker, ler Prezidan Herminie, ti vin dan Lasanble pou lir son *SONA* i ti koz lo son bann promes ki ti'n fer ki mannyer i pe delivre zot.

Me mon pa'n tann nanryen lo son Lalwa ek nou pa ek, e mon mazine i pa anvi koz lo la aköz zot menm zot, zot in fini kas sa Lalwa a plizyer fwa. Savedir zot in *fail* sa pep ek fo promes, zot in zis bat latet e vyol konsyans Seselwa.

Madanm Speaker, Gouvernman *LDS* in toultan en parti ki'n onor son parol konsernan ek nou pa ek nou, nou aksyon i mars ek nou parol.

Me par kont, zot *US* zot pe montre nou klerman ki zot zis koz zoli parol dan zot kanpanyi, me apre zot aksyon i rakont en lot zistwar. Annou pran legzanp Madanm Speaker, ler *LDS* ti vin o pouvwar an 2020, nou rapel byen ki ti annan plizyer zofisye dan bann pozisyon byen o plase ki pa ti neseserman siport *LDS*.

Me eski *LDS* ti pous zot? Non. Madanm Speaker, aköz merit ek konpetans ki ti enportan pou ou travay e non pa ou kouler politik.

En lot legzanp, se Madanm Sherine Francis, ki *PS* Touris ki ti ganny apwente

dan sa pozisyon *PS* an 2021. Ler *LDS* ti o pouvwar nou konn tre byen ki son msye i en *Leader* en parti politik apele *Seychelles United Movement*, ki ti pe debout kont Gouvènmman *LDS*, e nou ti menm vwar Madanm Francis, vin lo televizyon pou *endorse* son msye koman kandida Prezidansyel.

Eski *LDS* ti rod fason pou fer li arete? Non. Madanm Speaker, akòz *LDS* ti rekonnet son abilite, me non pa son afilyasyon. En lot legzanp, se dan Minis Lakaz sete Minis Billy Rangasamy, ki ti annan en *Senior Public Relations Officer* Madanm Uranie, ki ti travay pros a kote Minis, e nou konn tre byen ki sa zofisye i trouv Madanm Onorab Rocky Uranie, ki en *MNA US*.

Me Madanm Speaker, personn pa ti pous li, oubyen rod fason pou fer li arete, e personn pa ti vwar li *too close to the other side*.

En lot legzanp, se Madanm Veronique Herminie, ki ozordi i *First Lady*. Madanm Herminie, ti ganny apwente koman Komisyoner *Tax* kot *SRC* an 2019, e in kontinyen son travay menm ler *LDS* in antre dan Gouvènmman ziska Zanvye 2023 ler i ti demisyonnen.

Madanm Speaker, *LDS* pa ti zanmen vwar li neser pou rod fason pou pous li men

si i ti madanm Mr Patrick Herminie, ki a sa letan i ti *Party Leader* pour *US*.

E annou pa bliye ki son responsabiltè a sa letan sete pour li anmas larzan *tax* dan pei, ki enn tre enportan. Akòz larzan *tax* ki pli gro konponan anver Bidze pei. Me *LDS* ti les li fer son travay, menm si i ti annan en koneksyon tre pros avek lopozisyon a sa letan.

Madanm Speaker, en lot legzanp e safwasi i dan mon distrik Anse Etoile menm Mr Terence Crea, ki ti en kandida *MNA* pour *US* ki ti debout a kote mwan pandan Eleksyon an 2020.

Pa akòz i ti en *US* ki *LDS* pa ti regard son abilite pour li kontribye dan nou pei, an 2021 i ti ganny apwente koman en Zofisye Prensipal dan Departman Lekonomi Ble, e in menm ganny promote pour vin en Direkter dan sa departman an 2024 anba Gouvènmman *LDS*.

Menm nou'n vwar li ankò pe partisip koman en *Polling Agent* pour *US* an 2025. Madanm Speaker, lefe ki Mr Crea, in reste dan son pozisyon i montre ou klerman ki anba *LDS* tou Seselwa ti annan son lopòrtinite pou travay, e pou progrese. Nou pa ti zis koze, me nou aksyon ti demontre sa vre sanzman ki nou ti toultan anvi vwar dan nou pei.

E pour mwan i malere ki ozordi US pe fer retournen sa move pratik viktimizasyon. Madanm Speaker, annou pa bliye ki sa parti in sanz son non a plizyer fwa, me i kler ki zot konportman e latitud pa'n zanmen sanze.

Sa i vreman fer lapenn pou vwar sa zistans kot Sesel ti'n arive, e pou aprezan retourn ankor dan sa lepok fernwar.

Madanm Speaker, nou'n vwar resaman lafason ki Vis Prezidan Mr Sebastien Pillay ti pe koze lo televizyon lo sa nouvo Proze Konblaz kot Ile Aurore, e i malere pou dir ki Mr Pillay, ti'n vin koz avek en to nasyon larogans ler ti dir klerman, "ki napa personn ki pou vin dir Gouvernman ki pou fer avek sa bann later." E sa menm si sa bann later pou ganny peye avek larzan piblik.

Dan plas vin reazir piblik ki Gouvernman pou annan konsiltasyon avek bann diferan *stakeholders* pou rod meyer fason pour nou servi sa bann later, i vin koz ek Seselwa konmsi later i pour zot personnelman.

Menm si Gouvernman i ava pran desizyon final Mr Pillay, i merit realize ki sa pei i pour tou Seselwa e nou tou nou annan en drwa koman en sitwayen, e nou tou nou merit kapab osi donn nou kontribisyon pour nou pei.

Madanm Speaker, pou konklir. Mon santiman ozordi i pa zis koman reprezantan mon distrik, me koman lavwa tou Seselwa ki pa pe ganny ekoute ozordi.

I lavwa tou bann travayer ki'n ganny mete de kote, e i lavwa tou bann sitwayen ki anvi en Gouvernman ki vreman servi tou Seselwa e non pa zis en pti group privilezye.

Dan son premye 100 zour nou'n vwar en Gouvernman ki ti'n promet sanzman, me i pa'n gard son promes. Oli sa R10mil ki ti promet nou bann dimoun aze? Oli sa 40poursan ki ti pou tire lo tiket bis pou ariv R6?

Nou ankor pe espere pou konnen lekel ki ti deter sa de lekor mor Takamaka, aköz se li menm Prezidan Herminie, ki ti dir fer li konfyans e i a dir nou lekel ki responsab.

Prezidan Herminie, pa bliye ou'n promet nou bann zenn ki zot pou kapab vin milyonner, e nou bann zenn i ankor pe espere ki sa zour.

Nou'n vwar en Gouvernman ki'n anmenn divizyon ki pe mank latransparans, en Gouvernman ki pe retourn anver bann pratik ki nou ti krwar ti'n fini, bann keksoz ki LDS ti'n lager pou gannyen parey laliberte lekspresyon, latransparans, meritokrasi,

ozordi tousala pe ganny menase.

Nou bann zournalis in plifere reste silans, nou bann profesyonnel i pe ganny pouse akòz afilyasyon politik e i annan en konfizyon lo lafason ki bann desizyon pe ganny pran. Oli sa Lalwa ek nou pa ek nou?

Madanm Speaker, vre *leadership* pa vèdir labi pouvwar oubyen rekonpans bann dalon, i vèdir ekout pep-ekout lepep, respekte Lalwa, e gard prensip lazistis ek latransparans.

I vèdir konstri en nasyon kot tou Seselwa i annan menm loportinite pou avanse. Mon bann frer ek ser Seselwa, annou mazin progre ki *LDS* in anmennen e annou refize pou retoun dan politik lafreder ek politik dalon.

Annou kontinyen demann sa Gouvernman pou rann kont zot bann aksyon, annou defann nou laliberte ki nou'n gannnen avek bokou sakrifis, e annou travay ansanm pou konstri en Seselwa ini, zis, e prospere pour tou dimoun.

Seselwa i en pep ki ranpli ek matirite *and we deserve better*. Mersi Madanm Speaker.

(APPLAUSE)

MADAM SPEAKER

Bon nou ava prezan pran en *break* ziska 2er apre midi.

(BREAK)

MADAM SPEAKER

Bon nou ava rebran Deba lo Ladres Prezidan Leta lanasyon. Zis avan nou- mon donn lot Manm laparol pour li fer son prezantasyon, zis en pti *reminder* pour tou bann *Members* pour nou obzerv nou *Standing Orders* letan i annan Manm ki pe koze, annou ekoute avek *minimum* lenteripsyon silvouple. Lot dimoun lo lalis i Onorab Sandra Sultan.

HON SANDRA SULTAN

Madanm Speaker. Tou Manm Onorab, pep Seselwa ki a lekout, bonn apre midi. En apre midi spesyal pour tou zabitan Anse Aux Pins.

Mon la devan zot ozordi avek en leker ranpli avek rekonesans, respe ek determinasyon, akòz sa lannen i fer 50an depi ler ki Seselwa ti deside debout lo son lipye pour gouvern son lekor, pour definir son lavenir, e pour plas son desten fermeman dan lanmen son pep.

Se pour sa rezon ki ozordi mon pe reprezant mon distrik Anse Aux Pins dan sa Lasanble Nasyonal. Madanm Speaker, Anse Aux Pins

pandan sa dernyen 10an in ganny neglize.

Wi, 10 lannen kot nou bann bezwen pa'n ganny tande, kot dimoun in perdi lespwar, kot bann promes in reste zis parol lo papye.

Nou bann lenfrastriktir pa'n ganny mentenir, larout in deteryore, rigol in plen ek salte, e bann landrwa piblik in vin dan en leta abandonnen.

Ni en sel lakaz pa'n ganny konstri pou soulaz soufrans nou bann fanmir ki pe espere, zarden zanfanki ti enn fwa ranpli avek sa bon zwa de viv in vin gran bwa, zenn dimoun in ganny neglize napa aktivite, napa devlopman, napa sans pou devlop zot talan oubyen trouv en loubraz. Nou bann zenn in ganny met de kote.

Sa se pa zis en mankvizyon, me zot in trair sa konfyans ki serten zabitan Anse Aux Pins ti met dan zot. Mon'n erit en distrik kales kase kot bokou proze in reste zis dan *file*.

Me ozordi Madanm Speaker, mon la e mon pe dir avek zabitan Anse Aux Pins, i fer premye fwa dan listwar Sesel ki en Gouvernman i delivre sitan kantite dan telman en pti git lespas letan.

I pa'n anvoy person bat kannel dan bwa, dan sa premye 100 zour ki nou'n o pouvwar nou Gouvernman in

azir tre ferm, nou'n remet lord e relev konfyans nou pep, e sa in fer nou konpran ki en Gouvernman ki met son pep avan tou.

I pa en Gouvernman ki ou le *micromanage* tou, me partaz responsabilite avek son bann Minis e lezot zofisye. Sa premye 100 zour pa ti zis promes, me aksyon konkret.

Zot in esper ase lontan, me plito tar ki zanmen. Sa desizyon ki zot in pran dan sa dernyen eleksyon ti vo lapenn. Akoz mon dir sa? Se premyerman sa Gouvernman in deside pou repas lo tou nou sistenm konpletman.

Lafason ki nou edike, gouvernen, investir, e pran swen avek nou pep. Sa i vedir abandonn sa ki nepli marse pour nou, e avek kouraz batir sa ki nou vreman bezwen.

Depi premye zour sa Gouvernman in reafirm Seselwa ki zot sekirite i touzour bezwen fonde lo Lalwa, e respe pour drwa lezot. Sa ki enposib pou serten in vin en realite anba nou Gouvernman.

Long service allowance avek trez mwan saler in fer nou zabitan rezourir zot kouraz, e zefor ki zot in donneren pandan lannen. Nou bann dimoun aze ki ti pe ganny difikilte pou fer de bout zwenn, sekirite sosyal in monte pou vin R7,400 par

mwan, e i pou kontinyen monte gradyelman pour li ariv son 10mil.

Nou konn tre byen ki Sesel nou bann zabitan laplipar i komans travay tre zenn. Ou sa ansenyan ki ou nepli annan pou donn ou bann zelev aköz ou'n epize, la ou a kapab pran ou retret e ganny ou sekirite sosyal a laz 63an. Ou sa peser ki'n touzour leve debourye, nou konnen ki lavi peser i vremen dir, la ou osi ou a kapab ganny ou sekirite sosyal a laz 63an.

Ou sa travayer lotel ki pou 30an ou lavi ou'n leve 3er bomaten pou al vey bis pou al travay, la ou osi ou a kapab rezouir ou sekirite sosyal. Sa *nurse* e lezot travayer ki'n kontribye bokou dan devlopman e progre nou pei, la i letan pour zot rezouir zot benefis.

Madanm Speaker, langazman sa Gouvernman i tre kler. I fer sir ki'n met plis larzan dan pos Seselwa, anba sa Gouvernman nou distrik pou kontinyen bouze, e biznes *daycare* pou kontinyen agrandi.

Mon'n ganny bokou *call* ankourazan sorti kot bann paran ki annan zanfandan *daycare*, e *child minding* apre sa lanons ki sa ki dan bezwen zot pou ganny ankor en lasistans adisyonnèl R750 par

mwan pou ed zot pey zot *daycare*.

Bann zabitan i dir sa Gouvernman, mersi. Aköz sa i ed zot pou met plis larzan dan pos bann ki pli vilnerab. Dan Anse Aux Pins laplipar boutikye i Endyen, e zot tou zot koz menm langaz.

Marsande in vin an ven, byento nou distrik pou ganny en brans *supermarket STC*, apre sa lanons Gouvernman pou azout lezot komodite lo lalis prodwi esansyel, sa i ankor- sa ankor i pou ede pou met larzan dan pos Seselwa.

Alors, par entrodwi sa kart *STC* sa in soulaz bokou bann soufrans nou zabitan ki pe war zot pa pe kapab soutenir pri lavi. Mon konnen ki nou bann papa e manman ki pe war zot dan bokou difikilte in byen akeyir sa lasistans, zabitan byento pri bis osi pou desann par R2. Sa i anliny ek plan Gouvernman pou tir presyon kotidyen lo nou bann zabitan.

Madanm Speaker, reform dan ledikasyon i en nesesite pou ganny bann sitwayen ki kapab pran plas dan sa lanplwa, ki zot kapab ede dan devlopman e lekonomi nou pei. Ledikasyon i fondasyon loportinite e paspor pou prosperite, i pa konsern selman sa endividi, me i konsern sa nasyon ki nou pe batir.

Ler Program TVET ki dan lekol pa pe swiv nou bann zanfana, e zanfana pe kit lekol anba sa program. Eski nou ti pe donn zot en paspor pour prosperite, oubyen nou ti pe detri zot?

Zabitan Anse Aux Pins, les mwan dir zot ki nou'n erit en sistenm ledikasyon ki ti dan kriz, tro bokou etidyan ti pe kit lekol, sa bann skil ki zot bezwen pou travay- san sa bann skil ki zot bezwen pou travay.

Bann zenn i santi ki sa sistenm pa ti fer pour zot reisir, se pour sa rezon ki Gouvernman *United Seychelles* pou konstri en Sant Letid Vokasyonnel e Teknikal Modern, sa mon konnen pou benefisye bokou zenn dan mon distrik, e pou osi ede redwi lakantite travayer etranze dan pei.

Bann ansenyan ki pe travay anba bokou presyon, mon lans en lapel avek bann zenn Seselwa, pou pa per pran karyer ansenyan. En zanfana i bezwen sipor lakominote pour li grandi dan en lanvironnman ki an sekirite.

Alors, mon pe demann tou bann ansenyan pou donn lanmen prepar nou bann zenn. Non pa zis pou legzanmen, me osi pou viv, travay, e kontribye pozitivman dan lasosyete.

Ansanm nou a ede redwi lakantite etranze dan sistenm. I sagrinan pou war ki annan lekol kot 80poursan *staff* i etranze, e sa i pa akseptab.

Mon profite pou enform nou bann zabitan ki lekol Pointe Larue Segonder kot nou bann zanfana i al kontiny zot letid byento pou ganny repare.

Gouvernman in met an plas en Komite ki pou kordin reform dan Ledikasyon, mon konvenki ki sa Komite pou byen kordin sa reform, e donn bann bon konsey ki amelyor ban sistenm ledikasyon e fer li pli gou pour zanfana al lekol e pou donn ansenyan plis sa lanvi pou leve bomaten, e pou al debourye.

Nou Gouvernman pe al investir dan ledikasyon, devlopman skil, lantreprenarya, kiltir, e sport, e lekonmi elektronik pour ki nou bann zenn pa ganny kit deryer dan laliny progre.

Bann zenn, mon demann zot pou servi tou sa loportinite ki sa Gouvernman pou met a zot dispozisyon. An Avril nou bann zanfana S3, S4, S5 ki anvi devlop plis konesans e leksperyans dan landrwa travay pou ganny sa loportinite pandan vakans pou ganny plasman dan lanplwa.

Sa pou donn zot lespas pou fer leksperyans travay, atraver nou Gouvernman byen responsab in fer provizyon ki

en pti *allowance* ki pou soutenir zot, e ankouraz zot.

Dan ka lozman, Anse Aux Pins i en distrik ki anba ansyen Gouvernman *SPPF* in benefisye plizyer *estate*, tel ki Chetty Flat, Karyol, Bodanmyen, e *Ex-Onezime Estate*.

Me ki nou vwar apre pei in sanz lanmen e nanryen pa'n ganny fer lo kote lozman dan Anse Aux Pins, santenn i ankor pe espere. Me ozordi avek lafyerte mon pou dir avek mon bann zabitan pa dekouraze, nou Gouvernman ki la pa'n zanmen bann *fake profile*, me i en Gouvernman ki met son pep o sant devlopman.

Se pour sa rezon, ki mon fyer ki mon Gouvernman in fini garanti larzan pou konstri plis ki mil lakaz komansman sa lannen, e mon reste konvenki ki par 2030 nou pou lo larout pou fini konstri 2000 lakaz. E dan menm laliny se avek gran plezir ki mon le enform zabitan Anse Aux Pins ki lontan pe kontribye pou ganny zot lakaz, en Proze Lakaz 32 *unit* lo lanmar Karyol pou byento komanse, e byensir byento zot pou ganny zot nouvo lakaz.

Mon okouran ki lalis pour lakaz dan mon distrik i ase long, me sa pa fini la. Koman en Pti Leta Zil avek tre pe teren ki kapab ganny

devlope, Sesel i fer fas avek bann kontrent later ki reel e bann defi lenfrastriktir.

An rezilta sa i ankor reste plis ki 430 aplikan ki pe esper later *landbank*. Alor, bann zabitan Anse Aux Pins ki pe esper en bout later, mon le enform zot ki nou Gouvernman in deside pou azir dan en desiziv.

An 2026, i pou delivre omwen 150 morso later rezidansyel ki ava koup lo lakantite dimoun ki pe espere par omwen en tyer dan sa premye lannen son manda avek plan pou delivre plis morso an 2027.

Avek proze konblaz ki pou komanse tre byento, plis ki 570mil met kare nouvo later pou ganny met a dispozisyon pour proze lakaz, lekol, e lezot devlopman lo Ile Aurore.

Listwar fodre toultan pe ganny akonte, anvi ki nou fek pas atraver sa levennman abolisyon lesklavaz les mwan fer nou lazenes konpran ki a sa lepok lamazorite later ti pou bann gran blan.

Gras a en zonm brav, determinen, e vizyoner ki ti rediriz- redistribye later- redistribisyon later ti ganny fer. E sa in benefisye bokou bann ki ti les- bokou bann ki ti lesklav, e ki'n sorti dan desandans lesklav.

Madanm Speaker, sorti lo proteksyon sosyal pou al

dan lanplwa. Anse Aux Pins i en distrik kot bokou fanmir pe ganny afekte par labi sibstans, reentrodiksyon *APDAR* a ede rezourd sa bann problemn.

Mon oule asir zabitan ki demars pou konstri en Vilaz Reabilitasyon pou komanse byento, e sa pou soulaz sa bann *addict* ki souvandfwa zot in dir mwan anvoy zot lo en zil pour zot kapab sorti dan sa fleo.

Sa sant i pou en loportinite ki anvi refer- sa sant i pou en loportinite bann ki anvi refer zot lavi, e avek lespwar ki zot a ganny aksepte dan zot fanmir. Sa sant pou osi rezourd sa problemn kot bokou ki vin pran zot *methadone* zot fer group e deranz lantouraz.

Lapros sa Gouvernman i kler, sipor i sipoze en pon e non pa en destinasyon. Set alors ki *Employment-Unemployment Relief Scheme* pe al ganny ranforsi, lobzektif se pa pour ki nou bann dimoun i depan lo la, me ki nou reentegre zot dan prodiktivite.

Mon konfidan ki bokou nou bann *addict* apre ki zot in ganny trete zot pou kapab travay, kontribye dan lekonomi pei. Bann manman ek papa ki lo sibstans zot osi zot annan zanfan, e zot osi zot merit en lanplwa pour zot kapab sonny zot zanfan.

Minister Lazenés ek Spor pe revwar son striktir pou kapab pli byen enplimant son bann program, Minister pou fer ki nou annan polisi an plas pou siport lavansman spor e lazénés dan Sesel.

Divizyon Resours Imen, osi i la pou fer sir ki bann travayer osi zot *welfare* i ganny get ladan, la i fer mwan mazin bann travayer ki ti ganny demote dan zot pozisyon travay zis aköz rezon politik.

Avek lagras Bondye zot demann byento a ganny aksepte. Zenn i fitir nou pei, alors, i enportan ki zot annan en lavwa dan polisi. Byento nou pou reform nou Komite Lazenés dan distrik, e mon pe lans en lapel avek tou bann zenn pou koste e ansanm pou relev Anse Aux Pins.

Byento Minister Lazenés ek Spor pou etabli sa *Youth Empowerment Council* pou imantisipasyon bann zenn pou formaliz partisipasyon bann zenn dan prosesis fer desizyon o nivo nasyonal.

E la mon pe lans en lapel avek bann zenn kalib e konpetan dan Anse Aux Pins, profite servi byen sa servis, pa per pou bouz devan pei i bezwen zot.

Mon osi konvenki ki Minister Spor avek Minister Ledikasyon i reget spor lo nivo lekol. Mon pa konpran aköz ki

etranze pe fer *P.E* dan lekol, oli nou Seselwa?

Zabitan Anse Aux Pins, si nou mazin byen lekol Anse Aux Pins ti parmi bann meyer lekol dan Sanpyonna Atletik, e sa ti fer nou fyer. Mon lans en lapel avek bann zabitan pour zwenn mwan pour nou donn sipor e relev nou lekol.

Paran dan mon distrik ki annan zanfan avek bezwen spesyal, zot osi zot bezwen louvertir ver dinyite, travay, e kontribisyon. Okenn zanfan pa sipoze ganny kit deryer aköz sirkonstans lavi, la mon pe mazin bann paran avek bann zanfan ki Otizm.

Mon ou le fer zot konnen ki byento nou Gouvernman pou konstri en Sant Otizm, e en lekol- e en nouvo lekol pour bann zanfan eksepsyonnel. Sa i ede donn plis sipor, e soulaz bann paran ler zot a vwar zot zanfan pe entegre pli byen dan lasosyete.

Lo kote lagrikiltir dan Fon Devlopman Lagrikiltir, en total R76milyon an tou pou ganny bidzete pou ranforsi lagrikiltir soutenab, e diriz linovasyon dan sa sekter dan sa premye kar 2026.

Parmi sa 76milyon, en sonm pou ganny servi pou donn lasistans pour en varyete proze lagrikiltir, sa i fer ki mon pou met lanfaz ki byento Anse Aus Pins a ganny son bout later ki a ganny demarke pour

lagrikiltir, kot fermye a kapab kontinyen kontribye dan prodiksyon lokal, e ede dan lekonomi pei.

Madanm Speaker, lo size rekonpans bann viktim *TRNUC* a lafen zot a kapab rekonpans sa bann viktim ki pandan sa dernyen 5an zot ti pe zis troun an ron apre zot rekomandasyon. Sa bann viktim ki lontan pe esper pour zot ganny konpansasyon.

Anba nou Gouvernman en sonm R20milyon pou dedye dan Bidze 2026 pou pey bann viktim zot konpansasyon dapre zot merit. Annou *trust the process*.

Madanm Speaker, sistenm lasante in tonm an rin anba sa ansyen Gouvernman, ler nou Gouvernman ti antre lofis, nou ti erit en sistenm lasante ki ti anba presyon konsiderab, ler *Peace Ark* sa *Chinese vessel Hospital* ki ti vizit Sesel an 2024, tou dimoun ti soke lo lakantite Seselwa ki ti swaf sa servis.

Nou ti ganny dir par ansyen Gouvernman ki fodre nou *sponsor* pour nou ganny en nouvo lopital, ozordi mon bann dimoun Anse Aux Pins nou tre fyer pou tann nou Prezidan, dir ki zot in fini ganny larzan pou konstri en nouvo lopital modern.

Kwa ki fer mwan pli fyer? Se ki travay pou komanse pli tar sa lannen. Byento nou pou

osi ganny nou nouvo klinik ki ti osi enn parmi nou proze pandan letan ki nou Gouvernman ti o pouvwar. Prezidan, in fer resorti ki nou en sel nasyon e nou pa pou kit personn deryer.

Madanm Speaker, lasante mantal ozordi i ganny rekonnet koman pli gro problem dan pei. Kreasyon sa nouvo Lazans Lasante Mantal pou pli byen fasilite bann kanpanny *outreach*, e sansibilizasyon kominote.

Sa lazans a ed Seselwa pou sanz zot persepsyon lo lasante mantal, a ede normaliz konversasyon otour lasante mantal, a ede koz lo sa stigma kot souvandfwa in anpes dimoun pou rod led.

Parey enn mon zabitan in fer mwan konpran, ki annan ansyen politisyen ki pe soufer avek sa problem mantal sever. Me ki pa per pou vin rod led, dan zot ilizyon zot pe mont *State House* 2027. Ler nou war zonm pe asize, e vey rob ek kaba madanm, vre zot pe sibir kondisyon lasante mantal sever.

(APPLAUSE)

HON SANDRA SULTAN

Mon zabitan fodre nou kontinyen ankouraz sa bann dimoun ki pe soufer avek lasante mantal pou vin rod sipor boner, e sa i a fer zot

retourn dan zot leta lespri normal pli vitman ki posib.

Komet swisid pandan sa dernyen 5an ti'n vin alarman, e zot ti pe per pou koz lo la piblikasyon ka lo medya ti ganny fer arete, sa size ti'n vin tabou. Par lenplimantasyon sa lazans zot pou osi ranforsi sipor edikasyonnel pour bann zanfann ki annan devlopman laservel diferan donn sipor, e resours bann ansenyan ki zot a kapab travay pli byen avek sa bann zanfann.

Mon konnen ki sa Lazans pour Proteksyon Sosyal ansanm avek sa Lazans pour Lasante Mantal a tonm lo en konklizyon pour ki nou bann pasyan ki ganny sertifye, e ganny kouver anba lasistans, e ki pe soufer avek lasante mantal pa pou bezwen war zot pe monte desann pou renouvle zot Lagreman kot Lazans Proteksyon Sosyal.

Sa Madanm Speaker, i fer mwan mazin enn mon zabitan ki son frer pe soufer pour en bon pe lannen avek lasante mantal. Me ozordi in ariv en staz ki i nepli kapab al renouvle son Lagreman, e in war li ki pour sa dernyen 5an i pa'n ganny peye son lasistans.

Son ser ki li osi i en pansyoner, in bezwen war li pe donn sipor son frer. Sa ti en reaksyon sa ansyen Gouvernman enkonpetan. Sa

Madanm Speaker, i pa akseptab.

Alors, par kreasyon sa lazans mon senserman krwar ki lavi sa bann pasyan a vin pli eze. Parey bokou in dir, si en dimoun in koup lipye, sa lipye pa pou zanmen repouse.

Alors, annou set soutenir li ziska son lanmor. Lenkyetid, depresyon, adiksyon, e troma i afekte bokou nou zabitan e fanmir, bann landrwa travay e kominote. Zabitan annou *trust the process*, aköz anba sa ladministrasyon tou pou sanze.

Finalman, pou konklir mon ti a kontan dir avek mon bann zabitan, annou kontinyen *trust the process*, annou reste sa sosyete inifye ki annan konpasyon ki batir lo dinyite, loportinite, e rezilyans kominoter, annou al an avan ansanm.

Akoz parey nou Prezidan, in dir, “Sa Sesel ki nou pe batir, i pa zis pour ozordi me i pour nou zanfán, nou pti zanfán, e tou sa ki en zour i pou apel nou bann zil se zot.” *United Seychelles*, pe delivre pour nou tou, non pa pour zis en bann. Mersi Madanm Speaker.

(APPLAUSE)

MADAM SPEAKER

Onorab Gervais Henrie.

HON GERVAIS HENRIE

Mersi Madanm Speaker. Bonn apre midi tou dimoun ki pe swiv travay Lasanble Nasyonal pou sa Mardi apre midi.

Madanm Speaker, letan nou'n rebran travay apre midi, ou'n rapel bann Manm pou evok lespri nou *Standing Orders* e dan sa menm lespri mon rezwenn ou ki mon krwar bann Manm i osi bezwen koz laverite.

E depi bomaten i annan 2 Manm Elekte ki non selman pa'n koz laverite avek Lasanble Nasyonal me pli enportan zot pa'n koz laverite avek distrik ki zot pe reprezante atraver zot eleksyon.

Premyerman mon oule rapel bann dimoun Anse aux pins ki an Out 2022 zot ti ganny zot 6-*unit* lakaz, tou sa bann *unit* i 3 lasanm e i ti kout Gouvernman *LDS* R5.5milyon *housing estate* Ex-Onezime.

(APPLAUSE)

HON GERVAIS HENRIE

Dan menm lespri laverite pou bann zabitan Bel; Air an Out 2023 zot ti ganny zot 6- *unit* 2 lasanm ki ti kout Gouvernman *LDS* 1- plito R8.1milyon Sans Soucis Bel Air. Nou bezwen evok laverite avek Lepep Seselwa Madanm Speaker.

(APPLAUSE)

HON GERVAIS HENRIE

Madanm Speaker, dapre Prezidan Patrick Herminie, pli gran kriz ki Sesel pe fer fas avek se Koripsyon. Dr Herminie ti selman 97 zour o pouvwar letan in fer sa deklarasyon. I kler alor ki son lentansyon se pou fer kwar ki ladministrasyon sortan ti koronpi.

Plitar mon pou retourn lo stratezi ki i pe met an plas pou esey akonplir sa misyon. Pourtan letan Prezidan Wavel Ramkalawan ti vin opourvwar an Oktob 2020, Sesel ti klase 27enm lo Lalis Lendeks Persepsyon Kont Koripsyon.

Ziska ler in kit *State House* lannen pase, in anmenm Sesel ankor pli o lo sa lendeks anpasan par 23enm, 20enm e pou fini dan 18enm pozisyon, ki'n toultan plas pti Sesel premye lo Kontinan Lafrik e sa i merit en lafyerte pour nou nasyon.

(APPLAUSE)

HON GERVAIS HENRIE

Si vreman, koman en pei nou sa sitan koronpi parey Dr Herminie pe fer nou kwar, annou aret koze e komans pran aksyon.

Letan, ki ou'n pas Lalwa pou fors madanm avek zanfann bann politisyen deklar zot byen, diriz par lekzanp. Pa

esper Komisyoner May de Silva vin rod zot.

Ou ansanm avek ou fanmiy, ou bann Minis ek zot fanmiy e bann Manm Lasanble Nasyonal ou parti avek zot fanmiy depi an Desanm lannen pase ti'n merit pran sa pa e deklar zot byen volonterman.

Nou pa obliye ki dan 7enm Lasanble, 2 *MNA US* pa ti deklar zot byen. Mon siport Onorab Georges ki Prezidan i merit fer deklarasyon son byen en dokiman piblik.

E annou al pli lwen ankor, fer tou travayer servis piblik ki dan pozisyon aparti Direkter anmontan osi deklar zot byen ansanm avek sa ki pour zot fanmiy.

Sa ki nou bezwen pran kont, aköz lakantite larzan ki Leta i depanse dan bann kontra sak lannen zis pour donn en lekzanp total sa premye 10 kontra, dan sa bann kategori swivan, an 2023 Leta ti depanse i koumsa; -

R236milyon pour konstriksyon.

R107milyon pour servis avek byen e R31milyon pour konsiltasyon.

Koman Manm Lasanble, nou okouran nivo risk koripsyon dan servis piblik ki enkli labi lotorite pour gen personnel, enfliyans dan prosedir *tender*, anploy fanmir, zanmi avek galan, e

vann lenformasyon. Nou bezwen aret koze e pas lo aksyon.

Aret *harass* e anmar lanmen nou sel lenstitisyon ki pe lalit kont koripsyon e sa se ACCS.

Respekte plito e ranforsi son lendepondans, donn li lespas e permet li fer lenvestigasyon lo okenn dimoun irespektiv zot stati avek zot ran dan nou pei.

Inisye bann reform nesaser dan nou sistenm lazistis kriminel, atraver konsiltasyon konzwent ant Lekzekitif, Lezislativ e Zidisyer.

Pey bann travayer Gouvernman bann saler konpetiv e fer saler sekter prive vin konparab avek sekter prive pou retenir e atir meyer talan e redwir tantasyon pour zot pran gous.

Fer koripsyon vin en akt ki riske e ki annan konsekans grav. Sa ki koupab pe merit ganny kondann prizon, fodre zanmen zot ganny gras oubyen pardon Prezidansyel.

Annou elarzi rol avek kapasite ACCS pou li vin pli proaktiv, non selman dan ledikasyon e konsyantizasyon piblik lo koripsyon, me i merit kapab pe ekzamin bann prosedir entern bann lazans piblik pou minimiz loportinite koripsyon.

E nou merit asire ki regilyerman nou pe reviz nou Lalwa, mekanizm e standar Anti-Koripsyon pou asire ki i reste anlinny e an konformite avek bann meyer pratik enternasyonal parey Konvansyon Nasyon-z-ini kont koripsyon e osi Sant Kordinasyon Anti-Koripsyon Enternasyonal i demande.

Se sa lenerzi e lantouzyazm, mon ti espekte pe antann Dr Herminie koz avek si vremen koripsyon i lo sa lanpler ki i pe fer nou kwar me Dr Herminie in fer tou le kontrer. Dan son premye Bidze ki in prezant avek Lepep Seselwa semenn pase, in koup Bidze ACCS par plis ki R10milyon.

Enn bann pli gran koupir dan sa Bidze. Ki mannyer ou koz koripsyon labous plen, me ou koup Bidze sa sel lenstitisyon ki pe lit kont sa ki ou'n dekrir koman pli gro problemn ki Sesel pe fer fas avek.

Ou'n fini anmar lanmen ACCS, si sa pa zis en fars, mon pa konnen kwa ankor. Nou bezwen rapel ki i annan en kantite travay ki'n ganny fer ziska prezan pou lalit kont koripsyon isi. Pou deklare ki koripsyon i pli gro problemn, san anmenn okenn levidans e laprev i met repitasyon Sesel a risk.

Annou pa obliye ki pou batir en bon repitasyon e lentegrite i vin avek bokou difikilte e perseverans, me ki kapab ganny detri zis dan detrwa segonn akòz parol, san reflesir. Parol avek aksyon i 2 keksoz.

Pou konvenk nou ki i serye dan lalit kont koripsyon, Dr Herminie i oblize *come clean* lo sa skandal *villa* 106 lo Eden Island. Sa ki pe peye? Konbyen pe peye? E ki son koneksyon avek propriyeter sa *villa*?

Pou konvenk nou ki i serye dan lalit kont koripsyon, Dr Herminie i oblize *come clean* lo tranzaksyon kare later *S9811* ki li avek son madanm ti ganny en *buy* 60an lo la atraver zot lakonpannyen *P&V (Pty) Ltd* pour lavalè R35,340 le 29 Zanvye 2016 e apre revann pour en sonm R1milyon 875mil le 19 Fevriye 2016, 21 zour plitar.

Pou konvenk nou ki i serye dan lalit kont koripsyon, Dr Herminie i oblize *come clean* lo dosye *Radovan Krejcir*, eski i konn keksoz dan sa zafer fo paspor e dan biznes ‘*King Cars*’? Eski sa dosye i merit annan en lanket ladan?

Pou konvenk nou ki i serye dan lalit kont koripsyon, Dr Herminie i oblize *come clean* lo son rol dan dosye lakonpanyen *Wellpoint* ki ti annan en kontra *maintenance*

avek 5enm Lasanble ler i ti Speaker.

Si oparavan i enplike dan en fason ouswa en lot dan tou sa skandal, la aprezan ki i Sef Deta, Sef Ekzekitiv e Komandan Sef, kwa ki nou kapab ekspekte.

Sa 5 pardon Prezidansyel ki in donnen dan son premye 100 zour, pour mwan i reprezant labi pouvwar e i en Lartik Konstitisyonel ki fodre 8enm Lasanble i pran bann mezir legal pou anpes repete alavenir.

Letan Dr Hermine i dir nou in fini aste sa 22 poursan par dan *Nouvobang*, ki en mansonz *a mon avis*, ki in fer devan Lasanble, larzan pou konstri lopital Sesel, larzan pou konstri 1000 lakaz sa lannen, larzan pou konstri 4 nouvo sant reabilitasyon.

Mon konnen ki enn se Gouvernman *UAE* ki pe finanse baze lo en lanons ki ti fer depi an 2019, sa 3 lezot e tou sa lezot tranzaksyon finansyel ant son ladministrasyon avek bann donater envizib fodre met Lepep Seselwa okouran lekel zot e ki nou pe donn zot an retour.

Si non pour mwan i kler ki Dr Herminie pe vann Sesel anretour pour Zil Assomption; ki in annan lenterferans bann Gouvernman etranze dan eleksyon Sesel lannen pase e

tousala se bann aksyon koronpi.

Dezyenm pli gro defi ki nou pei pe fer fas avek dapre, Dr Herminie se drog. E la Madanm Speaker, mon pa enpresyonnen avek lapros son ladministrasyon ver lalit kont drog. Dr Herminie depi ki in pret serman koman Prezidan, in annan 3 lokazyon pou etal son plan vizavi lalit kont drog avek Lepep Seselwa.

E nou isi koman Manm Lasanble, nou bezwen konn sa plan byen. Premye diskour ti son sèmantasyon lo Stad Linite, le 14 Novanm 2025. Atraver son premye diskour la anndan an Novanm lanenn pase e Mardi pase alokazyon son premye Diskour lo Leta Lanasyon.

Gouvernman i annan li en devwar moral pou devwal son plan pour nou konnen ki manyer nou pou ede e asiste li an term aprouv Bidze, pas son bann Lalwa, fer *oversight* e promouvwar ledikasyon dan lakominote. La ler nou pe koze, son plan i ankor pa kler.

Pour mwan lalit kot drog i annan 3 konponan: - *Enforcement*; kot bann lafors sekirite enkli larme, lapolis, Zidisyer, servis Ladwann, prizon, partener etranze, lotorite finansyel eksetera ki enplike. Sa nou apel *supply reduction*.

Prevansyon ouswa ledikasyon: - pou anpes nouvo dimoun komans servi drog e la se legliz, Sosyete Sivil, medya, lafanmiy e kominote ki enplike.

Finalman reabilitasyon: - Ant 2018 ziska sa lannen, leta Sesel in depans en total R326.5milyon atraver Bidze anyel lo program prevansyon avek reabilitasyon atraver APDAR e apre DSAPTR. Sa ti depi Dr Herminie ti SS. Pour sa kalite kapital ki leta Sesel pe envestir dan sa bann adik fodre ki sa ladministrasyon i reasir nou valer pour larzan.

Sa ki mon anvi tande e konnen se plan detaye son ladministrasyon kont trafik drog, pou protez Lepep Seselwa e dil avek bann trafikier ki bann kriminel aköz zot aksyon pe touy nou bann frer avek ser Seselwa.

Dr Herminie i oblize donn stratezi e plandaksyon son ladministrasyon, bann group ki zot pe targete, lenstitisyon zot pe travay avek, parmi bokou lezot pwen ki *a mon avis* ava enspir Lepep Seselwa ki sa ladministrasyon i konnen ki pe fer.

Sirman larg trafikier drog ki'n fer soufer lazenes, soufer bann fanmir, soufer nou kominote e soufer nou pei pa en aksyon nob e enn ki enspir nou nasyon ditou.

Oli solidarite *US* avek zenn ki'n tonm dan adiksyon, bann ki'n perdi zot lavi? Oli solidarite *US* avek sa fanmir ki pe soufer akòz sa malpropte ki zot pros in tonm ladan? Eski solidarite *US* i avek trafiker drog?

Madanm Speaker, an komansman son diskour par koz lo 50enm laniverser lendepandans, i kler ki lentansyon se pou fikse regar nou popilasyon lo sa prosen 50an, ziska 2076.

Nou bezwen asire sa Sesel ki nou pe kit avek nou zanfan i pli prospere, an sekirite, e enn bokou pli ere ki sa nou ti erite. Sa traze devan nou i enn long, me nou bezwen avoue ki nou'n deza pran bann premye pa ou menm bann lepa pli difisil.

Sa ki nou pa bezwen se okenn politisyen ki zis vin promet nou en zoli zimaz dan nyaz. Fodre ki zot montre nou levidans pou sipòrt bann deklarasyon ki zot fer.

Si nou'n fini ganny larzan pour lopital, konbyen nou'n gannye e kote nou'n gannye? Menm zafer pour lakaz, sant reabilitasyon eksetera. Ozordi, pli gro konponan nou Bidze nasyon al i larzan ki pe al pour Lazans Proteksyon Sosyal.

Avek en popilasyon ki pe vyeir vitman, konbyen sonm benefis retret ouswa en sonm

sekirite sosyal R10mil par mwan pou kout *taxpayer* Seselwa disi 2029 e ziska ki tan nou Bidze pou kapab abzorbe sa kou, san ki i enpakte lo abilite leta pou kontinyen investir dan lezot konponan devlopman san ki nou abilite pou fer li i ganny enterope?

E pli enportan ankor san ki plis taks i ganny enpoze lo nou pti popilasyon. Letan nou dir nou pou fer desann pri komodite sa lannen, ki manyer sa pou ganny fer e eski i pou en reisit?

Ki manyer nou asire ki konsomater pa senpleman benefisye a kourt term, me abilite pei pou kontinyen zener reveni i byen bezwen pour devlopman kontinyel pa ganny afekte negativman?

Ler nou dir ki nou pou konstri 1000 lakaz, 1000 lakaz an 2026, ki kapasite an plis Lazans pour Lenfrastruktir SIA in gannye pour li realiz sa target? E ki kapasite ekstra bann kontrakter lokal in posede en sel kou pou donn en koudmen dan sa demars?

Amwen sa bann kontrakter Endyen anba son Lagreman avek Gouvernman Endyen ki pe vin konstrir e kontrakter Seselwa pe ganny met ater. Letan ou deside san konsiltasyon avek *DBS* anonse ki i oblize *write off* lavalè R59milyon zis en pti group

biznesmenn ki *US* in promet pou efas zot det an lesanz pour sipor dan eleksyon. Ou merit dir aköz *taxpayers* Seselwa aköz li ki bezwen anmas lepokase sa desizyon.

Madanm Speaker, Dr Herminie in koz pour 45 minit pandan ki in esey etal en zimaz eroik son ladministrasyon. In dir sanzman ki in anmennen dan 100 zour i san presedans. Ki dezormen pour sa premye 50an nou legzistans, Seselwa pour en nasyon responsab.

Sesel pe al transformen sorti en leta *welfare* pou vin en *workfare state*, 1000 lakaz pe al ganny konstrir zis an 2026 tousel. Me sel keksoz in oublie dir nou se kote in vwar sa baton mazik ki son ero, defen Mr Rene in rode son lavi antye koman en politisyen, me zanmen in vwar. Sa baton mazik i sertenman pa deryer *State House*.

Mon demann mon lekor si avek tapaz zot aklamasyon a sak moman ki Dr Herminie in dir, "*trust the process*" parey en bon *chef d'orchestre* zot in antann silans dezespere sa kantite dimoun zot in viktimize dan sa premye 100 zour ki zot in o pouvwar?

Leta nou nasyon i kan ou kalifikasyon pou ganny en travay dan servis piblik i determinen par ou lafliasyon politik. Fodre ou fason vwar

keksoz i anlinny avek stratezi politik Gouvernman dizour", parol Minis Finans Pierre Laporte.

Si zansla i krwar ou pa siport zot, zot pa pou esper ou kontra fini, zot pou pous ou san pitye. Sa kalifikasyon fodre vwar keksoz i anlinny avek stratezi politik Gouvernman dizour i fer mwan poz kestyon lo lavenir bann pozisyon kle dan nou pei: - Gouverner Labank Santral, Sef Ziz, Komisyoner Komisyon Anti-Koripsyon, Komisyoner Komisyon Revini e son Tyermenn, *Attorney Zeneral*, Sef Lafors Defans, Komisyoner Lapolis e Mer lavil Victoria.

Dan son kanpanny eleksyon Dr Herminie ti donn Komisyoner Ted Barbe ankor zis 6 mwan dan son pozisyon e i ti promet Sesel en Speaker endependan. 100 zour in pase. Leta nou nasyon in vwar retour sistenm *security clearance* ki Ladministrasyon *LDS* ti'n aboli.

Nou konnen lekel sa madanm Maison du Peuple, ki *call* dimoun e menm fer dimoun anvoy *email* pour li, pour donn lenformasyon lo plizyer endividi pou determinen si zot pou ganny travay dan servis piblik ouswa non, ou pir ankor ganny pouse.

Leta nou nasyon i kan en seri lanket pe ganny inisye avek lentansyon pou target e persekit bann oponan politik Dr Herminie, entimid bann o zofisye servis piblik ki pa siport *US*, e sey gat repitasyon ladministrasyon sortan koman koronpi e se la sa stratezi ki i pe sey fer.

E donn medya avek piblik en 'telenovela' pou servi parol Onorab Grandcourt lo stage, pou swiv e tir zot latansyon lo forfe son ladministrasyon.

Lanket dan tim Ibou, dan lenportasyon zarm depi 25 pase, dan *lease* lo later Assumption, dan leksplozyon CCCL, dan rayot Prizon Montagne Posee, dan Kontra *Travizory*, dan konstriksyon fasilite *cold storage STC*.

7 lanket dan en sel diskour avek sa 2 ki'n deza komanse, i fer 9 an tou, 9 an tou. Me pa obliye, i annan lezot ki'n anonse pandan son kanpanny e dan lezot entervi me ki in kit ater dan son ladres SONA. Lanket dan *villa* 106 lo Eden Island ki lo paz *Instagram Bombastic Tours* e lanket dan sa koudeta imaziner ki sipoze arive an 2027.

Dan son diskour Dr Herminie ti sot en paragraf ki ti'n ekrir e mon sit sa paragraf "ki lenvistigasyon dan tou sa bann aktivite kriminel par sa

group Tonton Makout pou al komanse byento." Si nou al regard kopi son diskour ki Lasanble Nasyonal in sirkile, sa i ganny ekri, me dan son diskour, i ti sot sa bout. Akoz?

Nou dan *LDS* nou pe osi demande, nou pe demann li oli bann lezot lanket ki i ti promet pour nou konnen ki'n arive e sa i: - vandalizm Katedral *Immacule Conception*, met dife kot Mission Lodge e kot depo bis *SPTC* dan lasenn ton. Ki sennla ki ti deter 2 lekor dan simityer Takamaka? Sa ki ti met gas kot Palais de Justice avek bann Lekol Leta e osi lavant par dan *Nouvobanq*?

Apré tou annou pa obliyi sa R1milyon pour rekonpans sa ki kapab donn lenformasyon ekzakt lo sa bann lensidan ki i ti mansyonnen dan Lasanble an Novanm lannen pase.

Leta nou nasyon i ler nou vwar retour bann Tonton Makout, ki ti pas zot letan teroriz Lepep Seselwa ant 1977 ziska 2016. Nou'n vwar zot dan tou kwen *precint* Lasanble Nasyonal dan zot konnson long nwar, soulye bout pwent ek semiz karo-karo, lanmans kourt dan *sunglass* pe get nou avek karakter Mardi pase.

Se zot menm ki *spy* lo pep Seselwa, mars deryer ou dan transpor e ekout telefonn dimoun. Mon pa ti a kontan-

mon pa ti okouran plito, retour Tonton Makout ti en promes 100 zour. Leta nou nasyon i kan en parti politik e son siporter pa oule nou koz lo sa 43an ki zot in diriz Sesel e koman en parti otoriter ki pa ti kwar dan demokrasi.

Pourvwar ti konsantre dan lanmen bann elit lo Komite Santral zot parti. Larme ti teroriz nou popilasyon sirtou lazenes e koup seve bann *rastaman*. Bann parti politik Lopozisyon ti ganny sere e met de kote. Laliberte popilasyon ti ganny restrikte ouswa napa ditou, medya ti ganny sansire.

Sitwayen ti ganny arete pour naryen ditou, anprizonen san Zize, forse al an egzil, pa ganny drwa travay ou fer biznes, propriyete ti ganny sezi e zansla ti osi pa ezite pou touye ouswa fer disparet sa ki zot pa ti kontan.

Sa ti en sistenm lesklavaz politik anba Ladministrasyon *SPUP*, *SPPF* avek Parti Lepep, ki *United Seychelles* ozordi pa oule nou koz lo la. Selman lo zot sit *web* zot deklar avek lafyerte ki zot zeritye sa 3 rezim ki ti pran laliberte nou pep.

Me ozordi zot oule komemor labolisyon lesklavaz isi Sesel ki'n fini depi 191an pase avek bann seremoni dan vid koumsanmenm. Kan leta nou nasyon pe fer fas avek

bann diferan form lesklavaz modern, tel ki trafik imen, nou zabitan pe ganny pran koman garanti pour det drog, nou sitwayen pe ganny met otaz avek bann kondisyon finansyel ensiporab par bann lenstitisyon finansyel ki swadizan ekziste pou ed nou.

Nou lazenes pe fer fas avek bann diferan form adiksyon enkli teknolozi ziska labi sibstans, e politikman nou annan en parti o pourvwar ki pa kwar dan laliberte endividyel. I annan en zenerasyon Seselwa ki pa konn forfe sa parti politik ki o pourvwar.

Malerezman, zot in tonm dan latrap *US* lannen pase, annou pa koz lo 43an. Sanmenm sa zenerasyon ki'n redonn *US* pouvwar, apre zis 5an ki nou ti'n reganny nou Laliberte e la *US* in retourn avek vanzans e persekisyon kont zot prosen.

Leta nou nasyon i kan en ansyen Prezidan i ganny trete pli ba ki later, kot i napa en loto ofisyel, i napa en biro ofisyel, tou dimoun ki pre avek li i ganny *harass* pou dekouraz zot pou travay avek li ouswa frekant Ramkalawan.

Son sikseser i pas son letan fer paryaz parol avek li e i apwent zis son bann siporter dan tou pozisyon kle dan pei pou retourn nou dan lepok ek nou, pa ek nou. Leta nou

nasyon, i kan brans Ekzekitiv dan son premye 100 zour i met Lasanble de kote pou montre ki sennla ki o pourvwar.

Koman zot vin *State House* zot koup Bidze Lasanble Nasyonal par R3milyon me an menm tan ogmant pour zot *State House* par 20milyon, pour Zidisyer i reste preski parey, zis *State House* ki enportan. I *bypass* rol Komite Ladefans avek Sekirite dan lapwentman Direkter SIS e fodre Dirizan Lopozisyon ti fer tapaz.

I *bypass* Lalwa ki dir fodre i endike lekel son Minis Dezinyen ler inisyalman i anvoy lalis Minis pour laprouvasyon kot Lasanble Nasyonal e Lopozisyon in oblize proteste ankor.

I sanz kondisyon dan lapwentman Mer Lavil Viktorya, pou permet sa ki US in promet pou met la zis ganny swazir par Prezidan.

La nou pe osi tande ki US i oule ki Lasanble Nasyonal i asiz zis dan Mardi olye travay 2 zour par semenn. I annan 5an, 5an pour Ladministrasyon US travay avek 8enm *Cohort* Lasanble Nasyonal, nou pe dir zot si zot kontinyen lo sa parkour, zot pou pe vyol Serman Konstitisyonnel ki zot in fer.

Leta nou nasyon i kan drog i fer son retour dan tou nou kominote avek en

vanzans, i ganny vann e konsonmen oplenner, Prezidan Larepiblik i akiz gard pou vey trafiker drog lo televizyon, sa menm Prezidan i donn gras e retir *PI* trafiker drog, antretan ki nou kominote i ganny met otaz par vyolans enstige par drog.

Leta nou nasyon i kan bann lenstitisyon leta, enkli Lafors Defans avek Zidisyer i ganny servi koman en zouti pou akonplir promes eleksyon san okenn regar pour lentegrite e repitasyon sa bann lenstitisyon dan lizye piblik.

Leta nou nasyon i kan US pe *sponsor* avek lafyerte silans bann pti parti Lopozisyon, la ki eleksyon in fini. Mannyer zansla ti vokal ziska Oktob 2025, nou demann nou lekor kote lavwa avek solidarite sa 6 parti politik anrezistre in ale dan sa dernyen 4 mwan. Nou war zot pe ganny rekonpanse enn par enn.

Leta nou nasyon i kan nou pres linite, me Gouvernman i swazir zis bann gran siporter US e met lo Komite Linite Nasyonal pou trouv finalite dan bann ka *TRNUC* ki ti arive dan lepok ki zot parti menm ti o pouvwar. San oubliy lefe ki zot oule *taxpayers* Seselwa ki pey konpansasyon tou sa krim avek disan ki'n koule lo nou later depi 1977.

Ser, frer Seselwa, tou sa ki pe pase e pe arive i montre nou klerman ki selman 100 zour apre ki in vin o pouvwar ki Ladministrasyon Dr Herminie in determinen pou touf lavwa Lopozisyon.

Sel fason pou li fer sa se par met bann mezir represiv, ziska parti *United Seychelles* a vin en sours laterer pour nou pep, e fer Sesel vin en pei kot tou dimoun a viv dan lafreder, *'I dare you!'*

An konklizyon Madanm Speaker, menm ler LDS in perdi eleksyon lannen pase, nou fyer pou dir koman en parti ki nou'n tenir Sesel for,. Nou'n fer li monte e kit li pe debout avek lafyerte parmi bann pli gran pei ki nou. Se sa LDS. I egal pozitivite, responsabilite personnel, devlopman e fer Sesel pli zoli.

Mon zwenn mon bann koleg MNA LDS pou ofer mon letan, mon kouraz, mon lwayote anver servis Lepep Seselwa. Mon eko parol Dirizan Lopozisyon ki'n demann nou enn pou get lwen e prepar pou lavenir dan lespri linite, dan diversite parey moto Lasanble Nasyonal.

In dir nou mazin parol Lim Nasyonal 'Koste Seselwa'. Avek promes LDS fer Sesel pli for pli zoli, avek promes LDS Sesel Pou Tou Son Zanan.

Madanm Speaker, avek en lazwa e en konviksyon

senser, dan profon mon leker mon oule dir byen for, nou pa pou zanmen les tonbe. Mersi bokou.

MADAM SPEAKER

Onorab Athanase.

HON KENNETH ATHANASE

Madanm Speaker, tou bann Manm Onorab, ser, frer Seselwa, zabitan Ile Perseverance bonn apre midi.

Madanm Speaker, depi ki Perseverance in vin en distrik elektoral i pran 5an pou zabitan Ile Perseverance kapab ekout en vre diskour lo Leta nou nasyon. I kout en dirizan serye ki annan son pei aker in vin fran, onnet devan son pep pou montre travay son kontra 100 zour avek pep Seselwa.

Nou Prezidan pa'n per pou dir nou vre leta nou pei i ladan. Wi Madanm Speaker, me selman avek Prezidan Patrick Hermie ki zabitan Perseverance in kapab temwanny langazman en travay, en ladministrasyon serye pou met Seselwa o sant devlopman pou plizyer non pa pou zis serten.

Diskour Prezidan Patrick Herminie Mardi le 27 Zanvye 2026 in anmenn soulazman e konfidans dan plizyer Seselwa espesyalman pour zabitan Ile Perseverance. Mon asire ki apre mon lentervansyon bann

zabitan pou vwar kote zot form parti dan bann benefis.

Premyerman, sa lannen gran mazorite Seselwa in soulaze avek en trez mwan saler plen ki'n vin en drwa. Sa in anmenn en sipor an plis pou komansman lannen ede tir presyon lo bann paran pou larantre lekol.

Dezyenmman *long service allowance* in retournen, bokou travayer servis piblik in byen resevwar sa bann benefis koman en lankourazman pou delivre plis dan zot louvraz.

Trwazyenmman nou bann dimoun aze in byen kontan soulaze aköz Gouvernman US pa'n oubliy zot. Gouvernman US in toultan rekonnet e apresye travay ki nou bann dimoun aze in fer pou batir nou pei.

Alors, mon bann frer ek ser- dimoun aze in fer pou batir nou pei- alors, mon bann frer ek ser zabitan Ile Perseverance, sa 3 benefis ki mon'n fer resorti dan sa lalis langazman ki Prezidan Patrick Herminie in delivre i montre nou i reasir nou ki Gouvernman *United Seychelles* pe delivre lo son promes ki i pou travay pou mazorite non pa pou en serten.

Madanm Speaker, zis dan 100 zour, Prezidan Patrick Herminie ek son lekip pa'n

bezwen rod tou sord leskiz pe enport bann defi ki in vin zwenn in nobou kapab met larzan dan pos bann ki'n travay pou nou pei marse.

Madanm Speaker, prezan permet mon elabor plis lo bann lezot keksoz ki lekip Prezidan Patrick Herminie in fer dan son 100 zour ki san dout tous bann- mon distrik Ile Perseverance; -

Madanm Speaker, depi ki Prezidan Patrick Herminie in dizourd sa tim Ibou ki pe teroriz nou bann dimoun, zabitan Perseverance i santi zot pli lib pou mars lo semen, san ki zot bezwen ganny provoke pou naryen ditou. Nou larme ek nou lafors lapolis in reganny zot respe konfyans avek piblik.

Me mon bezwen fer resorti nou lafors lapolis i bezwen ganny plis - i bezwen ganny byen ekipe pou kapab delivre plis bann defi dan nou kominote Perseverance. Swivan lanons Prezidan Patrick Herminie ki distrik Ile Perseverance pe al benefisyè avek konstriksyon sa nouvo kordgard tre byento.

Nou swete ki devlopman i ava adres bezwen nou bann Zofisyè Lapolis e asir en meyer servis byen efikas pou nou kominote. Par egzanp adres sityasyon dan nou kominote kot piblik pe mank respe pou kanmarad, e kre domaz nou

bann propriyete prive bann zabitan Perseverance parey nou'n war pe sirkile lo medya sosyal.

Aprezan mon pe lans en lapel ek bann zabitan Perseverance ki pare volonterman pou apros Lotorite Distrik MNA, DA pou montre nide e pou met nide ansanm ki mannyer nou kapab donn en koudmen pou asir plis sekirite, lord ek lape dan nou distrik.

Madanm Speaker, swivan lanons Prezidan Patrick Herminie ki'n garanti larzan pou plis konstriksyon lakaz avek desizyon son ladministrasyon pou azir dan en fason desiziv pou delivre plis morso later Prezidansyel e pou lezot devlopman avek lenfrastruktir.

Nou'n osi temwanny sinyatir bann Lagreman sa semenn son semen answit lo medya. Se sa fason travay en Gouvernman serye aköz ankor rezon aköz zabitan Ile Perseverance pou kontinyen *trust the process*.

Madanm Speaker, tou bann devlopman ki Gouvernman *United Seychelles* pe fer in met son Seselwa o sant sa bann devlopman tel koman lakaz, lekòl, lenfrastruktir osi byen pou epanouisman bann pti biznes. Zabitan Perseverance ki pa pou ganny kit deryer.

E la, mon pe mazin bann artizan Ile Perseverance ki pe rod bann tel loportinite. Madanm Speaker, koman MNA Elekte pou distrik Perseverance, mon bezwen fer mon devwar pou fer resorti bann defi ki nou ansanm ek nou bann zabitan nou bezwen sirmonte.

E la mon pe koz lo bann zonm ek fanm Seselwa, espesyalman nou lazenes ki anvi travay me ki pe ganny bokou difikilte pou ganny en louveraz. Avek bon desizyon Gouvernman US, pou reentrodwir Lalwa avek rekomandasyon *Scheme URS*.

I sirman ede elev nou lafors travayer e soulaz bokou fanmir dan Perseverance pou anmenn en sipor finansyel kot zot lakour. Mon sezi sa loportinite pou ankouraz bann ki pa pe travay pou antre avek Departman Lanplwa pou servi loportinite ki gannyen pou silvouple tenir zot louveraz e ki zot garanti en lanplwa ek zot bann benefis.

Madanm Speaker, mon pe demann bann ki pa travay pou servi loportinite sa *Scheme* e osi zot sekiriz en lanplwa pou met, pou rankont ki'n annan travayer ki i ankor pe ganny difikilte pou fer 2 bout zwenn kot zot lakour koman en fanmir.

Mon zwenn avek Prezidan Patrick Herminie,

nou sorti lo sa sistenm *welfare* ou vin lo sa sipor *workforce*. Nou bezwen kontiny sa ledikasyon kot nou travay nou kontribye pou nou kapab soutenir plis.

Madanm Speaker, avek vizit ki mon'n fer koman *MNA* Elekte tou resaman dan Perseverance tou bann nouvo *bus stop* ek nouvo larout bann etidyan ek travayer, sa lanons lo rediksyon pri bis in vin o bon moman aköz nou distrik i servi plis bis prenon kont grander popilasyon an vi ki mazorite nou lakaz i bann *social housing*.

Nou annan zabitan ki travay an deor distrik e lezot ki annan plis ki en dimoun dan fanmir ki bezwen deplase toulezour, sa pou anmenn e soulazman pou zot. Mon swete ki nou ganny plis landrwa pou resarz bann kart bis dan distrik.

Madanm Speaker, lentrodiksyon kart *STC* osi pou vin koman en gran soutyen pou bann zabitan. Bann fanmir ki ankor annan difikilte pou aziste zot Bidze lemwan sa kart pou ede avek bann komodite esansyel. Annou servi li byen pou byennet nou fanmir.

Lezot zabitan pou benefisye avek rediksyon lo ankor 12 nouvo komodite esansyel kot *STC*. Sa pou ede redwir depans dan fanmir,

STC i a retourn en landrwa kot Seselwa i a ganny son servis abordab ki zot bezwen. Parey nou moto, pou plizyer non pa pou zis en serten.

En swe bann zabitan Perseverance ki nou a benefisye byento avek en *franchise STC*. Bann zabitan, annou *trust the process*.

Madanm Speaker, mon dakor avek Prezidan Patrick Herminie ki en nasyon pa kapab perdi talan son bann zanfàn e zenn. Nou bezwen annan bann laklas spesyalize pou ede ankadre plis zanfàn otreman kapab.

Sa plan pou en Sant Otizm pou en gran sipor pou lakominote espesyalman mon distrik, aköz i annan plizyer paran ki annan enn ou plis zanfàn avek sa- ek sa kondisyon.

Perseverance pa'n ganny eparnye avek labi sibstans e mon konnen ki i en defi reel pou nou distrik. Mon soulaze ler mon tann sa demars pou konstrir sa Vilaz Reabilitasyon, sa pou ed nou bann dimoun ki bezwen en landrwa pou pe konekte e refer sans zot lavi. Mon asire ki bann zabitan ki pe rod sa rekour in soulaze ler zot antann sa lanons.

Madanm Speaker, nou Gouvernman i krwar dan nou lazenes, i anvi ki zot progrese, nou annan bann zenn avek

bokou potansyel e talan ki evidan dan nou pei. Perseverance osi bann zenn i ekipe avek bann talan eksepsyonnel, i annan plis- i annan ki plis akademik e osi pratik, me sa pa en fer en diferans avek nou Gouvernman.

Mon pou ankouraz bann program *first job* dan nou distrik. Mon pou fer sir ki bann zenn Perseverance pa ganny kot deryer dan sa bann program ki pou ganny inifye byento. Akoz mon konvenki ki zot pou anmenn en kontribisyon valab dan devlopman nou pei.

Lazenes, sezi sa loportinite ki pe met a zot dispozisyon. Lazenes dan nou distrik i annan 2 *Youth* Biro ki pou retourn an fonksyon byento, avek sa negosyasyon avek *Starlink* ki pou fer zot pou ganny akse avek servis abordab pou zot, fer bann biro annan valer e annan e promot li pli byen.

Ti'n ariv en letan dan nou pei kot dimoun ti mefye kanmarad lo telefonn, nou ti per viktimizasyon. Me nou Gouvernman in krwar dan laliberte son pep, alor nou lib pou kominik avek nou bann koleg e lezot dimoun dan pei san lafreyer pou eksprim nou lopinyon libreman.

Pou terminen, pep Seselwa, wi nou'n fer en bon

swa an Oktob lannen pase. Nou'n met en Prezidan ki ekout soufrans son pep, i ti'n fer sir ki son premye 100 zour in delivre lo sa ki i ti'n promet pou fer dan son *manifesto*. In delivre pou plizyer non pa zis pou en bann.

Alor, parey mon annou kontinyen fer konfyans nou Prezidan ek son Gouvernman. Annou *trust the process*. Mersi.

MADAM SPEAKER

Mersi Onorab. Nou ava aprezan pran en *break* ziska 3er 45.

(BREAK)

MADAM SPEAKER

Bon, nou ava rebran deba. Onorab Andy Labonte.

HON ANDY LABONTE

Mersi Madanm Speaker. Madanm Speaker, tou *staff* e sekretarya Lasanble Nasyonal, Koleg Onorab, Lepep Seselwa, espesyalman tou zabitan Larivyer Anglez bonn apre midi.

Mersi Bondye Papa ki'n kre lesyel ek later, liniver vizib e envizib ki'n beni mwan ankore enn fwa e donn mon sa loportinite pou reprezant distrik Larivyer Anglez ek tou son zabitan. San ou lagras e benediksyon, nou imen nou pa naryen. Alor tou laglwar,

louanz e ladorasyon i al pou ou selman nou Senyer Bondye Papa.

Madanm Speaker la ki mon annan laparol, permet mwan pou mon demann okenn zabitan ki ti a kontan fer en donasyon anver sa fanmir ki ti perdi zot lwaye, zot lakaz pandan en dife lannwit le 28 Zanbye lafanmir Fabienne i kapab pran kontak avek Lotorite Distrik pou kapab ede pou kontribye pou zot kapab refer zot lavi.

E mon anvi formelman senpatiz avek Charles, Julio, Julius Fabienne avek Aline Thomas son pti garson Isham Sinon ki annan 4an ki zot ti-zot in perdi zot lakaz Madanm Speaker.

Madanm Speaker, bokou nou souvan, krwar ki pouvwar i dan nou lanmen, san realize ki pouvwar e lasazes pou dirize, i en kado e benediksyon sorti kot Bondye Papa tre o. Tou sa ki en endividi i pas ladan dan lavi, i touzour swa en Benediksyon oubyen en leson pou aprann.

Tou sa ki ou eksperyans e i pa zanmen en fot pou regrete. Touzour mazine ki tou keksoz i ariv pou en rezon. Sa rezon, se li ki koz sanzman, parfwa i fermal e desir leker, parfwa i difisil pou aksepte me a la fen i pou le meyer, e en leson pou aprann e vin pli for. Pa zanmen perdi konfyans e

aret krwar dan laglwar Bondye aköz nou tou nou apel son kreatir.

Madanm Speaker, mon konmans mon lentervansyon koumsa aköz matirite i vin avek leksperyans e i fer en endividi vin pli saz. Parey soley ek lapli, laverite i en keksoz ki personn pa kapab kasyet.

Menm si Prezidan Herminie ek son bann dimoun pe esey efas tou sa ki Ladministrasyon LDS in fer pandan sa dernyen 5 an, zot pa pou kapab aköz Listwar pou reste touzour listwar. I menm keksoz ki ansyen Prezidan France Albert Rene ti fer ler i ti fer koudeta e fors Ansyen Defen Prezidan Macham an legzil Lanngleter.

Egalman, nou pa pou kapab efas tou sa bann atosite ki SPUP, SPPF, Parti Lepep e ki konmela US, ti fer depi le 5 Zen 1977. Kot plizyer nou frer ek ser Seselwa ti ganny touye, viktimize, met dan prizon a mal apropo e ganny forse pou al egzile.

Wi, listwar pour reste listwar e nou pa kapab kontinyen viv dan lepase. Me pep Seselwa e sirtou LDS i dir ou byen for pa pou ariv ankor dan nou pei Sesel, sa bann kalite lesklav en sel parti politik.

Me i annan desizyon ki parfwa i ganny pran sirtou ler belzebit pe ganny glorifye e

met en kominote antye dan fernwar. Mon lespwar se ki Seselwa i en nasyon ki ase entelizan e i en pep beni. Pa oublie ki *LDS* i sel lespwar pep Seselwa.

Nou zanset ti kontan dir ‘bann lyon anba lapo mouton en zour pou bezwen montre son vre vizaz’. Wi Madanm Speaker, Mardi le 27 Zanvye 2026, 5er apre midi ler Prezidan Dr Patrick Herminie ti swadizan pe vin koz avek nou konman son pep lo Leta nou nasyon. In konmans montre son vre Vizaz.

Mon koman sa *MNA* Elekte sorti dan distrik Larivyer Anglez, ki annan bokou respe pour li, mon ti vremen optimistik e enpasyan. Sirtou, aköz i ti vin avek en *speech* prepare, e pe lir lo *teleprompter*.

Mon ti ekspekte en vre *speech*, avek bokou sibstans e ki ti pe vin donn lespwar pou en meyer demen me pa sa ki nou ti tande. Parey zot slogan ti dir pandan Eleksyon 2025 ‘*for the many, not the few*’ ki vedir pou nou tou pa zis pou en bann.

Me i domaz ki zabitan Larivyer Anglez a pep Seselwa i war li tou lanvers, i war li *for the few not the many*, pou en minorite e pa pou mazorite. Se sa ki'n ganny resorti dan son *speech* 45 minit. Alors Seselwa i dan dout, Seselwa i

dezapwente e ankoler. Mazorite Seselwa ki mon'n koz avek i dir mwan ki zot pa pe kapab *trust* sa *process*.

Avek ou permisyon Madanm Speaker, pep Seselwa pe demann Prezidan Herminie i retourn devan Lasanble i vin deliver en vre *speech* Leta Lanasyon e dir sa pep laverite pou plizyer rezon. I menm annan ki pe demann mon si Madanm Speaker ki'n donn Prezidan zis 45 minit e pa'n permet Prezidan pou omwen fini son *speech*.

Madanm Speaker, *sorry* pou mon dir sa, me Lepep la deor i konfize aköz tou sa ki in vin dir, zot ti deza konnen. E se bann plan ki Ladministrasyon *LDS* ki ti'n fini travay lo la, e ti pa al met an mars.

Parey Prezidan i dir ki mon site: “mon fyer pou anonse ki mon Gouvernman in fini garanti larzan pou konstrir plis ki 1000 lakaz konmansman sa lannen e nou reste konvenki ki par 2030, nou pou lo larout pou fini 2000 lakaz”. Retir sitasyon

Madanm Speaker, mon osi mon fyer pou sa devlopman lakaz, aköz laverite se ki sa pep i konnen, ki Ladministrasyon *LDS* ti fini fer provizyon depi Oktob 2025, pou konstri 228unit lakaz abordab e 94unit *mid-range*

condo ki enkli parmi sa 1000 lakaz.

Sa i enkli: - 24*unit* Anse Boileau, 8*unit* Pointe Larue, 24*unit* La Gogue, 16*unit* Mont Buxton, 32*unit* Corgate Estate, 8 *unit* Les Mamelles, 16*unit* Grand Anse Praslin, 12 *unit* La Digue, 8*unit* Perseverance e 80*unit* Grand Anse Mahe.

E dan *midrange condo* i annan 32*unit* ki *Public Private Partnership* avek Vijay, 24*unit* Perseverance, 32*unit* Cascade e 6*unit* Brilliant. Prezidan Patrick Herminie i osi dir ki sa i le sel fason pou nou elimin sa problem lakaz.

Wi, lo sa bout mon totalman dakor avek li se par konstriksyon lakaz ki pou ede rezourd problem Lozman dan sa pei. Me pa oubliye ki se li ek son dirizan – ek son bann dirizan dan *US* ki ti dir aret tou bann lenvestisman kapital dan sa pei an 2020. Me i pa vre ler i dir ki zot in erit sa problem lakaz. Sa i apel mansonz Madanm Speaker. Be ler nou ti pran pei an 2020 konmsi ti napa problem lakaz dan sa pei?

Prezidan in osi dir ki Pandan sa dernyen 5an zis apepre 250 lakaz in ganny konstrir. Sa i en pli gro mansonz ki fer Lepep Seselwa i ankoler akoz lakantite *unit* lakaz konplete ant 2021 ziska Oktob 2025 i 367 lakaz

afordab, sa ki *plus* 40 *Condos GICC*, 28*unit* *transit*.

E en bann ti'n fini *tender* depi Oktob 2025 ler ki i ti vin o pouvwar. Sa i 24 *unit* Perseverance, 32*unit* Takamaka, 28*unit* Dan Kan Les Mamelles e 28 *unit* *mid-range condo* *Ex-Sacos* Anse Royale.

Ler ki Prezidan i dir ki son Gouvernman i dir ki son Gouvernman in deside pour azir dan en fason desizif. An 2026, i pe delivre omwen 150 morso later rezidansyel, ki ava koup sa lakantite dimoun ki pe esper par omwen en tyer dan premye lannen son manda, avek plan pour delivre plis morso an 2027. Ankor plis mansonz.

Se Ladministrasyon *LDS* ki ti'n fini travay lo plizyer teren pou *land bank* atraver pei dan sa bann lokasyon swivan: - 26 morso La Gogue, 56 morso Anse Royale, 30 morso faz 1 North East Point, 14 morso faz 2 North East Point, e apepre 10 morso Beoliere.

Madanm Speaker, ankor mansonz. Ler Prezidan Herminie i dir ki son Gouvernman pou osi rekomans fer konblaz, pour kree plis ki 570mil met kare nouvo later, enkli preparasyon Ile Aurore pour proze lakaz, lekol, ek devlopman

lenfrastruktir osi byen pou epanouisman bann pti biznes.

Sa i vre Manzonz dan tou son splander. Akoz se ankor Gouvernman LDS ki ti'n fini deside lo tou sa proze.

Ler i dir ki se pou sa rezon ki Gouvernman in aste 2mil laptop pour siport nou bann edikater. Sak ansenyan primer ek segonder pou resevwar en *laptop* avek Gouvernman.

I ti merit omwen merit annan kouraz pou dir sa bann ansenyan ki *laptop* ti'n fini ganny fer provizyon anba Ladministrasyon LDS. La mon anvi dir sa bann ansenyan ki se bann siporte e aktivis US dan Gouvernman ki ti pe trenn lipye aköz zot pa ti siport Ladministrasyon LDS. E mon demande si zot konsyans pa sarze, e zot kapab dormi byen aswar? Me tou laverite pou ganny sorti to ou tar.

Madanm Speaker, alors, Seselwa pe demann bokou keston en parmi i: - “ki vre vizyon Prezidan Herminie ek son ladministrasyon”? Se pou sa rezon ki Prezidan Patrick Herminie i merit retourn ek son *teleprompter* dan Lasanble avek en nouvo *speech* kot i koz lo laverite avek sa pep.

E la, i kapab fer en vre *speech*, omwen en pe plis ki 45 minit, byen kler e laverite. *Speech* Prezidan Herminie ti plito vin dir son bann dalon e

siporter US pou pa trakase LDS in kit bokou larzan pou zot donn bal ladan. Me Seselwa pe dir ki zot ti deza konnen e ekspekte ki sa kof plen e deborde ki Prezidan Ramkalawan in kit deryer pe al fini.

Akoz robinen larzan in ouver avek bann promes eleksyon pou satisfere aktivis e siporter US parey sa zenn fir ti dir lo medya nasyonal pandan enn zot *rally*.

Me keston se lekel ki pou benefisye e pli enportan si apre ki prezidan Herminie ek son bann dalon in byen donn bal dan larzan Leta, nou tou konman en pep nou pou pey det sa Gouvernman sosyalis, iresponsab parey zot det TRNUC ki pe mor lo ledou tou Seselwa?

Seselwa pe dir ki zot in konmans par *trust the process for the many, not the few* ki zot ti ganny dir e promet zis apre eleksyon. Seselwa in pran kouraz e deside *follow the process for the many not the few* e sa pa'n marse menm.

Me finalman, Seselwa pe ganny *the process* ki *for the few and not the many*. E la prezan Seselwa pe zis regarde e konmans regret sa *process* narsisis ki pe benefis zis serten endividi ki dan kan US.

Ler Prezidan i dir ki i pe vin met 59milyon pou *write-off loan SBFA* ek DBS. I fer bann

endividi ki dekouraze, ki fer bokou sakrifis, travay dir, onnet, ki pe onor zot komitman, fer li zot priyorite e devwar, repey zot *loan* san okenn aryeraz, demande si i vo lapenn repey zot *loan*, e apre zot pou bezwen repey det zot kanmarad atraver *tax* ki nou tou nou pe kontribye.

Tandi ki zot bann Dalon parti *US* i kontinyen akimil larises lo zot lasyer. Apre zot dir i pou nou tou, pa zis pou en bann. Me non, sa i pou en pti minorite proteze e pa pou tou pep Seselwa.

E lo sa size *write-off loan* zot bann dalon siporter *US* en madanm ki travay kot *DBS* i dir mwan dir si Prezidan i pran nou konsey, ler i vin refer sa *SONA 2025*, plito lans en lapel e konmans en diskisyon avek bann labank espesyalman Labank Santral pou revwar sa zafer *CIS, Credit Information System*.

Kot letan en endividi i garanti en *loan* en lot endividi e pa peye zot tay deryer sa *guarantor*. Plito al rod *asset* sa dimoun ki pa pe pey son *loan*, labank i ava vann e kapab reganny son larzan, pou pret en lot endividi ki serye. Non pa tay deryer sa *guarantor* pou re peye e sa i blok son sans ganny en *loan* avek okenn lezot labank. E sa i enkli menm pou Parti Lepep ki merit pey son det *TRNUC* li menm.

Madanm Speaker, Prezidan Herminie ti konmans son *speech* par salitasyon e direk i ti dir: - “Frer ek Ser Seselwa, sa lannen i mark 50an lendepondans nou nasyon, 50an depi ki Sesel in deside pou debout lo son de lipye, pour gouvern son lekor, pour definir son lavenir, e pour plas son desten fermeman dan lanmen son pep”.

Sa i vadir ki sa pep ti swazir laliberte non pa en pep ki ti pou ganny entimide par en Gouvernman parti inik, diktater e dyabolik *SPUP, SPPF*, Parti Lepep pandan 43an. E la an 2025 ler zot repran prezidans pei se egzaktaman sa ki zot pe refer.

I en lenkarnasyon zot prensip lesklavaz modern en parti inik ki kontrol tou e senm lafreier. Zis Parey Ansyen Prezidan Albert Rene ti andoktrin nou avek selebrasyon Lendepondans kan saler i ti pe vin pran nou laliberte. La prezan sa lespri satanik i re vin teoriz nou pei.

E in vin anbet Seselwa avek en selebrasyon abolisyon lesklavaz pou bous nou lizye aköz i pe reentrodwir en sistenm lesklavaz modern pou siport en sel parti politik. Mon pa war li drol si nou bann zenn pe mor par grap dan bann lensidan misterye. Se sa vre

Leta nou nasyon Madanm Speaker.

Lepep Seselwa pa pe war e konpran kote i antre sa bout, *trust the process*. Eski sa i vedir Prezidan Dr Mathew Antonio Patrick Herminie in ganny deklare Bondye Sesel e nou bezwen krwar dan li parey nou krwar dan nou sel Bondye?

Nou bezwen, *trust the process*? Ferm nou lizye, mars dan fernwar, krwar dan tou sa ki i dir e kontinyen vann nou dinyite koman en pep avek bann pei dalon parey Kiba, Larisi, Lenn pou benefisye zis serten me pa Lepep an antye? Lepep Seselwa i refize pran Prezidan Herminie koman Bondye later Sesel. E nou dir byen for *no way*.

Ler Prezidan i kontinyen dir ki nou'n ariv a en letap kot nou bezwen reflexir, non selman lo kote nou sorti me osi kote nou pe ale e ki kalite pei ki nou oule batir ansanm. I dir ki nou listwar i pa'n enn ki'n fasil, in ganny skilpte par lenzistis, lalit, ek sakrifis. Me in osi ganny skilpte avek kouraz, rezilyans, e en krwayans ferm ki dinyite, lazistis ek laliberte i drwa tou Seselwa.

I kontinyen dir ki ozordi, Seselwa pe lans en lapel avek nou zenerasyon, pour pa get deryer avek regre, me plito bouz devan dan linite avek

kouraz ek en bi gide par bann lesan lepep, e responsabilite ki nou annan anver lavenir.

Akote tousala, annefe tousala mon dakor avek li, me kestyon ki Lepep Seselwa pe demande, i si li Prezidan Herminie in reflexir li menm, ki kalite pei ki i anvi batir ansanm avek nou? Eski nou anvi batir en pei kot voler e kriminel i ganny gras dan prizon zis aköz zot sipòrt *US*?

Eski nou anvi batir en pei kot zis faver pou fanmir, dalon ek galan ki ganny gro plas dan Ladministrasyon Gouvernman *US* san bann post ganny *advertise* dan latransparans? Eski nou anvi batir pei kot nou bann profesyonnel i ganny persekute, ganny met deor dan zot plas travay dan Gouvernman zis aköz i pa sipòrt *US*?

Eski nou anvi batir en pei kot bann endividi i konmans ganny swiv par transpor misterye par bann Tonton Makout? Ki li menm li in dir. Parey sa zenn anba laz semenn pase ti ganny arete kot son lakour Union Vale, ganny met an detansyon pou 7 zour apre zot ti zis larg li san okenn sarz?

Eski nou anvi batir en pei kot bann *ex zofisye* ki zot non in ganny monte koman *perpetrator* dan *TRNUC* in ganny travay dan *state*? Eski nou anvi batir en pei kot

Prezidan i met R20milyon sorti dan kof leta ki larzan Lepep Seselwa pou pey domaz e atosite ki bann ansyen dirizan Parti *SPUP*, *SPPF*, Lepep e *US* in komet?

Eski nou oule batir en pei kot nou bann zanfan Praslin, La Digue i ganny meprize menm sans avek zanfan Mahe pou zot ledikasyon? Eski nou anvi batir en pei kot lavwa nou bann zenn par Lasanble Lazenés Sesel pa ganny ekoute e ganny respekte? Eski nou oule batir en pei kot bann pozisyon parey Mer Lavil i sey fer mannev pou ganny donneren avek politisyen?

Eski nou oule batir en Pei kot politik i retourn dan Departman Kiltir e nou tradisyon ki sipoze inifye nou koman en nasyon e nou perdi kredibilite. Larepons i non. Pei pe regrese e retourn an aryer avek sa kalite latitud.

E mon annan sa pou dir avek Prezidan Dr Patrick Herminie, ou ti anvi diriz sa pei e ou'n ganny sa sans, alors fer li byen silvouple. Akoz nou pou kontinyen dir ki Sesel i pour tou son zanfan e nou anvi fer li pli for e pli zoli e nou pou kontinyen lager. Ou'n menm konfirman ki la anba ou ladministrasyon dan mwens ki 100zour.

Koripsyon i pli gro problemn, e menm pli gro problemn ki problemn drog.

Mon pou dir ou ki depi mon konesans dan listwar Sesel premye fwa mon war Seselwa pe soufer dan silans, pe viv dan lafreder, per pou koze e eksprim zot lekor.

Ou dir ki presyon- ou dir ki personn pa par lao Lalwa, me akòz ou bann dalon ek fanmir *US* zot kapab touy torti, ki sipoze ganny proteze anba Lalwa, kwi, manze e poste laprev lo medya sosyal e boufonn nou pep. Ni aksyon pa ganny pran avek.

En laliny drog Madanm Speaker, in sorti R250 avan Oktob 2025 e pou ariv R125 apre Oktob 2025, se sa vre sityasyon nou pei. Sa pei in retourn en laplenn zwe pou bann gro dimoun dan *US*.

Madanm Speaker, me mon lespwar i ki mon konvenki se Bondye i annan en plan ki personn pa konnen.

Larealite i se kan Bondye i oule fer en imen pwisans i pa kouronn li deswit me premyerman i kraz li, i kas li, i tir li dan son *zone* konfor, i model li, e apre finalman i re batir li pli for e pli pwisans ankor. Se a la fen ki i resevwar son kouronn.

Me Lepep in in fer zot desizyon e zot pou bezwen viv avek. Bokou dimoun i krwar ki zerb i touzour pli ver lo lot kote, san realize ki zerb i ver ler ou aroz li, e fodre pa nou oubliye sa.

Madanm Speaker, me dan tousala mon pou dir Lepep Seselwa zis en keksoz, Prezidan Herminie ti dir zot ki li i pe vin avek prensip Prezidan France Albert Rene me zot zorey pa ti tandé, zot ti pe mazin zis sa bann promes larzan me ozordi zot in war.

Prezan inosan i bezwen pey pour le koupab e soufer avek sa group ki ti mazin zot byennet personnel me pa nou pei koman en nasyon e ver Laliberte e menm loportinite.

Madanm Speaker, avan ki mon ariv ver lafen, i enportan ki mon dir avek tou zabitan Larivyer Anglez ki mon Andy Michel Labonte mon pou reste touzour sa *MNA* ki pa les politik partizan diriz mon fason travay.

Me par kont, mon osi bezwen dir zot ki bokou keksoz dan fason fer in sanze anba sa nouvo ladministrasyon. I zis parey mon'n ganny dir ki okenn Proze Kapital pa tonm anba mwan. Vedir ki se pa mon ki deside. Mon osi ganny dir ki selman *bin site ek bus stop* ki mwan mon kapab konstri.

Me mon parey mon labitid, mon pou kontinyen pouse dan lentere nou Zoli distrik Larivyer Anglez e tou son zabitan. Akoz determinasyon, persiste e antete i parmi mon bann karakteristik. Mon pa konnen

akoz mon pe lager pou sa sant ki zot in pran e zot in vann.

E pou terminen mon anvi reasir tou zabitan Larivyer Anglez ki mon Andy Michel Labonte mon lafors i sorti kot Bondye papa. Alors, mon napa lafreier okenn imen lo sa later. Mon trankil i vedir bokou, mon pa dormi lizye ouver me mon analize e obzerv bokou.

Mon pou kontinyen desarz mon responsabilite avek dinyite, entegrite e latet anler. Afilyasyon politik pa pou diviz nou me plito nou diferans ki pou re inifye nou, dan linite, nou ava fer nou kominote vin en vre paradi kot bann bon valer parey lanmour, la spirityalite i vin nou lapriyer toulezour.

Ansanm annou pran nou responsabilite avek pozitivite pou byennet nou distrik, nou kominote e koman en nasyon beni. Ki Bondye papa ou retir tou sa bann retar, blokaz e move lespri dyabolik dan nou semen. Lo non ou garson *bien-aimé* Zezi Kris. Mersi Madanm Speaker.

MADAM SPEAKER

Onorab Toussaint.

HON JEAN TOUSSAINT

Madanm Speaker, ser, koleg Manm Onorab, manm piblik ki pe swiv sesyon ozordi apre midi, bon apre midi zot tou en bon apre midi spesyal i al pou

zabitan mon distrik Anse Boileau.

Mardi pase Prezidan Repiblik Dr Patrick Herminie ti adres nou nasyon isi dan Lasanble pou apepre en 45minit, en ladres ki ti direk e fran. En ladres ki ti ganny swiv par bokou, kalm avek bokou imilite, bann pwen ki ti ganny touse ti bann ki ti pertinan, bann size ki tous lavi tou dimoun.

Lozman, lasante, later kou lavi, rekour atraver lasistans sosyal pou bann ki pli vilnerab, ledikasyon, lord lape. Sistenn lazistis, revizyon dan sistenn reminerasyon oubyen saler, pou serten kategori travayer, sant reabilitasyon pou bann adikt, program *URS, first job, ease of doing business*, lanplwa e bokou lezot ankor.

Lo son direksyon anver *State House*, Prezidan ti fer serten langazman avek Lepep, de ki i ti antre lofis ansanm avek son tim e son lekip, i ti komans fer en kontra sosyal avek Lepep e deswit komans enplimant bann program premye 100zour. Sa byensir, ti anliny avek *manifesto* ki nou Parti *United Seychelles* ti'n anmenn son kanpanny lo la

Malgre ti annan bokou ki ti ganny dir kont *US*, par Gouvernman ki ti o pouvwar avan sa, sa letan, Seselwa ti deside fer en swa. Sa swa nou

tou nou'n trouve se *US* i revin o pouvwar.

Ozordi 3 mwan apre, malgre ki i annan ki pa kontan, me nou bezwen aksepte ki i annan en fondasyon byen solid ki ganny monte pou permet nou respire, ki pe anmenn nou ver lespwar, lespwar pou pep Seselwa pou en meyer Sesel.

Avan mon kontinyen Madanm Speaker, mon'n antann serten entervenon ou entervansyon lo lot kote latab e mon ganny lenpresyon poudir i paret *US* ki ti o pouvwar pandan sa dernyen 5an. Akoz mon dir sa?

Akoz sa kantite probleman ki mon tann fer resorti ki Prezidan Herminie ozordi or Mardi pase ti vini i ti pe koz lo ki mannyer nou pou fer fas avek, ki mannyer nou pou dil ek bann defi ki bann mezir ki ganny met an plas, sertenman mon'n oule krwar ki ti *US* i ti o pouvwar, me i pa ti leka ditou.

E mon'n tann osi la entervenon dernyen ki pe koz tro lo proze lakaz ki sipoze in ganny fer e *US* pe pran laglwar lo la, be ler par egzant ki mon'n konpran sa proze ti ouver an 2020 boner, me zot ti pran pouvwar ver Oktob 2020 zot, si mon pa tronpe.

Ler nou ti pe swiv Lasanble tou resaman, ti annan bann promes ki ti'n

ganny fer, nou trouv bann larzan ki ti'n ganny retournen nou ti pe dir sa bann kredi, i ab larzan ki ti ganny fer *savings* e nou'n trouv en ta proze lakaz ki pa'n zanmen ganny materyalize ouswa en kantite retar lo la. I fer mon krwar poudir be Gouvernman LDS pa ti vreman senter ou serye avek sa konsern lakaz ki nou pep ti annan.

En lot keksoz ki mon'n en pe sirprann lo la si i pou demann kestyon bann dimoun deor la ouswa sa pep Seselwa, bann lanmor misterye ki'n arive, mon krwar si nou al fer, nou la rod statistik sa dernyen 5an, manman i annan en kantite.

E pandan lepok eleksyon 2020, mon krwar si i annan en letan kot nou'n tann koz plis lo grigri, bann aksyon *demonic* ki ti pe ganny manifeste mon'n tann Onorab Labonte koz lo la me mon pa tro krwar si, mon pa tro krwar si sa i korek. E si nou pa anvi koz lo la nou pa anmenn li dan Lasanble, nou pa anmenn li de pre nou reste lo SONA.

Madanm Speaker, pou kontiny mon entervansyon an relasyon avek kou lavi, plizyer mezir in fini ganny met an plas pou ede amelyor kou lavi e pou permet nou bann dimoun ki pli vilnerab arive fer 2 bout zwenn.

Lazans Proteksyon Sosyal e lasistans sosyal bokou nou bann paran tousel i pe santi zot pli eze parey mwan, parey bann ki mwen kapab pou zot kapab osi fer lavi vin en pe pli meyer pou zot.

Laz pansyon, sekirite ki'n desann sorti 65 pou vin 63an e pe met bokou nou bann dimoun, bann ki lo laz sirtou ki pe travay ek bann kondisyon lasante kronik i annan bokou zot. E sirtou bann osi ki annan bann douler permanan tansyon, bann douler leren, dyabet, zot osi zot a ganny sans ganny zot bann benefis en pe pli boner.

E sa i a permet zot al dan lakour avek zot sekirite sosyal 7500 avek en pti 8san ankor par lo la, en larzan ki pou kontinyen ogmante tou le-z-an pou ou finalman pou evantyelman ariv R10mil par mwan parey nou Prezidan in anonse.

Sa i enn bann promes ki i ti fer dan konpanyi eleksyon e promes ki pe ganny delivre. Fodre nou pa oubliye osi ki retour laz sekirite sosyal 63an i en vre soulazman pour bann ki pe demande si zot pou zanmen ariv 65an pou zot ganny sans zwir fri lasyer zot long letan travay. E byen wi, zot rev in ganny realize.

Retour *long service* ki nou bann frer ek ser travayer

pe rezouir ozordi i ti enn bann lenzistis oubyen de privasyon korize par nou Gouvènmman e nou Prezidan Dr Parrick Herminie. Logmantasyon dan gratwite an relasyon avek les travay akimile, san dout pou donn Seselwa lankourazman pou reste pli lontan dan travay e kontinyen kontribye dan devlopman nou pei. Apre tou, mon get sa koman en *incentive*.

Bokou in ganny dir lo trezyenm mwan saler, me sa ki kler se ki Gouvènmman ti egalman met lanfaz lo sa sans responsabilite ki en eleman tre enportan dan travay. Apre tou, si en travayer i kontan pou li zwir serten benefis ki Gouvènmman pe ofer, alors i normal ki zot osi zot realize ki zot bezwen demontre langazman e devosyon anver zot lorganizasyon travay.

An revizyon dan pri en lot lalis komodite, pou fer pri lavi vin abordab anonse par Prezidan dan ladres Mardi pase lo Leta Lanasyon i en lot kontra sosyal ki pe ganny delivre pou fer desann pri lavi.

Pa zis sa, la ler nou pe koze, i deza annan serten nou bann frer ek ser ki pe vreman trouv lavi difisil pou fer 2 bout zwenn ki'n fer bann prosedir e zot in ganny lasistans atraver en kart *STC* apre ki zot in pas atraver en prosesis pour legzersis *means testing*.

Madanm Speaker, sa i legzanp ki Gouvènmman dizour pa pe zis donner me i annan sa sans responsabilite ki vin avek serten desizyon ki pe ganny pran pou soulaz nou bann ki pli vilnerab.

Sa i pa en *welfare state* me i en obligasyon vizavi bann ki santi zot pli dan bezwen. E nou Gouvènmman e nou Prezidan in konpran sa.

Lasante nou pep i enn ki primordyal, en pep ki an bonn sante i en pep ki delivre e kontinyen travay pou kontribye anver devlopman e progresyon nasyonal.

Tou resaman isi dan Lasanble nou ti aprann ki anviron 12poursan nou pep sirtou zenn pe soufer avek adiksyon aköz konsonmasyon sibstans danzere.

La nou pe koz prezizeman drog ouswa lalkol. Bokou sa bann viktim pa pe arive fer serten kontribisyon tanzib dan devlopman nou pei aköz zot parfwa pa pe azir dan en fason rasyonnal aköz serten kondisyon lasante mantal.

Mon bezwen fer resorti sepandan ki i annan parmi ki anvi fer en zefor pou sorti dan adiksyon. E mon pou dir ki en mank *political will* pandan sa bann dernyen lannen pa'n ede amelyor sa sityasyon.

Mank langazman dan lalis kont akse konsonmasyon

sibstans danzere ki se swa drog ouswa lalkol ti ase evidan.

Bokou ti'n kapab ganny fer, e si pou donn en legzanp, dan plizyer ladres ki nou'n tann nou Prezidan Partick- Dr Patrick Herminie koz lo la pandan son bann diskour kanpanny eleksyon se demars avek serten pei zanmi avan 2020 pou sant reabilitasyon pou bann adikt ki apre in tonm dan delo avek larive *LDS* an 2020 Oktob.

I tre probab ki ozordi bokou nou bann zenn adikt ti a ganny serten tretman adekwat, re-abit zot e posibleman ti ava pe kontribye pli pozitivman dan nou sosyete.

Sepandan lanons Prezidan lo size konstriksyon amwen 4sant reabilitasyon pe soulaz e anmenn lespwar. Wi pe anmenn lespwar, pou pa zis bann ki anvi amelyor zot lavi me osi lespwar pou bann paran ki souvandfwa trouv zot zanfand de zour an zour pe antre dan en trou pli fernwanr.

Wi Madanm Speaker, lespwar pe ganny retabli pou bann ki'n pri dan sa serk visye. Amannman dan nouvo Lalwa *Mental Health Care Agency* e osi retour *URS, Unemployment Relief Scheme* i en program ki bokou pe espere avek pasyans, swa pou zwenn, ouswa pou rezwenn.

Program ki pe anmenn bokou soulazman pa zis pou bann ki anvi refer zot lavi me osi vre soulazman pou bann zabitan ki se swa zot bann paran, gran paran ki souvandfwa zot osi zot pa kapab kit naryen ater ni zot pti *purse*. Pou bann fermye ki konplent zot pa kapab zwir pou zot travay rekolt e osi pou bann biznes dan kominote.

I fer mon rapel letan kanpanny mon ti enterakte avek serten bann group zenn dan mon distrik an relasyon avek bann alternativ ki annan pou zot dan distrik ou dan pei, e i annan ki ti fer mon konpran ki *URS* ti en bon keksoz. En program ki ti permet zot debourye pou zot ganny en pti *survive* zot apel sa.

E i malere, i malere ki ler *LDS* i al o pouvwar sa program ti ganny *phase out*. Madanm Speaker, revizyon dan program *my first job* en lot linisyativ ki lanfaz ti pe ganny ranforsi pou responsabiliz e donn lespwar nou bann zenn, donn zot plis sans dan zot lavi. Sa osi i enteres bokou nou bann zenn.

Sa i bann demars senter e serye ki nou Gouvernman pe angaze ladan pou devlopman e lepanouisman nou bann zenn. Madanm Speaker, sa size devlopman pa pe zis vin par azar an relasyon avek

devlopman resours sirtou resours imen.

I kler ki Prezidan nou Gouvernman i annan en plan byen kalkile malgre ki bokou pa oule krwar ladan. Lankadreman e devlopman nou bann zenn zanfan e zenn in komans byen boner e byensir i enn ki progresis.

Semenn pase nou'n antann desizyon pran par *Cabinet* Minis ki ankor lenvestisman pe ganny mete dan labaz ledikasyon pou ede soulaz nou bann paran ki annan zanfan dan *day care*, sa i laprev ki nou annan en Gouvernman e ki krwar e atas gran lenportans avek devlopman nou bann zenn, a en tre zenn az.

Touzour an relasyon avek devlopman e lankadreman resours imen, mon byen kontan antann nou Prezidan eksprim li lo sa laspe sant letid vokasyonnel kot bann ki santi zot pli alez avek travay mannev - mannyel i ava annan sa vre e plis loportinite pou kontribye anver zot devlopman personel e evantyelman progresyon pei.

Mon'n osi byen akeyir lanons ki Minister Ledikasyon in fer lo Proze Pilot *Smart Education* ki dayer lekol mon distrik Anse Boileau in ganny idantifye swazir pou partisip ladan, e nou tou nou konnen ki Seselwa par natir i en pep ki

entelizan. E byensir ler bann loportinite koumsa i vini, parey nou dir *the sky is the limit*.

E a sa pwen, mwan mon oule sezi sa loportinite pou demann tou zanfan ki pe ganny sa loportinite e tou paran mon distrik pou pa les sa sans pas zot, servi li byen. Zot ledikasyon e devlopman i vremen enportan aköz se sa bann demars parey ki pou permet zot vin sa ki zot anvi vini dan lavi.

Smart thinking e osi avek bann lespri inovatif ki ganny devlope. Devlopman teknolozi parey nou konnen i ekstremen enportan, sa ki nou bann zanfan ozordi i fer ek bann teknolozi ek bann *gadget* elektronik i vremen enkrwayab.

Alors, mon salye osi sa zefor ouswa sa mannev sa demars ki nou Prezidan in fer pou retourn *NISTI* kot zisteman bann zanfan e trwazyenm az a en tre zenn az zot a kapab ganny ekspoze avek plis konesans e dan fason pli *smart* ki mannyer zot pou servi sa bann teknolozi.

Mon pou dir sa, Madanm Speaker, aköz ozordi i annan zanfan 4an, 5an ki in servi kart kredi zot paran pou fer tranzaksyon *online*, zot pe aste zot prop pti *stuff* ki zot bezwen zot, zot bann *games and what not*. Alors, mon krwar i

enportan ki lankadreman en zannan a en tre zenn az i tre, tre esansyel.

Aprè si nou get bann kalite krim ki pe ganny komet atavè *internet*, bann krim, kot milye de milye dimoun i ganny ekspozé avèk, mon salye mon sa retou ouswa sa Amannman dan Lalwa *cybercrime* ki dayer bokou Seselwa in ganny afekte e pa'n ganny eparye dan sa serk, i annan ki'n perdi tou, lakaz, larzan e menm i annan ki ti annan biznes zot in perdi zot biznes.

Ease of doing business, mon krwar in en pwen ki'n en konsern tre serye pou pa zis bann gro biznes, pa zis bann ki'n komans zot pti biznes me bann ki pe *aspire* pou vin biznesmenn ouswa antreprenè.

Tou koze sa dernyen 5an i se ki in vin deplizanpli difisil e preski enposib pou fer biznes isi Sesel. Alor, lanons par Prezidan pou met bann mekanizman an plas pou amelyor lanvironnman pou permet dimoun fer biznes dan en latmosfer pli eze in anmenn bokou lespwar pou lavenir. Pa zis pou Seselwa me egalman bann investiser etranze.

Demars pou akse avèk finans e reveyman *loan* i en size ki enteres bokou, sirtou bann ki dan biznes san oubli bann *startup*, bann ki pe

aspire pou zot antre dan serten *area of business*.

Madanm Speaker, enn bann kondisyon ekstremman enportan pou lankourazman lenvestisman e devlopman se byensir nou konnen stabilite en pei, stabilite sosyal e osi ekonomik. Byensir, si napa en lanvironnman kot lord ek lape i renye pou preski enposib pou annan progre.

Nou Prezidan i konpran sa tre byen e se pour sa rezon ki'n in adres sa size *rule of law* e reform dan sistenm Zidisyer. Ler ou antann ki serten dimoun ou sirtou Zofisye Gouvènmman i komet serten lofans e son viktim pa ganny rekour devan lazistis, sa pa kapab normal sa.

Ler en zofisye de lwa i fer serten larestasyon anliny avèk son devwar oubyen avèk son responsabilite pou vwar li i ganny sispann e ganny pey, *half pay*, lanmwatye son saler. Sa pa kapab normal sa, e proses foudre ganny lazistis i

Mon panse sa i en bann demars ki bezwen ganny adrese, e seryezman. So ou byen ou byen, si ou mal ou pa kapab byen, ou bezwen asim responsabilite. Foudre pa ki ou trouv en linisyativ sa ki pe fer son louvraz byen e avèk entegrite.

Ki se swa ou en Zofisye Lapolis, Militer en Prosekiter, Mazistra oubyen en Ziz,

lazistis i bezwen ganny fer pour tou. Konstitisyon Sesel i fer provizyon pou garanti drwa e lazistis sosyal avek tou dimoun.

Alors, dan sa konteks mon krwar i enportan e nou lo sa kote latab nou apresye e rekonnet ki i devret annan serten revizyon dan sekter prononse par Gouvernman.

I fer mon rapel enn mon koleg i dir mon koumsa li i annan son *case* Ankour, prosekisyon ki reprezant Leta ler i vini li prosekiter i ale i enterakte avek, riye, fer fars avek Avoka Ladefans e li ki kliyan li ki viktim konmsi i pa la ditou.

I byen i pa anpese ou enterakte avek kanmarad, me selman i annan serten nivo mon mazine profesyonnalizm ki bezwen ganny demontre dan bann louvraz parey.

Mon'n osi byen akeyir parey bann koleg revizyon ki pou annan dan reminerasyon oubyen saler bann travayer dan sa konteks nou pe koz byensir tou pe i merit son saler lasante in ganny mansyonnen me nou osi panse ki i pou annan ankor lezot sekter lezot lorganizasyon travay ki bann travay i devret zot kondisyon ganny get ladan.

E lo lanons konsernen nouvo lopital pou Sesel, la osi mon krwar i en lanons ki'n ganny tre byen apresye par pa

zis mwan mon dimoun mon distrik me osi Seselwa an zeneral.

E si mon pou tourn lo kote mon distrik, mon krwar i enportan ki Gouvernman in egalman zet en regar tre profon e tre pros lo leta Sant Lasante nou distrik malgre ki partou kote i annan bokou bann zofisye lasante ki pe donn zot mye me i kler ki leta, kondisyon kot zot pe travay i pa neserman enn ki pou ed zot epanouir.

Madanm Speaker, en lot lanons signifikan ki'n ganny fer par Prezidan larepiblik Dr Patrick Herminie konsern lakaz ek later. E la mon ti a kontan zis fer an pasan resorti ki sa proze 24/24 anler Anse Louis dan mon distrik ki'n ganny fer referans avek pli boner par entervenman avan mwan ti en proze *ex*-Prezidan Danny Faure e 5an in pase prezan ki la petet ankor dan 2 mwan ki sa 24 *unit* pou kapab ganny remet avek bann lokater.

Donk, i annan lespwar pou zot, me distrik Anse Boileau li menm li i annan provizyon pou konstriksyon lakaz swa lozman pou nou bann dimoun. Pandan sa manda ki nou ladan.

E lo sa kote nou kapab dir. Vre mon pou dir ankor aköz mon krwar i enportan ki nou dir langazman, sa lentere

ouswa bezwen pou demann lakaz pa'n ganny pran o serye akòz rezyon sid was osi pa'n ganny eparnye dan sa demars bokou proze, bokou proze lakaz dan sa rezyon ki'n ganny en ta retar ouswa i annan ki pa ankor komans ditou.

E, 1000 lakaz ki Prezidan in anonse pou ganny konstri sa lannen, i pa kapab vin en problem pou person. Mon krwar i devret en soulazman pou mazorite nou bann dimoun ki deor ki ankor pe esper zot pti lozman.

Madanm Speaker, avan terminen en mon ti a kontan koz en pti git lo sa laspe gouvènan, bon gouvènan latransparans e rankont ki dayer i en size ki ti ganny koz bokou, bokou in ganny dir dan sa dernyen 5an lo la.

Me ki nou'n vwar menm dan serten *forum* ofisyel konferans de pres nou'n vwar ki bann kestyon ki'n ganny demande dan pe koz lo *freedom of speech*, laliberte lapres e lezot bokou kestyon pa'n zanmen ganny reponn.

E par kont i annan bann i annan serten zournalis ki tre prominan, ki mon konnen i fer byen bann lanket, i annan ki'n menm ganny *ban* dan bann konferans de pres e pa sa ki mon krwar nou apel laliberte lapres mon krwar laliberte lapres tou dimoun i devret kapab eksprim li ouvertman e

dan en fason konvenab, konfortab tou.

Donk, avek serten lenvestigasyon atraver bann *board of inquiries* demande par Sef Deta, lo serten size sansib parey lensidan rayot prizon le 5 Desanm, leksplasyon CCCL le 7 Desanm e lezot ankor, mon panse i ava enn bann fason pou met lalimyer lo bokou keksoz ki nou'n tann koz lo la. Bokou spekilasyon ki'n tand e byensir serten sa bann size i a ganny *put to rest*.

Avek sa Madanm Speaker, mon oule remerci tou bann dimoun ki'n swiv mon e ki pe swiv Lasanble ozordi apre midi. Mersi pou ekoute US sel lespwar pou Sesel e lavenir Sesel se US.

MADAM SPEAKER

Bon, nou ava prezan pran en dernyen entervenan pou ozordi. Onorab Clarisse.

HON DENISE CLARISSE

Mersi Madanm Speaker, koleg Manm Onorab, tou dimoun ki a lekout bon apre midi. En bonn apre midi spesyal pou tou zabitan Bel Ombre.

Madanm Speaker, mon'n pran mon letan pour mwan ekoute e byen konpran sa diskour prononse par Prezidan Larepublik Mardi le 27 Zanvyè. Diskour ti ranpli avek bokou parol ek bann promes byen prepare.

Me larealite, savedir, vre leta nou nasyon ozordi an 2026 i dir otreman, sirtou lo lentegrite nou pep, lafason lekout sa Gouvernman e langazman serye pour devlopman nou pei ek nou pep. Sa i fer mwan war li difisil pou *trust the process*.

5an pase anba Ladministrasyon LDS, pep Seselwa pa ti'n ganny tronpe. Zot ti konnen nou ti pe re batir en pei ki pandan 43an ti'n *fail* pour lev son sitwayen, me ti'n kree en kiltir depandans. *SPUP*, *SPPF*, Parti Lepep, *US*, ti fer sa pep krwar ki san zot, zot napa valer, napa dinyite, napa lavenir.

Kan Ladministrasyon LDS ti vin o pouvwar, nou misyon ti kler, met Sesel lo son lipye e retourn dinyite son pep. 5an, pa ti pou zanmen ase pour refer 43an depandans ek silans, me nou'n poz fondasyon pour en nasyon kot sak Seselwa i santi li enportan, respekte, e lib.

Ozordi, *US* i koz lo kouraz ek linite, me zot aksyon i reste menm vye pratik *SPUP*, *SPPF*, Parti Lepep efas progre, reekrir listwar, e fer pep krwar ki zis zot ki kapab dirize. Sa, pa linite, me i plito manipilasyon e pli meyer fason pou diviz en nasyon.

I nou devwar, konman reprezantan LDS, rapel sak Seselwa ki zot dinyite pa pour

okenn parti, me pou zot menm, i selman letan nou lentegrite koman en endividi i ganny respekte e apresye ki nou kapab debout vreman koman en sel nasyon e mars ver semen progre ek prosperite.

Madanm Speaker, mon anvi konsantre lo bann pwen ki tous lavi fanmir Seselwa. Mon oule komans avek trezyenm mwan saler. Dr Herminie i prezant sa koman en nouvo keksoz. Me laverite se ki LDS ti'n fini met sa an plas e normaliz trezyenm mwan saler pandan son manda.

Kestyon ki nou bezwen demande, avek sa trezyenm mwan plen ki'n annan leokri lo la, konbyen Seselwa ozordi i kapab dir avek fyerte ki zot trezyenm mwan saler anba *US* i pli bon, ki sa ki zot ti gannnen anba LDS? Ou'n kapab ganny li an plen wi, me ki gran diferans i annan avek ou trezyenm mwan 2024?

Ki diferans i pe annan lo nivo prodiktivite anver bann ki ti pe toultan donn zot tou konpare avek bann ki ti pe delivre mwens? Petet nou devret demann bann ki ti a pe vreman delivre ki diferans zot in war ?

Madanm Speaker, Dr Herminie i dir e mon site "*from welfare to workforce*", i vin nou nouvo moto". Sa *workfare* i vin

nou nouvo *moto* fen sitasyon. Sa i sorti dan menm parti ki pandan 43an in fer pep Seselwa krwar ki depandans ti normal, ki san *SPUP*, *SPPF*, Parti Lepep, e la *US*, Seselwa pa ti pou kapab avanse.

Petet nou devret ganny en bon leksplikasyon lo ki mannyer sa nouvo *motto* i ale avek *from cradle to grave*? Letan *LDS* in dir avek Seselwa ki prodiktivite ek travay i enportan, *US* zot kanpanny pou anbet Seselwa, sete zot pou ganny larzan malgre zot pa travay. Reentrodiksyon *URS* i fer egzakteman sa, tandis ki *LDS* ti'n fer nou bann zenn vin bann antreprenner e bon travayer.

LDS nou'n toultan krwar dan dinyite atraver *empowerment*. Nou'n dir e fer Lepep Seselwa konpran i *ok* pour ou pa *ok*, me nou pou ed ou pour ou kapab redebout ankor ki swa konman en endividi ouswa konman en fanmir, e letan ou'n arive fer li, i pou atraver ou prop merit, pa aköz afilyasyon ou parti politik. Se sa diferans ki *LDS* in anmennen.

Madanm Speaker, mon asire ki sa zenn garson ki ti war li pe depan lo *welfare* pour en bon pe letan me anba Ladministrasyon *LDS* in konpran ki savedir travay pour konnen ki mon pe koz lo la. Pour sa zenn fiy ki'n swiv

parkour depandans son fanmir anba *SPUP*, *SPPF*, Parti Lepep ek *US*, me ki'n deside debout lo li menm pour soutenir son lekör pour konnen ki mon pe koz lo la.

I malere pou dir, me olye fer nou lazenes avans devan e devlope, *US* pe senpleman fer zot retourn an-aryer. Olye fer nou zenn rantre dan lanplwa formel e kontribye dan *tax* ek Fon Pansyon pour son prop byennet, nou pe kit li lanmenm ater. Sanmenm dinyite ek devlopman?

Madanm Speaker, lo size lakaz ek later, Dokter Herminie i penn en portre dans son *SONA* ki *LDS* pa'n ekoute e menm pa'n delivre pour asiste sa pep. Sa ki *US* pa dir nou se sa *back log* lakaz ek later ti la depi *SPUP*, *SPPF*, Parti Lepep. Plizyer Seselwa in war zot dezavantaze pour lasistans pandan tou sa lannen aköz afilyasyon politik.

Mwan, mon'n en dimoun pandan mon parkour travay ki'n temwanny lenzistis pour lasistans lakaz, ki letan mon'n koz lo merit ek bezwen lasistans lozman pour en fanmir mon ti ganny dir zot pa merite aköz zot ti *SNP*.

Konbyen zot siporter ki'n ganny plis ki en lakaz e ozordi zot pe lwe sa dezyenm ? I pa byen zis pou zet labou. I meyer pou koz larealite.

LDS in delivre lo bann proze lakaz nasyonalman. Bel Ombre pa ti ganny kit deryer. Nou distrik ti benefisye avek 16 *unit* dan Proze Lakaz Delo Ladal, 6 *unit* Corsaire e 24 *unit* Vilaz Prosperite. Travay *LDS* in ganny rekonnet kan Prezidan Herminie li menm, mwens ki 2 mwan apre ki i ti vin dan lofis ti inogir 32*unit* dan distrik Perseverance plis ki program Prezidan Faure 24/24/24 ki pa'n zanmen abouti. Travay *LDS* sa.

E li menm i ti salye sa nouvo fason fer *Public Private Partnership*. *LDS* in dirize e pran linisyativ pour byennet Sesel toultan. *US* ozordi i promet 2mil lakaz par 2030, me san rekonnet travay *LDS*. Vre demokrasi vedir aksepte kontinite. *US* i refize rekonnet ki wi, in annan travay ki'n ganny fer pour apez sa demann pour Lozman.

Madanm Speaker, Dr Herminie i promet partisipasyon zenn dan bann desizyon. Sa ankor i montre ki sa promes i en parol. Fasad i zoli me larealite i diferan. Bann zenn pe aktyelman ganny dir ki pour fer san vreman ki zot lopinyon i ganny ekoute e respekte. Zis pour sit de legzanp.

Youth Assembly, dan en Mosyon ti desid lo laliberte *hair style*. Eski Minis Ledikasyon ek Gouvernman in

respekte zot lopinyon? Non. Lazenés in ganny zet de kote e lord sorti anler ki'n konte.

Bann etidyan lo Pralslin ek La Digue ti kapab fer zot *A Level* kot Vijay International School e zot ek zot paran ti byen apresye. Sa program in ganny dis kontinyen san okenn konsiltasyon. Eski Gouvernman in ekoute? Non.

Lazenés plis ki zanmen zot devret pe vwar zot vre lenportans dan sa sosyete. Pa les zot ganny konvenki par sa Ladministrasyon *US* ki keksoz I get fasil pour ganny akonpli e si zot arive vin *somebody* se gras a *US*, sa pa leka ditou. *You can be some body* par ou sakrifis, ou disiplin ek ou lentelizans.

Pa zanmen les zot ganny dir e krwar ki i annan en pri ki atase avek zot dinyite. Pa zanmen les zot ganny gide dan bann direksyon ki zot, zot pa anvi pran. *LDS* koman en Parti in toultan krwar dan lepanouisman nou zenn. Donn zenn zouti pour debout lo zot prop lipye, pour zot koz fran, e pour ganny valorize pa aköz lwayote politik, me aköz zot konesans entelektyel e merit.

Zisteman, en kestyon ki bann zenn pe demande se eski zot pou kontinyen ganny sa drwa pou elekte zot reprezantan lo Lasanble Lazenés ? Oubyen eski i pe

retourn parey avan kot bann sef ki pou swazir bann zenn onorab lo baz politik? Lazenés pe dir ki se zot ki devret fer zot swa zot reprezantan. Annou swiv tre pre.

Lo laspe ledikasyon, Dr Herminie i dir ki son Ladministrasyon in erit en sistenm ledikasyon ki dan kriz. Tro bokou etidyan ti pe kit lekòl san bann *skill* ki zot bezwen pour travay. Sa *statement* i dir bokou lo ki mannyer Ladministrasyon *US* i ensilte langazman e dedikasyon ansennyan anver laprantisaz bann zanfan.

Pou dir ki zanfan ti pe kit lekòl san bann *skill* ki zot bezwen pour travay, sa i en mank respe pour zot profèsyonnalizm.

Mon profite pou remersye e salye zefor nou bann ansennyan, akòz apre tou zot ranmas prodwi ki vin kot zot e sa travay transformasyon ki zot antreprann i senpleman en mirak parfwà. Oubliy sa bann lensilt e reste fikse lo zot vokasyon koman ansennyan e paran pour reisi zot etidyan.

Ledikasyon, laprantisaz e byennet en etidyan pa devret vin en baz, ou menm en konpetisyon okenn Ladministrasyon ki pran responsabilite zesyon en pei. Otan ki lenplimantasyon striktir i ganny mete, i ganny mezire par rezilta dan

performans e atraver bann rezilta bann Polisi i ganny regularize pour asir byennet laprantisaz bann etidyan.

Pe enport ki Ladministrasyon ki pran zesyon pei nou bann etidyan i bezwen kontinyen etidye. Sesel ek paran i senpleman anvi meyer rezilta. Annou travay ansanm pou amelyor kondisyon sosyete pour ki nou zanfan i ganny pli gran sans reisir e nou tou nou ava kontan e nou pei ya ganny bann pli bon prodwi kan nou zenn i prodwi meyer rezilta e vin sa ki zot anvi dan sosyete.

Pour bann etidyan, mon enplor zot pour reste konsantre anver zot letid. Devlop sa labitid pour al lekòl pou etidye e non pa zis pou al kot lekòl. Ledikasyon pa konsern prezans, me plito langazman.

En *motto* mon kontan dir mon zanfan e menm lezot zanfan ki mon enterakte avek *do not take the elevator to success, take the stairs*.

Wi, pou annan defi, wi pou annan dezapwentman, me nanryen dan lavi pa fasil. Lazenés, pour reisi dan lavi ou bezwen zefor, disiplin, ek rezilyans. Konsantre ou kapab fer li.

Madanm Speaker, Dokter Herminie i koz lo lentegrite, protez bann vilnerab, e partaz progre.

Lentegrite savedir respe, kontinite ek laverite. Me *US* i refize souliny lakonplisman *LDS*. Zot pe seye pou re ekrir listwar, e osi enstil lafreyer dan sa pep.

Dokter Herminie i dir mon site ; -

'Bann ki krwar zot pe enstil lafreyer e divizyon dan nou pei, zot pe tronpe. Bann ki le bril Sesel pou zot kapab ganny pouvwar, kontinyen reve'.

Me lekel ki vreman pe enstil lafreyer? Dan psikoloji zot dir ki letan en dimoun i fer bann tel deklarasyon sa i prodwi zot prop lespri e zot pe senpleman vokaliz zot lentansyon. Me parey nou dan *LDS* nou'n toultan dir, i tro tar pou fer dimoun dormi boner. Nou war atraver sa bann parol e in ler pour nou dir avek Dr Herminie, aret sa kalite zwe aköz i nepli en kouk kasyet, me en kouk dan kler.

Depi ki Ladministrasyon *US* in vin o pouvwar, zot pe diriz pei avek en lapros diktater pou silans bann ki pa dakor, e fer fo deklarasyon pour gard kontrol. Dan sa bann lofis Gouvernman kot ou pe tap laport pour akse en servis ou a krwar ou pe tap laport Maison du Peuple e koman en dimoun ki pa dan zot parti zot anvoy ou dan tou direksyon.

Kan eski sa latitid pou arete e zot pou pran en latitid servi sa pep e non pa sa *MNA*? Koman *MNA* elekte pou distrik Bel Ombre, mon'n fer li mon devwar e responsabilite pou antre an konsiltasyon avek bann Minister, departman e lazans avek bi pou ranforsi relasyon pou byennet kominote Bel Ombre.

Mon'n deza inisye konversasyon e diskisyon avek Minis Cosgrow pou nou kominote peser, mon swete ki sa diskisyon i a kontinyen.

E la mon ti a swet lapel osi petet Gouvernman Dr Herminie i devret fer en sesyon spesyal pour sa bann zofisye disan i doktrinen dan *SPUP*, *SPPF*, Parti Lepep e la *US* pou fer zot konpran ki zot devret pe servi sa pep.

Nou'n deza war sa bann ki ti a pe zis azir koman en lobstak dan Ladministrasyon *LDS* ki mannyer pe degaz lasasen ozordi, me sa bann ki pa pe fer li, in ler pour zot reveye.

Vre Danze, se en Gouvernman ki predir lentegrite me pratik manipilasyon, ki koz lo annan lekout e reste angaze me an realite zot monopoliz pouvwar, e ki akiz lezot pour divizyon pandan ki zot menm pe senm divizyon. Sa pa lentegrite, Madanm Speaker sa i lipokrizi.

Madanm Speaker, proze i en lot pwen ki mon anvi soulinyen. Dr Herminie, pa'n kapab admet dan son diskour ki wi, i annan proze e devlopman ki Ladministrasyon LDS in anmennen. Mon site: -

“dan ladministrasyon avan, bokou proze esansyel in ganny inisye, me pa'n ganny prioritize, e zot progre i tro dousman pour ariv lo konplisyon. Nou Gouvernman pe pran larelev pour asire ki sa bann proze pa'n zis komanse, me ki ganny fini dan en fason efikas e efektiv'. Fen sitasyon.

Mon anvi senpleman dir avek Dr Herminie ki malerezman in osi zwe en rol ladan kan i ti lans sa ki zot ti apel kod rouz pou dir avek zot bann siporter dan Gouvernman pou pez fren e bloke.

Akoz ki ozordi dan Gouvernman Lokal zot kapab pe koup tou sa bann pye dibwa *pending* pou en bon pe lannen sanmenm ki Bidze pour 2026 in ganny aprouve e serten zofisye en kou angran in reganny lasante e pe mars san okenn problem. Parey zot ti dir an 2020/2025 zot ti pe travay avek *body*, la 2025/2030 zot pe travay *heart, body and soul*. Annou ouver nou lizye.

Premye legzanp ki mon anvi soulinyen se renovasyon lo lekol Beau Vallon Segonder. Koman en Manm lo *School Council* nou ti ganny enformen ki Bidze 2025 in fer provizyon pour annan renovasyon lo sa lekol. Fodre dir ki bokou konplent, vizit, e korespondans in ganny anvoye bann lannen presedan lo sa sityasyon.

E parey in leka dan plizyer lenstans lipye in ganny trennen e finalman mon pour menm dir ti bann retar politik ki ti pe ganny mete. Akoz bann menm zofisye dan Divizyon Proze ki ti pe bloke. La koman Ladministrasyon i vin o pouvwar e serten in ganny promosyon *PS*, tou keksoz *is in order* e toudenkou proze pe al ganny fer.

I sagrinan, e sa dan li menm i en laont. Zot prefere retard konfor bann ansennyan e etidyan pour rezon politik. Sa ankor i apel manipilasyon e lipokrizi.

Madanm Speaker, lot legzanp i Île Perseverance. Mon anvi anmenn zot latansyon lo Ile Perseverance aköz mon ti premye *DA* pour zer Vilaz 2 parey nou osi konn li koman Perseverans 2 an 2012. Konsevwar dan bann lannen 90, Ile Perseverans ti pour enn bann pli gran proze lakaz lo later konble.

An 2011, premye group zabitan Vilaz li osi koni koman Perseverans enn ti antre dan zot lakaz. Sa letan ti annan bokou preparasyon avan ler lakaz pe al donnen. Miting, vizit avek bi pour asire ki bann zabitan i viv an bon konvivans. 2012 parey monn ti dir lo komansman Vilaz 2 ti ouver e komans akeyir bann nouvo zabitan.

Sa letan ti kler ki azanda *SPPF* ti reste limite zis lo alokasyon lakaz san asir en balans dan bann lenfrastriktir sosyal neseler, en pratik ki montre klerman azanda ek stratezi politik pour servi lakaz konman en zouti politik. Sa bann letan tou lezot servis ti pe ganny akse an deor Perseverans, tel ki klinik ek lasistans lapolis.

Pour rezon administratif 4unit ti ganny pran pour fer vin Lofis Ladministrasyon sa 2 vilaz e apre 2 lezot unit ti ganny pran pour fer *police post*. Avek lagrandisman popilasyon ti neseler pour sa zil komans fer provizyon pour son prop servis. An Zen 2013 lekol primer ti ouver son laport e an Zen 2018 lekol Segonder ti ouver son laport.

Sa ki ti enteresan pandan sa bann letan koman *DA* ou vwar bezwen zabitan atraver konsiltasyon e vizit me bezwen pa ti ganny pous

devan aköz pa ti ganny konsidere koman priorite.

An 2020 anba direksyon *LDS* e son Manm Elekte Onorab Desheila Bastienne Ile Perseverance in kapab pran mezir pour koriz sa mank par planifye servis pour konplimant sa balans dan devlopman lozman e lenfrastriktir Sosyal.

En seri lakonplisman in arive, konstriksyon bazar, *upgrading of court* Vilaz 2 avek *sitting facility* e *changing room*, konstriksyon *court* Vilaz 1, *outdoor gym* e premye distrik pour annan son *beach soccer pitch*. Demars osi in ganny anmennen pour bann zabitan ganny akse avek *ATM*.

Le 26 Mars 2025 nou ti war premye pyer pour konstriksyon Nouvo Ladministrasyon Distrik enkli Sant Kominoter, en proze ki ti byen merite pour zabitan Ile Perseverans. Konstriksyon en Stasyon Lapolis ti'n fini ganny mete dan program Ladministrasyon *LDS*.

Alors, i evidan pou dir deklarasyon Dr Herminie lo konstriksyon en Stasyon Lapolis i zis en kontinyasyon azanda *LDS* pour amelyor sa kominote, me pa en nouvo lide i sorti kot *US*. E atraver plan *LDS* pour annan tou sa bann lakaz ki Seselwa i a kapab gannnen prezan. Kaso i a retourn en lasanmben ankor.

Madanm Speaker, *US* pe senpleman pran laglwar lo sa ki *LDS* in fer. Ozordi *US* pe koz efikas e efektiv lo delivre proze. Lofis *DA Bel Ombre*, Lofis *DA Cascade* ek son sant kominoter, *Les Mamelles Day Care Centre*, pou nonm enn de, pa ti ganny vwar en nesesite anba Ladministrasyon *SPUP*, *SPPF*, Parti Lepep ?

Madanm Speaker, pour mwan sa *SONA* in souliny travay ki *LDS* koman en Ladministrasyon in fer. Malerezman, parey mon'n dir lo komansman, *US* pa pour zanmen admet ki devlopman in arive anba Ladministrasyon *LDS*. Sa i en realite ki zot pa pour zanmen kapab efase. *LDS* in delivre, *LDS* in konstri.

Otan ki *US* i refize ki i pe asir kontinite, pe esey tou fason pour efas sa ki Ladministrasyon *LDS* in fer depi 2020 ziska 2025 e sey fer sa pep krwar otreman.

Mon pour dir zot malgre zot get *LDS* koman en minorite nou annan en lavwa e nou pa pour zanmen les zot efas nou listwar. Pour mwan mon pou touzour mars avek *LDS* e krwar dan sa ki nou'n fer. Sa zafer *trust the process* ki nou pe dir i zis en *joke*. Mersi Madanm Speaker.

Bon, nou'n ariv a lafen nou sesyon ozordi. Nou ava *adjourn* ziska demen bomaten 9er.

(ADJOURNMENT)

MADAM SPEAKER